



## Informazioni su questo libro

Si tratta della copia digitale di un libro che per generazioni è stato conservata negli scaffali di una biblioteca prima di essere digitalizzato da Google nell'ambito del progetto volto a rendere disponibili online i libri di tutto il mondo.

Ha sopravvissuto abbastanza per non essere più protetto dai diritti di copyright e diventare di pubblico dominio. Un libro di pubblico dominio è un libro che non è mai stato protetto dal copyright o i cui termini legali di copyright sono scaduti. La classificazione di un libro come di pubblico dominio può variare da paese a paese. I libri di pubblico dominio sono l'anello di congiunzione con il passato, rappresentano un patrimonio storico, culturale e di conoscenza spesso difficile da scoprire.

Commenti, note e altre annotazioni a margine presenti nel volume originale compariranno in questo file, come testimonianza del lungo viaggio percorso dal libro, dall'editore originale alla biblioteca, per giungere fino a te.

## Linee guida per l'utilizzo

Google è orgoglioso di essere il partner delle biblioteche per digitalizzare i materiali di pubblico dominio e renderli universalmente disponibili. I libri di pubblico dominio appartengono al pubblico e noi ne siamo solamente i custodi. Tuttavia questo lavoro è oneroso, pertanto, per poter continuare ad offrire questo servizio abbiamo preso alcune iniziative per impedire l'utilizzo illecito da parte di soggetti commerciali, compresa l'imposizione di restrizioni sull'invio di query automatizzate.

Inoltre ti chiediamo di:

- + *Non fare un uso commerciale di questi file* Abbiamo concepito Google Ricerca Libri per l'uso da parte dei singoli utenti privati e ti chiediamo di utilizzare questi file per uso personale e non a fini commerciali.
- + *Non inviare query automatizzate* Non inviare a Google query automatizzate di alcun tipo. Se stai effettuando delle ricerche nel campo della traduzione automatica, del riconoscimento ottico dei caratteri (OCR) o in altri campi dove necessiti di utilizzare grandi quantità di testo, ti invitiamo a contattarci. Incoraggiamo l'uso dei materiali di pubblico dominio per questi scopi e potremmo esserti di aiuto.
- + *Conserva la filigrana* La "filigrana" (watermark) di Google che compare in ciascun file è essenziale per informare gli utenti su questo progetto e aiutarli a trovare materiali aggiuntivi tramite Google Ricerca Libri. Non rimuoverla.
- + *Fanne un uso legale* Indipendentemente dall'utilizzo che ne farai, ricordati che è tua responsabilità accertarti di farne un uso legale. Non dare per scontato che, poiché un libro è di pubblico dominio per gli utenti degli Stati Uniti, sia di pubblico dominio anche per gli utenti di altri paesi. I criteri che stabiliscono se un libro è protetto da copyright variano da Paese a Paese e non possiamo offrire indicazioni se un determinato uso del libro è consentito. Non dare per scontato che poiché un libro compare in Google Ricerca Libri ciò significhi che può essere utilizzato in qualsiasi modo e in qualsiasi Paese del mondo. Le sanzioni per le violazioni del copyright possono essere molto severe.

## Informazioni su Google Ricerca Libri

La missione di Google è organizzare le informazioni a livello mondiale e renderle universalmente accessibili e fruibili. Google Ricerca Libri aiuta i lettori a scoprire i libri di tutto il mondo e consente ad autori ed editori di raggiungere un pubblico più ampio. Puoi effettuare una ricerca sul Web nell'intero testo di questo libro da <http://books.google.com>



~~8.19.12~~

Ital 6873.1







# **COLLEZIONE**

**DI TUTTI I POEMI IN LINGUA  
NAPOLETANA.**

**TOMO QUINTO.**

---

**LA CIUCCEIDE.**

---



◉ L A  
**CIUCCEIDE**


O P U R O

**LA REGGIA DE LI CIUCCE  
CONZARVATA**

*POEMMA ARROJECO*

**DI NICOLO' LOMBARDI**

*CAPORUOTA NELLA REGIA UDIENZA  
DI TRANI.*



**N A P O L I MDCCLXXXIII.**

---

**PRESSO GIUSEPPE MARIA PORCÉLLI**  
*Con Licenza de' Superiori.*

Ital 6873.1

6

**A CCHI HA GOLIO DE LEJERE  
STA CHELLETA.**

**S**I tutte quante ll' uommene volessero  
Farse lo fatto lloro, e lassà correre  
Lo Munno, comme va, senza ntricarese  
De li guaie d' aute; no nse sentarriano  
Tanta fracasse, quanta se nne sentono;  
E agnuno potarria stampare, e scrivere  
Chello, che le jarria pe lo vellicolo,  
Senza paura de l' ammola fuorsece,  
Che mmanc' uno nne fanno passà vergene.  
Ma pecchè rregna sto mmarditto vizio  
Ntutto lo Munno, e mmasseme ccà a Nnapole;  
Nche se n'zonn' uno de caccià na storia,  
E ssia, de le mmalizie de le ffemmene,  
O puro chella de Trastullo Perteca,  
Subbeto siente dì: Tutte li pullece  
Hanno la tossa: s' è boluto mettere  
Isso puro co ll' aute mprotacopeja:  
Va sacce mo, che nne vorrà pretennere  
Co ffa ssa chella? e itagliano, e spetacciano  
No poveromme, e spisso senza caosa.

Or' io mo , p' avetare sso fastidio ,  
 Che sti tale peglià se potarriano ,  
 Vedenno , nzicco nzacco , ascì sta chelleta ;  
 Te voglio dì , comme mme mise a scrivere  
 Sta mmosca pesca , e ccomme a cchisto termene ,  
 A fforza , so benuto de stamparela .  
 Aie da sapè , ch' a ll' unnece , o a li diudece  
 De chillo mese , che li Ciutce arragliano ,  
 Paricchie galantuommene de Napole ,  
 Che ncopp' a l' Arenella se trovavano ,  
 Chi a ssanarse lo pietto , e cchi lo stommaco ,  
 Se devano buon tempo ; e , ccomm' è ssoleto  
 De farese ncampagna , se nn' ascevano  
 La matina pe ttimpò , e sse nne jevano  
 Cammenanno , e spassanno tutte nzemmora .  
 Ma pecchè lo ffa sempe sto sarcizio ,  
 Senza avè no casuorchio , addò posarese ,  
 Sarria na cosa , de fa scì lo spireto ;  
 Non dico a cchille llà , che se rejevano  
 A mmala ppena , e steano mieze sisete ,  
 Ma a cchi co na montagna pò fa a ppunia ,  
 E stà cchiù ttuosto de na preta marmora :  
 Pe cchesto , dapò avè gerata ll' isola ,  
 Quann' erano chell' ore marvezzorie ,  
 Che ncignava lo Sole a avè de ll' aseno ,  
 Devano funno 'ncasa de no Miedeco ,  
 Che , pe ffuì li frate malenconece ,  
 Nc' era juto nzeggetta a ppeglià ll' ario :  
 No bello viecchio , e de li meglio Miedece ,  
 Che ssò , a lo juorno d' oie , pe ttutta Napole :  
 Va pe ttutte le ccase de sti Principe ,

Trase

Frase a tutte li meglio Monasterie ;  
 E' Bbica-cancelliero a lo Collegio ,  
 S' abbusca le mmognole co lo cuofano ;  
 E sse chiamma Jatano de l'Auterie .  
 Lo riesto cierti vierxo te lo ddiceno ,  
 Che ttrubve dinto a sto Poemma Arrojeco .  
 Ora no juorno , menae se trovavano  
 Tutte nziemo a sta casa , e ttrascorrevano ,  
 Spara uno de la mmorra : Pe spassarece  
 Veramente ccà ncoppa , non porriamo  
 Fa , nfra de nuie , na specie d'Accademmia ,  
 No a dderitto , ma p' abburlare , e tridere ?  
 Ch' accossì potarriamo devertirece ,  
 E spassarce sti frate , che nce seannano .  
 Facimmola , decettero d' accordo  
 Tutte quante : Facimmola , facimmola ,  
 Lo buono viecchio , ca mme va a lo ggenio :  
 E ddapò ciento chelle , e cciento chiacchiare  
 De lo ecomme , e lo cquanno , resorvettero  
 De farla agn' otto juorne , e le mettertero  
 Lo nomme d'Accademmia de ll' Asene :  
 Co na legge , che tutte componessero  
 Matrecale , e Canxune ncoppa a ll' Asene ;  
 E cconcruso accossì , se diè prencipio ,  
 Ncapo de ll' otto juorne , a ffa ssa vernia .  
 Io non mme nce trovaje , ca steva a Nnapole  
 Co li malanne mieie ; ma pecchè mm' erano  
 Tutte quante Cardasce , mme mmitajeno ,  
 Ed io , pe le sservì , jette a ssentirele .  
 Tanto cchiù , ca nce tengo na casuppola  
 Ncoppa a cchella montagna , pe spassareme



Quanno stò co li frate, è mme va a ggenio ;  
 Ma pecchè n' è la mia, non pozzo dicere  
 A lo commanno tuio. Si vuole venirece,  
 Paga ssa Terza, e statte felecissemo.  
 Arrevato che ffuie, pe ffavorireme :  
 Te nce volimmo, accommenzaieno a ddicere  
 Tutte quante l'ammice. Io, comm' a n' ascno ;  
 Comme volite. Mme mettie a ccomponere,  
 E nn' ascie stà schesenzia. E ppecchè subbetto  
 La nova se spannie pe tutta Napole,  
 Ca ncoppa a l'Arenella se cantavano  
 Le ggrolie de li Ciucce ; a pprecepizio  
 Venne cchiù de n' ammico a ffarce razia ;  
 E, nzentirce arraglià, no nce facettero  
 Na facce storta, e nno le despiacettemo.  
 Arraglia sta settimana, arraglia st' auta,  
 Ncauzaieno li dolure ; e ccomme jevano  
 Crescenno le ssemmane, aecossì ghievano  
 Crescenno chille, che nce favorevano.  
 E dduie, nfra ll'aute, a chi, nzi che lo gliuommaro  
 De chesta vita mia non vene a rrompere  
 Chella, che l'arravoglia, aggio da essere  
 Schiavo vennuto, vogliano, o non bogliano,  
 Mme facettero tanta de le ggrazie,  
 Che nn' anchiettero quase meza Napole.  
 E a lo rreto mme dissero: Feniscela,  
 Ch' avimmo resolute de stamparela.  
 Che bholite stampà ? mme vene a rridere,  
 Nzentirclo di schitto : st' ata vernia  
 Nce mancarria d' avè a ssentì pe Nnapole.  
 No nce vò auto : s' ha da stampà proprio.  
E ttor-

E ttorna co la stampa. E ttanta fujeno  
 Sti sì, e sti nò, sti dicome, e sti dissete;  
 Ch' all' utemo: Nce nn' aie da dà na Copia;  
 E nnuie te la stampammo. Ora vedennome  
 Co le spalle a lo muro, ca la Copia  
 Non potea fa de manco de non darella,  
 Fice virtù, comme se sole dicere,  
 De la necessetate. Chesta è ppropeto  
 La veretà. Si tu mme lo bbuoie credere;  
 Cridelo, ca la ncarre, e tte rest' obbreco;  
 Si nò, pur' accossì; e bbà felecissemo.  
 Ma, primma che te lasso, n' ata chiacchiata  
 Te voglio dì: Si non te va a lo ggenio  
 Quarche ccosa, che ttruove int' a sta chelletta,  
 Masseme a lo pprencipio, te suppreco,  
 Co ddiçe ventrecella, a ccompatireme:  
 Primmo, pecchè fu ffatta nfra lo termene  
 De tre mmise, e sse sà pe ttutta Napole.  
 Agghiugne: la materia è troppo steteca,  
 Vasta dì, ca se parla sempe d' Asene.  
 Pe ttierzo: no mm' è pparzo de mpizzarece  
 Carche nnammoramiento, ch' è chell' ancora,  
 Addò se fanno forte tutte ll' uommene,  
 Che bbonno tirà a lluongò carche fabbola;  
 E pp' utemo, fuie fatta pe spassarece  
 Nfra nuje, e nnuie; ca no nce jeva propio  
 Pe lo penziero, e mmaie ce smacenavamo,  
 Ch' avesse avuta a ccomparè pe Nnapole.  
 N'ata cosa. Si vide dint' a st' Opera  
 Nnommenare le ccose, che no nc' erano  
 A lo tiempo, che ll' Asene parlavano,

*Ma paricchie anne appriesso se vedettero,  
 O nce sò mo a lo Munno ; no nte mettere  
 A ddì , ca è stato arrove , e a ttenagliareme;  
 Ca ll'aggio fatto apposta , pe ccorrejere  
 Li vizie de sti juorne , comme fossero  
 De chillo tiempo ; ca , si nò , da ll' Asene  
 No le ppotea fa dî , ca mo non parlano ,  
 E non fann' auto , ch' arraglià , e ffa pedeta.  
 Mmoccate chesto , e scusa lo fastidio .*



DE LA  
CIUCCEIDE  
ARRAGLIATA I.



ARGOMENTO.

*Varvajanca lo Rrè , che brociolare  
Già vedea de lo Munno la fortuna ,  
Chiamma li Ciucce , pe se conzortare  
Comm' ha da fa , pè ffravecà le mmura  
Attuorno a la Cetate , pe nce stare  
Tutte quante llà ddinto a la sicura.  
Mente parla , l' afferra n' antecore ,  
E ccorrenò li Miedece a l' addore.*

I.

**C**Anto chillo gran Rrè , ch' into Gragnano  
La Reggia de li Ciucce conzarvaje ;  
E ccomme fuie , che ssenz' avè le mmano ,  
Le mmura , e no Castiello nce chiantaje ;  
Stese po li confine , e cchiano chiano  
Tutto quanto lo Munno nce nzerraje ,  
Tanto ch' addò lo Sole cammenava ,  
Auto bene , che Ciucce , non trovava.

## II.

Aseno co l' ascelle , che 'n Parnaso  
 Lo primmo luoco d' arraglià te tocca ,  
 Portame no voccone da lo vaso ,  
 Che bà Febbo a ttrovà , quanno se cocca :  
 Sse rrecchie appizza , sforgiate sso naso ,  
 E spaparanza ll' una , e ll' aota vocca ;  
 E , azzò me nn' aggia d' alliccà le ghièdeta ,  
 Fammence n' arragliata co ddoie pederà .

## III.

E ttu , Arcaseno mio , che ssi lo sciore ,  
 Lo Capotroppa de l' asenetate ,  
 E ccacce zuco , puro da l' addore  
 De nzò , ch' esce da cuorpo a li malate ,  
 Pe cquanto si geluso de l' annore  
 De st' Asenielle tuoie matrecolate ,  
 Scioscia puro , te preo , e ttu mm' ajuta  
 Sta sarma a ccarrejà pe sta sagliuta .

## IV.

Sott' a na gran Montagna de la Costa ,  
 Da la banna de Napole , è no monte ,  
 Che ppoco da Sorriento se descosta ,  
 E la Torre , co Buosco le stà nfronte  
 Bello , che ppare propio fatto apposta  
 Pe Mmarchise , pe Pprincepe , e ppe Ccutonte ,  
 Ditto , da la Grammegna , Grammegnano ,  
 Po se corroppe , e se chammaie Gragnano .  
 A sto

## V.

A sto luoco , da tanno , che lo Munno  
 Fuie fravecato da li pedamiente ,  
 Quanno da chill' antico , e ggran Zeffunno,  
 Addò era tutto , e nno nce pareva niente ,  
 Nn' ascìe lo Cielo , e sse facette tunno ;  
 Ll'Acqua , la Terra , e tutte ll'Alemiente  
 Jettero addove le toccaie lo luoco ,  
 Sulo 'n Cielo volaie ll'Aria , e lo Ffuoco;

## VI.

Da chillo tiempo , comme v'aggio ditto ;  
 A sto luoco , ch'è ccosa de Segnure ,  
 Nce faceano la mmira zitto zitto  
 Li primme arcesapute Arragliature:  
 Pocca , comm' a na Croneca stà scritto ,  
 E lo pprova co autenteche screttture ,  
 Abbistaieuo , ch' a cchella montagnella  
 Maie nce mancava ll' erva tennerella.

## VII.

E ccà , pe nzi che ddoraie chella aitate,  
 Che ll' uommene nfra lloro , e ll' anemalo  
 Se volevano bbene , comm' a ffrate ,  
 Nè nse sapea che bbolea di fa male,  
 S'aonevano li Ciucce; e ppe le strate  
 Nc' era no scialatorio neverzale :  
 Magnavano , vevevano , zompavano ,  
 Bedevano , correivano , e scialavano .

Poc-

## VIII.

Pocca no nc' era chi le sconcecava ,  
 O le venea a gguastà li fatte l'oro :  
 Tutte s' accarezzavano , e s' ammava  
 Ll' uno co ll' auto . O bella aità de ll' oro !  
 La gatta co li surece abburlava ,  
 Co le mmosche lo ragno ; e cquanta foro  
 Pe la terra , pe ll' aria , e ddinto maro ,  
 Parevano la vesta , e ll' aurinaro .

## IX.

Ma quanno po , pe sconquassà lo Munno ,  
 E pp' anchirlo de trivole , e dde guaje ,  
 Se vedette sguiglià da lo Zeffunno  
 ( Uh che ccomparza no nce fosse maje )  
 Chella Descordia , che dda capo a ffunno  
 Mbrogliate le ccarte , e tte lo spstellaje ,  
 Addio pace , addio ammore , addio contiente ;  
 No nce fuieno cchiù ammicce , nè ppariente .

## X.

Agnuno reteratose a cquartiere  
 Non facea cchiù co ll' aute compagnia :  
 Ncignaieno li sospette , li penziere ,  
 Lo , cchesto che bbò dì ? la ggelosia ,  
 La collera , la mmidia , li vrachiere ,  
 Li trajemielle , la frabottaria ,  
 Tutte chille streverie , e echille male ,  
 Che mannaieno lo Munno a lo Spetale .  
 Com-

## XI.

Comm' a ll' aute , li Ciucce poverielle ,  
Nche bbeddero le ccose ggjà mbrogliate,  
Se reteraïeno a cchelle mmontagnelle ,  
Che ssempe ll' uocchie llozo erano state;  
Decenno ll' uno a ll' auto : Li fratielle  
Si nc' hanno tutte quante abbannonate ,  
Vagano puro addò le pare , e ppiace ,  
Ccà nuie starrimmo dinto a la vammace .

## XII.

E bbedenno , ca tutte ll' anemale  
Aveano fatto Rrè lo cchiù ssaputo  
De le rrazzimme llozo , e ccomm' a tale  
Era da tutte ll' aute reveruto ;  
Penzaïeno de se fa pe Ccaporale  
Uno de llozo , ch' avesse saputo  
Governà tutte quante , e a ppoco a ppoco  
Fa Reggia de li Ciucce chillo luoco .

## XIII.

Chisto fuie Don Paccone , che , ppe ddare  
No juorno ajuto a Bacco , che mpontato  
Era a no sciummo , e non potea passare ,  
Fuie da isso mnenattemo nnaizato  
A ssapè tutto chello , che mparare  
Se pò a la scola ; e a ll' utemo portato  
Ncielo , fuie fatto una de chelle Stelle ,  
Che l' Astroloche chiammano Asenielle .

Muor-



## XIV.

Muorto chisto, duie figlie, ch'avea fatte  
 La Descordia, jettero crescenno :  
 Ll'uno era Mio, che ppe guastà li fatte  
 De Tujo, ch'era ll'auto, jea sperenno ;  
 E pecchè steano comm'a ccane, e ggarte,  
 Chiano chianillo se ieno spartenno  
 Tutto lo Munno, e ll'uocchie se cacciavano  
 Ogne bbota, che nziemo s'affrontavano.

## XV.

Ma pecchè Mmio rescette uno de chille,  
 Che se chiajetarriano na mascella,  
 Co ll'arte, co le mmano, e cco li strille  
 Jea sempe scervecchianno carcosella,  
 Ch'era de ll'auto, a nzi, che li capille  
 Le spennaie tutte, e l'ammaccaie la zella;  
 E cquanno ll'appe propio annegrecato,  
 Nne lo fece fòl pe ddesperato.

## XVI.

Mmedè chesto, le ggente, e ll'anemale  
 Cercaieno de se mette a lo ssecurato:  
 Chi facea turre, chi facea sepale;  
 Chi faceva no fuosso, e cchi no muro;  
 E lo Rrè de li Ciucce, che ggran sale  
 Teneva a la cocozza, jette puro  
 Rommecanno nfra isso chiano chiano  
 Che se poteva fa dinto Gragnano.

E re-

## XVII.

E rresorvette de volerce fare  
 Comm'a na chiazza d' arme a sto pajese;  
 E ffarce no Castiello , pe nce stare  
 A lo ssecuro da tutte l' affese ,  
 Co no muro , ch' avesse a ntornejare  
 Tutto lo regno : e ffarce le ddefese ,  
 Azzò , si maie le fosse fatta guerra ,  
 Se potesse defennere la Terra .

## XVIII.

Lo penziero era bello : *ma che bbale*  
*Penzare buono , e non potè fa niente ?*  
 Le mancava la cosa prencepale ,  
 Ch' era la mano , a ffa sti formemiente ;  
 Mperzò a r gran conzurta cennerale  
 Chiammaie tutte li Giucce cchiù ssacciente ,  
 Pe ttrovà la maniera cchiù ssecura ,  
 De nnauzà lo Castiello , e ffa le mmura .

## XIX.

N' aseno lo cchiù ggruosso , e cchiù cchiantuto ,  
 Che l' afficio facea de trommettiero ,  
 Se mese a ffa no riepeto vattuto ,  
 Che ssarria stato pe scetà n' Agliero ;  
 E , nchè da chelle bbestie fuie sentuto ,  
 Corze mmiero a la Tana ogne sommiero ,  
 A echella Tana , ch' era la riale ,  
 Addò steva la Corte prencepale .

Ac-

## XX.

Accostate che ffujeno a la porta  
 Li Ciucce cchiù ssapute, e li Dotture,  
 N'aseniello, che steva a ffa la scorta,  
 Passaie voce co ll' aute serveture;  
 E nfina po, pe ffarela cchiù ccorta,  
 Sappe lo Rrè, ca ggìa li Conzurture  
 Stevano leste; e cco na scotolata  
 De recchie, la lecienzia le fo ddata.

## XXI.

Sott' a no bardacchino de jenesta  
 Trovaieno ll' asenesca Majestate,  
 Tutto frunne de marva, e dde menesta  
 De foglia molle, e bruoccole specate:  
 Pe sceltro tenea accanto na rapesta,  
 Co dduie sciure de prato ntorcegliate;  
 E na corona, ch' era tutta chiena  
 De spiche secche d'uorgio, speltra, e bbenà.

## XXII.

Era sto bardacchino de stopore  
 Da n'arvosciello sopponentato ntutto:  
 Avea a li late, pe le dà sbrannore,  
 Doie statole de tufo miezo strutto,  
 Ch'erano la Pacienza, e lo Valore:  
 E ssott' a lloro se leggea no mutto:  
*Quanno è ttiempo de sarma, e bbuie collate;*  
*Quanno è ttiempo de cauce, e bbuie menate.*  
 Tut-

## XXIII.

Tutte ste ccose, poco juorne arreto,  
 Fatte ll'avea no cierto stodejante,  
 Che ghiea spierito trovanoo no secreto  
 Pe ppassà nnante, e ffarse li contante:  
 Ora, pecchè li Ciucce a lo ddereto  
 Nce lo mmezzaieno, voze esse galante  
 Isso puro co lloro, e a sto pajese  
 Venne, fice ste ccose, e nce le mmese!

## XXIV.

Varvajanca era Rrè, de la jennimma  
 De Paccone lo primmo, che nnascette:  
 Era tanto vecchione, e dde sozzimma  
 Nn'avea no parmo pe nfi a le ggallette,  
 Co ll'uocchie nfodarate de scazzimma;  
 E, ppe no stà a ddì tutte li defiette,  
 Avea no gran ciammuorio, che dda terra  
 No lo fa märe parti, quänno l'afferra.

## XXV.

Sott' a lo troño stea stennerecchiato,  
 Ncoppa a no campo de papagne schiuse:  
 Co le ccude seie ciucce, ch'avea allato,  
 Le mmosche, e li tavane forejuse  
 Cacciavano a lo povero malato;  
 E, pe ffarle aprì ll'uocchie, ch'avea nchiuse,  
 Da quanno nquanno co no pedetillo  
 Le faceano a lo naso n'addorillo.

Nche-

## XXVI.

Nchesto fecero facce li vecchiune,  
 E ncrinatese mprimmo pe nfi a nterra;  
 Se spartieno pe ttutte li pontune:  
 Ma, trasute che ffuieno, se nzerra  
 La porta, ch'era tutta de taulune;  
 E quatto ciucce, azzò che no le sferra,  
 La sopponaieno co li sedeture,  
 Ch'erano auto che bbarre, e mmascature.

## XXVII.

Ma che nce voze, azzò ch'apresse ll' uocchie  
 Lo Rrè, che ppropio le bbolea vedere?  
 A scarnarle sta vota le ppastocchie  
 Non sapeano che mmuodo cchiù ttenere:  
 Nce decettero ciento paparocchie,  
 Nè ll' uocchie se mettevano a ddevere:  
 Nce fecero a lo rreto na pesciata,  
 E nne trovajeno subbeto la sirata.

## XXVIII.

Apierte, ch'ebbe ll' uocchie, co le rrecchie  
 Fice primmo nà grà scotolejata,  
 Che, pp'esse accossì llōghe, e accossì bbecchie,  
 Nce voze n'anno a ffa sta recercata.  
 Raple pò la gran vocca, e le ppetecchie  
 Fice afferrà a la turba annegrecata:  
 Tossaie, rascaie, sputaie, s'adderezzaie;  
 E ppo, accossì arraglianno, spaporaje.

Fi-

## XXIX.

Figlie mieie , si avite uocchie , ggià bbedite  
La grassa de sti luoche , ch'abbetate :  
Erva no nc'è a lo Munno , che bbolite ,  
Che ccà , senza cercà , no la trovate :  
Lo ffrisco de ste ffrasche saporite  
No nce fa mmaie canoscere la state :  
Si volit' acqua , nn'esce da ste pprete  
Tanta , ch'abbasta a nc' annegà la sete .

## XXX.

No ve parlo mo ccà de la grannezza  
De st'uorte , de ste ssirve , e de ste cchiazze :  
Ste ccase noste songo na bbellezza ,  
Auto che ghire a ffravecà palazze :  
Chiste la razza nosta no l'apprezza ,  
Ma ll'ha lassate mmano a ccierti pazze ,  
Che stimmano co Giove da stà a ttuzzo ,  
E ssò ddigne de stà dint'a no puzzo .

## XXXI.

Che bboglio di co cchesto ? Aggio a ppaura ;  
Che cquarcuno no ns'aggia a nnammorare  
De ste bellizze , a ll'uocchie de fortuna .  
Si chesto fosse , che ppotimmo fare ,  
Pe nce sarvà ? Nuie non avimmo mura ,  
N'avimmo turre , pe nc' arreparare :  
Stammo dint'a na Terra , addò trasire  
Se nce pò co li carre , e cco li tire .

Mper

## XXXII.

Mperzò v'aggio chiammate a ttutte quante,  
 Pe pparlà tutte nziemo de sti cunte.  
 Penzate vuie, che ssite stodejante,  
 Comme avimmo da fa ncopp'a sti punte.  
 Stammo tutte a no riseco - Li chiante  
 Sarriano tutte quante aonite, e ghiunte.  
 L'annore mio si no ve move a nniente,  
 Mova agnuno lo suio, de li pariente.

## XXXIII.

Cchiù bbolea dì; ma accommenzaie a strèllà:  
 Aiemmè lo ventre, e cche ddolore è cchiùsto?  
 Ajuto, figlie mieie, corrite ecà.  
 Uh bbene mio, comme mme senco tristo!  
 Chesto che d'è? Mme sento già crepà.  
 Uh maro me! Faciteme no pisto,  
 Manteniteme ncaudo, ca mo moro,  
 Si priesto no mme passa st' antecoro.

## XXXIV.

Corzero tutte quante, a lo strellare,  
 Li Ciucce addottorate mmedecina:  
 Tutte le stanno attuorno, e cchi ammagliare  
 Le vò le rrecchie, e cchi vedè l'aurina.  
 Uno va da dereto, p' addorare,  
 Si ncuorpo nc'era freoma, o tremmentina:  
 Lo Rrè se spila, e ttanto fuie lo bbutto,  
 Che pparze, se spelasse no connutto.

Quan-

## XXXV.

Quando ch'esto vedie lo prattecone,  
 Ch'era de chille de la scola antica,  
 Nce rapie tanto de no cannarone,  
 E ddisse ntoscanese: Non è mica:  
 Nn'aggio sorbito cchiù dde no voccone,  
 E mme so abbisto, ch'è stata una spica,  
 Non sò, se dirmi d'uorgio, o pur d'avena,  
 Che se ll'era intralciata int' a na vena.

## XXXVI.

Questa ll'ha ffatto, col suo titillare,  
 Un certo che, comme fosse prodito,  
 E tosto ha accommenzato a stuzzicare  
 Quel doloretto, ch'adesa è ffornito:  
 Lassammolo un pochetto arreposare,  
 Che dimattina s'auzarrà spedito;  
 E 'ncaso poi, che 'l mal no la fornesca,  
 Li darem l'aria, o ll'uoglio, o ll'acqua fresca.

## XXXVII.

Tutte ll'aute dapò d'avè mbrodato  
 Chillo, che ffice la relazione,  
 E sti belle remmedie ll'avea dato,  
 Pe no nce perde de connezione,  
 Jettero mposturanno lo malato  
 Co no cierto parlà miezo cervone,  
 Ch'auto no nse sentea: Per tutti i mali  
 Questi sono i rimedj universali.

Con-



## XXXVIII.

Concruso che ffluie chesto, se sciogliette  
Ll'una e ll'auta conzurta, e cchiano chiano  
Agnuno de li viecchie se nne jette,  
Pe ttornà li Dotture lo dimano;  
E, nche ghiuorno schiaraie, se nne venette;  
Agnuno retomano retomano.  
Ma chello, che decettero lo juorno,  
Lo ssentarrite appriesso, quanno torno.

*Scompitura de l' Arragliata I.*



DE LA  
**CIUCCCEIDE**  
 ARRAGLIATA II.



**ARGOMENTO.**

**Lo** Rrè , sanato da chillo dolore ,  
 Stà a ssentì le Cconzurte , e li Dotture :  
 Chiste a pparlà se fanno poco annore ,  
 E nfra lloro se menano li ture .  
 Isso cerca accoietare sso remmore ,  
 Ma se ncanano cchiù li Conzurture ;  
 Tanto , che mmeperuto le fa fare  
 Na cauciata , e ppo se va a ccorcare .

**I.**

**N**On s'aveano scomputa de magnare  
 La paglia li cavalle de lo Sole ,  
 Pe ttornà co cchiù fforza a ttrottejare ;  
 Lo juorno appriesso , a schiude le bbirole ;  
 Nè aveano apierto li Cetrangolare ,  
 Pe bbennera l'allesse , e le bberole ;  
 Quanno li Dotturune cchiù ssacciente  
 Tornaïeno , p' appurà li spediante .

**B**

**E ttro-**

## II.

**E** ttrovato lo Rrè , ch'avea dormuto  
 Tutta la notte , e steva ggià scetato ;  
 E lo dolore , che ll'avea sbattuto ,  
 Co chillo suonno s'era padejato ;  
 Dapò d'averle fatto no saluto ,  
 Se spartieno da ll'uno , e l'auto lato ,  
 E stevano aspettanno la lecienzia ,  
 Pe pparlare , e mmostà tutta la scienza .

## III.

**E** mbè , disse lo Rrè , che s'addonaje ,  
 Ch'aveano ncuorpo rrobba da smantire ,  
 Io ggià ve disse ajere , e ve contaje  
 Tutto chello , che stistevò a ssentire ;  
 Creo , ch'avite penzato , commé maje  
 S'aggiano sti defiette da sopprire :  
 Dica agnuno de vuie , co llebertate ,  
 Tutte li muode , ch'avarrite asciate .

## IV.

**Lo** primmo , che pparlaie , fò Rrecchiardone ,  
 Ch'avea ncopp' a la capo doie recchiune ,  
 Ch'avarriano coperto no cannone ,  
 E no ciuccio co ttutte li sportune ;  
 E , pprimmo de ncegnà la lezione ,  
 Ncrinaie lo Rrè ; e ppo pe li cantune ,  
 A ttutte li compagne se votaje ,  
 Le fice no saluto , e accommenzaje .

Rrè

## V.

Rrè mmio , che cquale sì , tale te muste ,  
• Vero figlio de Giove , anze de Giove  
Sì lo figlio cchiù bbello , cchiù che ghiuste  
So sti penziere tuoie : pocca te truove  
Dint' a no matrecone de desguste ,  
Si no lo vide , primmo che te muove ;  
Mperzò dice lo mutto , ch' abbesogna  
Ngrassà lo puorco , p' avè bbona nzogna .

## VI.

La cosa è bbella , e bbona , e ss' ha da fare ;  
Ma ccà te voglio , curcio , a sta sagliuta .  
Crideme , ca starria pe te mbrogliare  
Chi tutte le bertù sa de l' aruta .  
Io , che ll' aggio voluta stodejare ,  
Pe ttutto revotanno la so ghiuta ;  
Ma veo , ca sempe cchiù cresce lo fieto :  
A ll' utemo la lasso , e mm' acquieto .

## VII.

Donca , disse lo Rrè , tu n' aie che ddire ?  
Gnorsine , isso respose , mo ve preo :  
Se porria fa sta cosa . Ma rescire  
Creo , che non pozza . Nò , ca sarria peo .  
Va chiano . Eccola ccà : Si pe ttrasire . . . .  
Ma si volesse ? Chesto no lo ccreo .  
Stà , stà : chesta va bbona . Addov' è ghiuta ?  
Uh capo mia , e ccomme si storduta !

B 2

E ggìa

## VIII.

E, ggjà cche ssi storduto, trasetenne,  
 Vavone mio, no nce stordì a nnuie puro,  
 Respose Vrennarulo: vavattenne,  
 Ca no ntennimmo sto pparlà a lo scuro.  
 N'ata vota va trova chi te ntenne,  
 O miettete a pparlà nfacce a sto muro:  
 Parla, comme se parla, e ffatte ntennere;  
 E ssi nò, datte na vota, e bbatte a mpennere.

## IX.

Vatt' a ffa strascenà ncopp' a lo Ponte,  
 Ca maie li pare mie so state mpise,  
 Repreca Reochiardone: lo si Conte,  
 Ch' a le ccetrola va mettenno assise!  
 Che bbernia è cchesta, viecchie de Caronte,  
 Stateve zitto, che ssiate accise,  
 Lo Rrè se vota tutto nforejato,  
 Jate a ffa ste cchiazate a lo Mercato?

## X.

Accossì s'accoietaie sto grà rremmore,  
 Ca, si nò, tropp' a lluongò sarria juto;  
 E lo Rrè secotaie: Faccia faore,  
 Si Vrennarulo mio, che n' aie potuto  
 Co sta gran panza padejà n' arrore.  
 A ste pparole rommanie storduto  
 Lo povero Dottore, e stie no poco  
 A ppenzà; se deze armo, e ppo die fuoco.

Che

## XI.

Che la cosa non sia deffecortosa,  
 Io no lo nneo, ne ll'aggio maie niato;  
 Mptirò chi ha studiato carche ccosa,  
 Ncoppa a lo Manuele, e a lo Donatò,  
 No la stimma accossì pperecolosa,  
 Ch'asciuttà no la pozza a uno sciato:  
 Pe cchesto mo derraggio chiaramente  
 Ll'uneco, che nce cape, spediente.

## XII.

Aggiate tutte addonca da sapere;  
 Ca conforme la paglia, quanno è bberde,  
 Si quacche rosatella va a ccaddere  
 Sott'a na parte, addò no nse nce perde;  
 Le rrecchie noste ncignano a bbedere,  
 Comm'a no peccerillo, che se sperde;  
 Po torna a ffa lo Cielo a pponejate,  
 E nne vene lo ffrisco de la State:

## XIII.

Accossì ghiusto justo sso Castiello  
 S'ha da chiantare da le ppedamenta:  
 Piglia na vreccia, o n'auto ramosciello,  
 Chiantalo, comme, schiàntano l'amenta;  
 Subbeto sentarraie no gran greciello:  
 Ma lassale ffluire, e ttu fa nfenta:  
 Secoteja a ccommattere a lo scuro,  
 Ca chiano chiano s'auzarrà lo muro:

B 2

Fauq

## XIV.

Fatto lo muro , aie da calà cchiù nn' auto .  
 Fa de st'ata manera : a cchillo fuosso ,  
 Addò cadie lo brutto eo no cauto ,  
 miettence no sospiro , comm'a n' uosso .  
 Chesto a cche sserve ? Serve , azzò carch'auto  
 No nc'aggia da trottare ; e , nche ll'aie smuosso ,  
 Eccote fatto , nnanze a ll'uocchie tuoje ,  
 Lo muro , lo Castiello , e nzò che bbuoje .

## XV.

La cosa jarria bbona , si nce fosse  
 Chi la ntennesse , disse Recchiardone .  
 Che ddice ? Vaie trovanono , ch'io te smosse ,  
 Propio ccà nnanze , brutto anemalone ,  
 Respose ll'auto : t'ammaturò ll'osse ,  
 Si mme tuorne a ffrusciare lo cauzone .  
 Stà ccà , disse lo Rrè , ve lo nzonnate ,  
 Ca sto Colleggio fenarrà a mmazzate ?

## XVI.

Miettete da sta bbanna , Vrennarulo ,  
 E nno mmoà maie l'uocchie da sta via .  
 E ttun'auto vattenne sulo sulo ,  
 A cchillo pizzo , e non di cchiù na cria :  
 Ca si ve sento cchiù , sia no gran mulo ,  
 Si no ve levo tanta vezzarria .  
 Accossì creo , che v'aggia accojetato :  
 Che ssecota a pparlare lo Scossato .

Gno-

## XVII.

Gnore mio bello, io ccà, pe ffarve annore,  
 Me nc' aggio fatto propio carrejare.  
 Tengo na' coratella, che mmo more;  
 Le rrecchie hanno nzavunorio lo mmagnare;  
 La coda s'è mpizzata int' a lo core,  
 Tanto che no lo fa cchiù ppadejare;  
 Chist' uocchio stà abbrocato; e cchisto pede  
 Stà apelato pe ll'aria, e nno nce vede.

## XVIII.

Mperzò, Signore mio, pe ve la dire,  
 Mme lo ccanosco, ca non servo a nniente.  
 Dé cchiù, a sta coscia; che mme fa sperire,  
 Na sordia mm' è bbenuta, che non sente.  
 Jere no nce penzaie: ca mbè sentire  
 Potea caccosa, si ve stea cchiù rrente.  
 No nne ntese, pe ccierto, manco sale:  
 Scusateme, ca songo n' anemale.

## XIX.

T'aggio creddeto, lebbrecaie lo Rrè.  
 E ttu mo che nne dice, Pagliariello?  
 Signore, isso respose, io, nquanto a mme,  
 Non saccio che bbò dicere Castiello,  
 Ne mmaje aggio saputo, che ccos'è.  
 Me so stato a sseccà lo cellevriello  
 Tutta sta notte, e nno nc'è stato taglio;  
 Nè nsaccio, si è cquà ppuorro, o capo d'aglio:



## XX.

Ma da ste cose no nse pò scostare ;  
 Pocc' aggio ntiso dicere , ch' è fforte ?  
 Bravo , disse lo Rrè : nce porria stare  
 Puro na cepolluzza , si pe sciorte  
 No ll' avisse nzavuorio : che te pare ?  
 Nce la voglio , diss' isso : ca de ll' uorte  
 Chesta è lo meglio sciore , e st' addorilla  
 Te fa subbeto aprì lo speretillo .

## XXI.

Si è cchesto , secotaie , no nce vo niente  
 Pe ffare sto Castiello , che ddecite :  
 Jammoncenne a scavà sti ngrediente ,  
 E ppo facimmo chello , che bbolite .  
 Mettimmo n' aglio , e ppo no puorro , e rrente  
 A cchisto na cepolla ; e , cchiste aonite ,  
 Torna da capo , e ffanne no rotiello ,  
 E bbeccote ggjà ffatto lo Castiello .

## XXII.

Scappaïeno nra resata , nche seomple ,  
 Tutte quante chill' aute Conzurturé ,  
 Tanto che Pagliariello se corrie ,  
 E sse votaie pe le menà li ture .  
 Lo Rrè se sose , ca lo ccanoscìe ,  
 E strellanno , Che rrazza de Dotture !  
 Disse : jate a ttrovare Masto Giorgio ,  
 Che cco na mazza v' arrefile ll' uorgio .

Già

## XXIII.

Già mme n'addono, ch'aggio fatto arrore  
 A cchianimareve ccà, Ciucce mmardate:  
 Bella groleia, pe ccierto, e bello annore  
 Nne pò sperà da vuie ll'Asenetate!  
 Fatevenne: no mmoglio Conzortore:  
 Fate primmo a la scola, e stodejate.  
 No lo bolite fa? no lo ffacite:  
 Quanno sò mmuorto ve n addonarrite.

## XXIV.

Mente lo Rrè co ll'autè spaporava,  
 Vrennarulo, che steva a lo pontone,  
 Guatto guatto, e dde sguinzo cammenava,  
 Pe s'accostà vecino a Recchiardone;  
 E, cquanno ll'appe a ttaglio, te le chiava  
 No paro de caucille a lo regnone,  
 Che cchillo scuro viecchio nzallanuto  
 Cadde de corpo nterra addebboluto.

## XXV.

Nche se votaje, e bbedde lo prefato,  
 Che se nne jeva pe li fatte suoje,  
 Jetta no strillo: Ha rrutto lo mannato,  
 Si Mà, sta bbestia nnanze a ll'uocchie tuoje.  
 Uh maro me, mm ha tutto sdellomnato,  
 Che no nce fosse venuto ccà oje.  
 Ma nce corpa la troppo confedenzia,  
 Che bbuie le date, a ffa sta mpertenenzia.

B S

Uh

## XXVI.

Uh sfortunato, addove so arredutto!  
 Disse lo Rrè? chi mme l'avesse ditto;  
 Mm'avesse primmo rutto no presutto,  
 Che bbenì a ffà st'afficio mmarditto.  
 Dapò, che mme so acciso, e mme so strutto,  
 Pe ssarvà de li ciucce lo deritto,  
 Mme sento dire nfacce da no mpiso,  
 Ca nce corp' io a ffarel' esse acciso.

## XXVII.

Ma mo ve servò io. Chiammate ccà  
 Sso tierzo de sordate, che stà fore.  
 Da chiste mo ve voglio fa mmezzà,  
 Comme mm'ha da trattà no servetore.  
 Vennero st' auti ciucce; e disse: Eilà,  
 Facite no carizzo, ma de core,  
 A ttutte sti Dotture nzallanute;  
 Mparatele no poco la vertute.

## XXVIII.

Lloco vediste li Dotture a rrolla,  
 Ch'ogne ssiesco de cauce, che mmenavano.  
 Sti sordate arraggiate, int' a la folla,  
 A li felierte, te le sdellommavano;  
 E, mmente ll'uno tira, é li auto molla,  
 A uno a uno te l'ammatoravano,  
 Senza fa cunto de lo preveleggio,  
 E accossè se scompette sso Colleggio.  
*Scompetura de l' Arragliata II.*

DE LA  
CIUCCEIDE  
ARRAGLIATA III.



ARGOMENTO.

*Mente lo Rrè stà chino de penziere ,  
Nzuonno Sello lo va a cconzolare ;  
Le dice , addò ha da ire , pe ssapere  
Da n'Aracolo chello , ch' ha da fare .  
Isso se sceta , e dda li Trommettiere  
La Guardia de lo cuorpo fa chiammare .  
Vene chesta de pressa , e passa mosta :  
Isso va mmiezo , e a Lettere s' accosta .*

L

*Non restano accossì spatolejate .  
Le ffrunne tennerelle de le bbite ,  
Quanno de Maggio le grannenejate  
Scioccano da lo Cielo , comm' antrite ;  
Comme restaieno tutte sdellommate  
Sti povere Dotture saporite ,  
A li cauce , a li muzzeche , a le bbotte ,  
Che l' ammallaino , comm' a mmela cotte .*

B. 6

Ma

## II.

Ma lo Rrè chella sera se corcàje,  
 Senza manco provà no po de paglia,  
 Sempe decenno: Uh maro me, e che gguaie  
 E dd'avè a pprattecà co sta canaglia!  
 Tata mio, no mm'avisse schiuso maje,  
 Pocca mm'avive a mmette a sta vattaglia.  
 Va te fida a sti vecchie nzallanute,  
 Ca sì arrevato. So cchiaiete scompute.

## III.

Jeva pe ppeglià suonno; ma va serra  
 Ll'uocchie, quanno staie chino de penziera.  
 Già le pareva vedè dint' a la Terra.  
 Arme, cavalle, sordate, e bbannere:  
 Già sentea lo fracasso de la guerra:  
 Già bbedea puoste a ffuoco li quartiere;  
 E isso mmiezo, comm'a no paputo,  
 Strillà soccurzo, e non trovare ajuto.

## IV.

Puro gira da ccà, vota da llà,  
 Tanto stentaie, che se mettìe a ddormì;  
 Ma non tanto le venne a rronfejà,  
 Che se vedette nnanze comparì  
 No vecchieriello, che, pe ccammenà  
 Co lo comodo suo, quanno vo ascì,  
 Jeva assertato ncopp' a n' aseniello,  
 Tanto ammanzuto, che pparea n' agniello.  
 Var.

## V.

Varvajanca lo Rrè , nche lo vedle ,  
 Pareva , che le facesse alleverenzia :  
 Pocca , senza parlà , lo canoscìe  
 A cchillo tardo moto , a la presenzia ,  
 Ch'era Sellenò , che , nfra ll'aute Ddie ,  
 Sa craaccà li ciucce p'azzellenzia ;  
 E , pecchè ssempe ll'ha bboluto bbene ,  
 Le ddefenne , e ncovierno se le ttene .

## VI.

Arrevato , che finie lo vecchiarìello ,  
 Rapìe chella vocchella saporita ,  
 E ddisse : Varvajanca poveriello ,  
 Ccà sò bbenuto , pe te dà la vita .  
 Ma tu puro si stato n'aseniello ,  
 A nno mmenì a ttrovarme a la meschita .  
 Vieneme trova llà , ch'avarraie gusto :  
 Non dobbetà , viene a ttrovà sto fusto .

## VII.

Non tanto ste ddi chiacchiare scompette ,  
 Che bbotaie vico , e sse l'appalorcìaje .  
 Fremma , Sellenò , fremma , e cche facietto .  
 Ch'accossì mo mme chiante , e tte nne vaje ?  
 Torna ccà , lo Rrè nzuonno le decette ,  
 Addò vaie co la bbestia ? Vi che ffaje ?  
 No nme lassà , de razia , accossì ppriesto :  
 Tornate arreto , e ccontame lo riesto .

Aspet-

## VIII.

Aspetta, ca m' torna . Era ncocciato.  
 Lo vecchiacone , e sse l' appalorciava.  
 Tanto , che isso mmederse abbannonato,  
 Co la vocca pareva , che l' afferrava  
 La coda de lo ciuccio ; ma lo sgrato,  
 Co tutto chesto , puro trottejava .  
 Isso a tterare , e cchillo a ccammenare ,  
 Tanto che stracquo se venìe a scetare .

## IX.

Se sceta , rape ll' uocchie , e cche bbedette ?  
 Doie cude co la vocca tenea strente.  
 De duie de chille ciucce , ch' io decette ,  
 Che , ppe caccià le mmosche , tenea rente-  
 Mmederle , tale risa le venette ,  
 Che sceppà le potive nzi a li diente ;  
 Ma chille scure steano a no pontone  
 Parute , ch' era na compassione .

## X.

Comme a no peccerillo , che sperduto  
 Va pe ddinto a la ccammare a la scura ;  
 S' uno dice : Mo vene lo paputo :  
 Eccolo llà , mo scenne pe le mmura .  
 E dde bbotta l' afferra ; sorrejuto  
 Te lo vide restà pe la paura ;  
 Si mbè corre la mamma , e l' accarizza ,  
 Manco abbasta a llevarele la mpizza .

Ac-

## XL.

Accossì li dñie ciucce sbentorate  
 Restaïeno, pe lo jajo, addebboolute.  
 Lo Rrè, che nn' avea propio na piatate,  
 Cercava de darl' armo; ma, perdute  
 Erano, tutte quante ste pparlate,  
 Ca da lloro manco erano sentute;  
 E, ppe paricchie juorne, nche bbedevano  
 La facce de lo Rrè, s' addebboleivano.

## XII.

Ma lo Rrè, ch' avea pressa de sentire  
 Da chillo vecchiarìello la risposta,  
 Fece subbeto subbeto, allestire.  
 La compagnia de ciucce, fatt' apposta,  
 Pe te l' accompagnà, quanno vo ascire.  
 Vennero chiste, e agnuno passaiè mosta.  
 Nnanze a isso, se mesero a ffelera,  
 E ncignaieno a passà de sta manera.

## XIII.

Mprimmo mprimmo venea no ciucciariello  
 Quant' a no sardagnuolo peccerillo,  
 Chisto servea, comm' a no paggetiello  
 De scuto, o de bbalice, manze a cchillo,  
 Che guedava st' aserzeto noviello:  
 Da ccà, e dda llà zompava, comm' a ggrillo,  
 E ffacea cierti saute mortale,  
 Propio, comm' a no ciuccio, senza sale.

Ap—



## XIV.

Appriesso a cchisto , co na gran sodezza ;  
 Venea lo Caporetana rejale .  
 Nn' aveva carreato de monnezza  
 Sso ggentelommo , quanno stea spetale !  
 Va te lo vide mo , comme se spezza :  
 Pare , che ssia a lo Rrè frate carnale .  
*La lotamma porzi se mettè n'auto ,*  
*Quanno vede , ca fummecca , e bbà n'auto*

## XV.

Secotejava po na manejata  
 De guastature , e dde sommozzature .  
 Ssa razza era la cchiù desgraziata ,  
 Pocca n' avea nè ammice , nè favure .  
*Maro co cchi la sciorta stà mperrata :*  
*Ca , fa che bbud , stà sempe a li calure :*  
 Ma , pe ppotè sapè che bhanno a ffare .  
 V'aggio primmo na storia da contare .

## XVI.

Nc'erano a cchille tiempe certe aosanze ,  
 Che li ciucce tenevano pe legge ;  
 Certe rregole a pparte , e ccostomanze ,  
 Che nnuie mo le lleggimmo pe ddelliegge .  
 De chesse , addove fa de le ccrejanze  
 Lo Calateo , cchiù dd' una se me legge ;  
 Comm'è cchella , che , quanno hanno scòputo  
 De pescià , fanno a Giove no saluto .

Com-

## XVII.

Comm' a cchesta era chella , ch' ordenava ;  
Che n' avesse potuto tornà arreto  
Lo Rrè , quanno co spanfio cammenava.  
Ma lo motivo de sso gran secreto ,  
Studia nzò , cche bbuoie , ca no nse scava.  
Vasta ; nce steva apposta no decreto ,  
Pe ssapè , che s' avea da prattecare ,  
Azzò st' arrete non s' avesse a ffare.

## XVIII.

Decea sto gran decreto chiaro chiaro :  
Si se scontra erva , o spina pe la via ;  
Che s' annetta , e sse leva ogne reparo .  
Si carche ffuosso , o matreco nce stia ,  
Che ssubbeto s' acchiana paro paro .  
Pe ffa chesto , nce stia na compagnia ,  
P' annettà , e ppe llevà , de guastature ;  
E pp' acchianare , de sommozzature .

## XIX.

Appriesso po la pratteca mostava  
De se servì de sti commannamente :  
Si truove ll'erva , o spina , che se scava ,  
Pe nfi a lo radecone co li diente .  
Si truove quarche ffuosso , o quarche ccava ,  
S' enchia de ciucce vive , ca n' è niente ;  
E agnuno , ch' àvarrà st' afficio a sciorte ,  
Corra , da vero ciuccio , a sta gran morte .  
Sto

## XX.

Sto correre mperò, che se conceda  
 A ognuno, nvita soia, na vota schitto:  
 Che si uno se jetta, e le socceda  
 De nn'ascì vivo da no fuosso astitto,  
 N'aggia cchiù sta fortuna, e nno nse veda  
 De nuovo a ffa st'afficio costritto;  
 Anze, si mhè lo Rrè lo ccommannasse,  
 Che mponta co li piede, e nno nce passe-

## XXI.

Chist'era lo decreto, e non s'è smuosso  
 Da capo de li ciucce ancora ntutto:  
 Pecta nzì a mmo, si cade int'a no fuosso  
 No ciuccio, e nn'esce co cquarch'uosso rutto;  
 Tu le puoie tornà a rrompere n' at' uosso,  
 Ca no nce torna, addò pegliaie lo bbutto.  
 Si no lo ccride, fallo, e bbì si passa:-  
 Tu lo puoie scortecà, ca no nse lassa.

## XXII.

Ma tornammo a lo Rrè, che, ggìà passate  
 Sse catervie de ciucce lazzarune,  
 Se nne veneva miniezo a li scrdate  
 Cchiù bbrave de lo regno, e pprattecune.  
 Chiste pe mmozzeccà, e ffa a ccauciate,  
 N'aveano pare. Bell'anemalune!  
 Va le ccerca a lo Rrè, ca no le ccagna  
 Manco co Arlanno, o co Alisanthro Magna.  
 Nnan-

## XXIII.

Nnanze a isso noe jea na manejata.  
De musece de funno , e ssonature ,  
Che ffaceano nconzierto n' arragliata.  
Co ttanta gargariseme , e ffigure ,  
Che le ffrotte , che bbanno pe la strata ,  
E ttutte l'Accademmie , e pprofessure ,  
A cchi sto canto avesse maie sentuto ,  
Pararriano no trivolo vattuto .

## XXIV.

Da ccà sentive auzà no sopraniello  
Na vocella de zuccaro argentina ;  
Da llà no bbascio , che ghiev' a cciammello ,  
Te ntronava da vascio a la cantina :  
N auto facea no trillo a ssosamiello ,  
Che se sentea sagli pe le stentina .  
Da chiste aonite po , vi che ffracasso  
Nne potea nasce maie , e che sconquasso !

## XXV.

Ma chi pò maie contà , che te facevano  
Li stordemiente , che l' accompagnavano ?  
Cierte arraglià a la stesa se sentevano ,  
E cciert' aute pegliavano , e llassavano ,  
Chi sottile sottile se nne jevano ,  
E cchi ll'aria , e li munte te ntronavano .  
Nzomma faceano no fracassatorio  
Da nzallanire no Konzervatorio .

Mmie-

## XXVI.

Mmiezò a lloro lo Rrè jea cammenanno  
Ncoppa penziero, e mmanco le ssenteva.  
E a Lettere se jeva abbecenanno,  
Addò Sellenò co lo tempio steva:  
S' accostaie tanto, che si stea parlanno  
Uno llà ddinto, puro se senteva.  
Ma la Musa già mponta, ch'è stracquata:  
Fremmammonce, e scompimmo st'Arragliata.

*Scompitura de l' Arragliata III.*

DE LA  
CIUCCCEIDE  
ARRAGLIATA IV.



ARGOMENTO.

*Lo Rrè ttrase a lo tempio , e stà aspettanno  
L'Aracolo , che ll'aggia a cconzolare :  
S' accosta a no pertuso , aosolcjanno  
Chello , che dda llà ddinto ha da scappare.  
Sbotta no viento , e bbà mbrosolèjanno  
Certe ccose mbrogliose , che rrestare  
Lo fanno nzallanuto ; e ppo se nn' esce  
Mmalorato , ca niente nne capesce .*

L.

**E** Ettere è no paese acconciolillo ,  
Che ppoco se descosta da Gragnano ;  
Tanto , che ssi nce va no peccerillo ,  
Magnanno la marenna chiano chiano ,  
N' ha sciso ancora ll'utemo morzillo ,  
Che ll' è ncuollo , e lo tocca co la mano :  
Schitto nce stà no po de montagnella ,  
Ch' a ssagli , te fa fa na sodatella .  
Ncop-

## II.

Ncopp' a la cimma, dinto a no scarrupo;  
 Nce stà, comm' a na stalla de campagna,  
 Ch' è nchiusa da no vosco cupo cupo,  
 Che no ll' asce, si n' aie chi t' accompagna.  
 Ccà no nce siente maie strille de lupo,  
 Ma sulo carch' auciello s' appapagna;  
 Carch' auciello de chille desperate,  
 Che bbanno, pe ffuì le scoppettate:

## III.

Nc' era dinto a ssa stalla, ch' aggio ditto,  
 Na statoa de Selleno vecchiarriello.  
 Chi nce l' avesse posta, pe dderitto  
 No nse potea sapè. No contariello  
 Sulo da tanno se trovava scritto,  
 Che pportata ll' avea no cierto auciello;  
 Ma quanno, e ppe cche ffine, e ppe cche ccosa,  
 No nne parla lo Tiesto, e nno la Grosa.

## IV.

Chesto sulo vastava, azzò che cchille,  
 Ch' erano, comm' a ll' aute, anemalune,  
 Mpriezzo se la tenessero: e bba dille,  
 Ch' erano belle chiacchiare, e ccanzune,  
 Ca nfacce te scioncavano; li strille  
 Levano abbista pe li torrejune,  
 E ncignavano a ffare na revota.  
*Quanto fà la gnoranzia quarche bbota!*

## V.

Ora, pe non sapè, da do venuta  
 Fosse chella, a lo mmanco se credevano;  
 Che ffosse da le nnuvole caduta,  
 Pe l'abbesuogne, che le ntravenevano;  
 Tanto, che s'uno pateva de caduta,  
 O l'afferrava pantaco, correvano  
 L'ammice, li vecine, e li pariente  
 A cchisto luoco pe mmedecamiente.

## VI.

Era pe cchestò tanto vesetato,  
 Che no nce stea chi no nce fosse juto  
 Ogne mmese a lo mmanco, e cche pportato  
 No nc avesse caccosa pe ttrebuto:  
 Anze nfi a mmo scordà de lo ppassato,  
 Pare, che no nse ponno; e nn è bbenuto,  
 Ca pe nfi a oie (e nce porria scommettere)  
 Ll Asene de Gragnano sanno Lettere.

## VII.

Sto luoco, ch'era primmo no stallone,  
 Pe cchella statoa, tempio arreventaje:  
 Pocc'aveva na gran connessione,  
 Co cchella smorfia, che se nc'adoraje.  
 Otra ca po, pe cchillo vecchiacone,  
 Cchiù bbello luoco non potive maje  
 Trovò meglio de chisto, addò s'asciava:  
*Talc 'Ddio, tale Tempio mmeretaya.*

Era



## VIII.

Era chesta na grotta scura scura,  
 Na cosa longa longa, e nnera nera;  
 Ch' uno no nce starria pe la paura,  
 Si mbè fosse fojuto da galera;  
 Ummeto, che cchiovevano le mmura:  
 Friddo, che t'agghiacciava na vritera:  
 Parea la casa de li scarrafune,  
 La vera grotta de li sportegliune.

## IX.

Ecà trovave na chelleta de paglia;  
 Llà mpontave de fieno a no mmattuoglio:  
 Ive cchiù nnanze, e ppegliave na quaglia,  
 Ma molla molla, e lliqueta, comm' uoglio:  
 Tornave arreto, e nfacce a na moraglia  
 Nc asciave ammontonato n' auto mbruoglio,  
 Nzomma, vota da ccà, ggira da llà,  
 O paglia, o stronza avive da trovà.

## X.

Dint' a sta grotta., ncopp' a no montone  
 De tutte sse schefienze, e ppretecaglie,  
 Nc' era na statoa, azzoè no mammone,  
 Comm' a cchille, che ttruove a ss' antecaglie:  
 Chesta avea, nnantemmonia, no varvone,  
 Ch' agne ppilo parea na nzerta d' aglie;  
 No le speccecarriano na settimana  
 Tutte chille, che ccardano la lana.

Nca-

## XI.

Ncapo avea na corona storcègliata  
 Tutta de talle, e ppampane de vita;  
 Da sotta la teneano sopponentata  
 Doie recchiune de ggenio, fatte a bbità.  
 Tenea po na nasella sprofelata,  
 Che te terava, comm' a ccalamita,  
 Chiatta, corta, ammaccata, e cco ddoje nozzole  
 Tanto aggarbate, che ppareano vozzole.

## XII.

Da la cintura abbascio, justo, justo  
 Te pareva no voje speccecato:  
 Da le ggamme, a le ccosce, nzià lo bbusto  
 Era tutto de pile arragamate,  
 E pp' ogni pparte le colava musto.  
 Duie piede avea, ch' agnuno era spaccato,  
 Comme ll' hanno li piecore, e le ccrape;  
 Ma chiatte, e ttunne, comme so le rrape.

## XIII.

Tenea accanto no bello ciucciariello;  
 Che pparea, le facesse no resillo:  
 Aveva n' uocchio tanto cianciosiello;  
 Che ll' avarrisce dato no vasillo.  
 De Lucca te pareva no cacciottiello,  
 E pproprio arresegnav' a no nennillo,  
 Co na codella tanto aggraziata,  
 Che pparea sangozuca speccecata.

G

Lp

## XIV.

Le ccose po, ch' avsa Sello no fatte,  
 Pe ssarvà carche ciuccio, e ddarle ajuto,  
 Erano le cchiù belle, e scontrafatte,  
 Ch' uno de vuje avesse maie sentuto;  
 E ssi mbè tanno, puro da le ggatte,  
 Agnuno de ssi cunte era saputo,  
 Nc'era llà ddimo n' aseno vecchione,  
 Che le ccontava co ddestenzione.

## XV.

Chisso decora, ch' a ttempo, che l'anguille  
 Scappaeno da lo maro a ll' acqua doce,  
 Nc'era no ciuccio, che li peccerille  
 Ll'aveano mballanuto: ad auta voce  
 Chiammaie Sello no, e fice tanta strille,  
 Che cchillo, pe non farlo morì nfoce,  
 Mannaie li lupe, che se lo magnaeno,  
 E accossi chille cchiù no lo frusciaeno.

## XVI.

E ppoco appriesso, quanno po l'antrite  
 S'accommenciaeno a ffa da le nnocelle,  
 Nce nn'era n'auto carreo de vrite,  
 D'arciole, de pegnate, e d'arvarelle;  
 Pegliaie no nciampecone, e trutte aonite  
 Fice na pizza de ste scartapelle:  
 Chiammaie Sello no, pe n'esse amballato  
 Da lo patrone; e mmorì derropato.

N'ata

## XVII.

N'ata vota , a lo tiempo , che bbolava  
 La quaglia , e tterra terra se nne jeva  
 No ciuccio , che ttantillo zoppecava ,  
 Pe na mpolla a no pede , che tteneva ,  
 Jette a Selleno , e mmente lo pregava ,  
 Se vedeva la mpolla che ccresceva ;  
 Po se fice no cancaro , ch'a rrolla  
 Mannaie lo ciuccio ; ma passaie la mpolla.

## XVIII.

De cheste nne contavano a mmeagliara  
 Tutte li ciucce , e cchiù sto Cecerone ;  
 Ma la cosa , ch'aveano pe cchiù rrara ,  
 E ddeva a ttutte quante apprenzione ,  
 Era , ca da lo ciuccio chiara chiara  
 Ascea da quanno nquanno na vocione ,  
 Che rresponneva a cchi lo nterrogava ,  
 E nzò , ch'uno volea , t'annevenava .

## XIX.

Nzomma , era pe n'Aracolo tenuto  
 Sso ciuccio da li ciucce ; e nnon passare  
 Potea no juorno , che non fosse juto ,  
 Carcuno llà , pe ffarse annevenare .  
 E issò , bello , dapò avè sentuto  
 Chello , che le venevano a ccercare ,  
 No le faceva perde lo vejaggio .  
 De la manera , che ve contarraggio .

## XX.

Tanno ancora no ns' erano accacciate  
 Chelle bbernie, che mmo songo scompute;  
 Chelle schefienzie, che l' antechetate  
 Tenea co ttanto studio annasconnute:  
 E nniette niette nc' erano ncappate  
 Chille, che te faceano li sapute.  
*Chi vo arrevà a ssapè cchiù, che non pote,  
 Va de facce a na chiaveca a le bbpte.*

## XXI.

Pe cchesto, nfra li ciucce non s' aosava  
 Chello, che cco le ffrunne se faceva:  
 Ive a no tempio, e uno te cacciava  
 No sportone de frunne, le mmetteva  
 Tutte a ffelera, e ncoppa nce stampava  
 Chello, ch' Apollo dinto responneva:  
 Venia lo viento, e cco no scosta scosta,  
 Nnè portava le ffrunne, e la risposta.

## XXII.

Manco nc' erano tanno le Ssebbille,  
 Che te faceano mettere a ppaura:  
 Le bbedive ngrefà co li capille,  
 Quanno se le ppegliava la ffortura;  
 Ll' uocchie te strevellavano, e cco strille  
 Correvano sbattenno pe le mmura:  
 Po jeano pe pparlare, e bommecavano  
 No varrire de seccia, e tte mpestavano.  
 Ch'era

## XXIII.

Ch' era addonca sto muodo accossì bbello,  
 Ch' avevano li ciucce a sso pajese?  
 Nn' avevan' uno, ch' era no giojiello,  
 Che, senza farle spenne no tornese,  
 Senza farle votà lo cellevriello,  
 Se sprecava a no muodo assaie cortese:  
 Si sapè veramente lo volite,  
 Facite facce, ca lo sentarrite.

## XXIV.

Stea dereto a lo ciuccio no pertuso;  
 Addò s'avea da mettere lo naso:  
 Da chisto asceva, quanno forejuso  
 No ventariello, e cquanno adaso adaso;  
 Ma sempe ll'uno, e ll'auto era addoruso,  
 Mo d'aglio, mo de puorro, e mmo de caso:  
 Parlava chiaro, quanno ascea co fforza;  
 Quanno nò, lo sentive scorza scorza.

## XXV.

Varvajanca lo Rrè, che lo ssapeva,  
 Ca se nc' er' addonato ll'anno arreto;  
 Arrevato a lo tempio, le pareva  
 Mill'anne de sorchiarne carche ffieto;  
 E, bbotato a Selleno, le deceva,  
 Che ll'avesse sprecato lo secreto;  
 E, ggìa che ll'avea fatta la mprommessa,  
 No nce ll'avesse resoluta a bbessa.

C ;

Po ,

## XXVI.

Po, non potenno echiù, jette da bbetta  
 A schiaffà naso, e mmusso a lo pertuso;  
 E stea tutto sorriesseto da sotto,  
 Aspettanno lo viento forejuso.  
 E ffacea nfra de se: Ah ah, mo sbotta!  
 Mo se me vene! Viento mio piatuso,  
 Jesce viento mio bello, jesce ccà ffore,  
 Conzolame ssa naso, e cchiù sto core.

## XXVII.

Quanno ncuorpo a lo ciuccio, a mmano manca,  
 Accommenzaieno a bbolle li decrete.  
 Allerta; apre ssa vocca, Varvajanca,  
 No nte le ffa scappà ste ddoie mofete:  
*Se bramate d'aver ciò, che vi manca;*  
*Andatene a chi manca ciò, ch' avete.*  
 Nzerra mo, Varvajanca, agliutte forte?  
 Che ppuoie sapè si torna echiù sta sciorte?

## XXVIII.

Accossì fuie l'Aracolo, ch'asclè  
 Da cuorpo a ll'aseniello; ma restaje  
 Ncanna a lo Rrè, che no nse lo pote  
 Agliottère sta vota. Quanno maje  
 Parlaie sto ciuccio, che no nse sentie,  
 E ccosa accossì scura le-scappaje?  
 Venite n'ato juorno a ffarme razia,  
 Ca po ve contarraggio sta desgrazia.  
*Scompetura de l'Arragliata IV.*

DE LA  
**CIUCCEIDE**  
 ARRAGLIATA V.



ARGOMENTO.

*Li ciuccè vann' attornu corejuse ,  
 Pe ssapè , c' ha lo Rrè , che stà n'zorfato ;  
 Fanno rotiello , e rrestano confuse  
 Nsentire nò cannone , ch' è sparato :  
 Fanno nò serra serra , e stanno nchiuse ,  
 Che pparea ggjà lo Munno arrebotato .  
 Lo Rrè , p' accojettare sto remmore ,  
 Esce , e bbà , somm'a pparzo , pe llà ffore.*

I.

**C**omm'a nò peccerillo , c' ha abbistato  
 Na lacertella dinto a nò pertuso ;  
 Mpizza la mano , e ecaccia ntorcigliato  
 No serpe , che Hà ddinto stea annascuso ;  
 Resta lo scuro tanto storzellato ,  
 Che rraspannosè tutto lo caruso ,  
 Non sap'isso mmedesemo che ffare ,  
 Non ha mane' armo de se la felare.



## II.

Accossì mmo lo Rrè, che forejuso  
 Lo naso llà ddereto avea mpizzato;  
 Restaie tutto no piezzo, e stea confuso;  
 Senza sapè addò steva, e cch'era stato:  
 N'avea core tirà da lo pertuso  
 Lo naso, pe ppeglià no po de sciato;  
 E stea aspettanno, si carch'auto fieto  
 Le mmoccasse cchiù mmeglio sto decreto;

## III.

Nce stie no piezzo, ma lo ciucciariello  
 Era ntufato, e nno nse scommoveva;  
 E sse sentea sghizzà lo cellevriello,  
 Che ggìa tutto mpestanno se nne jeva.  
 All'utemo penzaie lo poveriello,  
 Ca morea nfoce, si llà cchiù nce steva;  
 Tiraie lo naso, ascie chiano chianillo,  
 Pigliaie sciato, e ss'aprie lo speretillo;

## IV.

Po, senza manco di comme, nè cquanno,  
 Senza manco votarese da reto,  
 Se nn'ascie fore; e ghiea sempe penzanno,  
 Si potea dà de musso a cchillo fieto:  
 E cchille, che lo stevano aspettanno,  
 Pe ssapè lloro puro quà ssecreto,  
 Vedennolo venire accossì affritto,  
 Passanno, s'allargaieno, e stieno zitto.  
 E ppe+

## V.

E pperute perute s'abbiaavano  
 Appriesso a isso, pe se nne tornare;  
 Non moveano la coda, e ccammenavano,  
 Comm'a papute, senza pepetare;  
 E ppe tutte li luöche, addò passavano,  
 Non canosceano ammicce, nè ccompare:  
 levano comm'a ttanta connannate  
 Ngalerà mamita, ch'era na piatate.

## VI.

Arrevate che ffuieno, se nne jette  
 Lo Rrè a la tana deritto deritto;  
 E, ssenza dī bonnì, se nne trasette  
 A ttrovà la lettèra zitto zitto:  
 No mmagria, non bo veverè, e sse mette  
 A ppenzà a cchello, che ll'è stato ditto:  
 Non ppenza a cchille, che le stanno attuorno;  
 Non bedè manco Proceta, o no cuorno.

## VII.

Avite visto maie no passariello,  
 Ch'into a no caravattolo è ncappato?  
 Cala la coda, e a cchillo fenestiello,  
 Da dò pegliaie lo bbutto; stà ncantato:  
 Si mbè vaie pe le dà carch'aceniello,  
 N'apre lo pizzo, tanto stà stonato.  
 Accossì stea lo Rrè, sempe penzanno  
 A cchillo fieto, a cchillo gran malanno.

C 5

E dde-

## VIII.

E ddecea nfra se stisso: E' na gran cosa  
 Sta chelletta mmardetta, ch'aggio ntiso!  
 N'ha avuto maie besuogno de la grossa  
 Sso fieto, ca, nch'è sciuto, se n'è sciso;  
 E mmo che ll'è afferrato? Va arreposa  
 Co sto pinolo ncuorpo, che mm'ha miso!  
 Selleno, e ch'aggio fatto, ch'a mme ssulo  
 Mm'aie da trattare propio da cetruolo?

## IX.

Ma che ppò esse maie? N'arrivo a ~~stennere~~  
 Comme sta cosa se pò maie sprecare.  
 Che nce manca? La mano. E, ssi pretendere  
 Volimmo ajuto, avimmo da cercare  
 N'auto a cchi puro manca? E bbà a cōprenere  
 Sto trase, e jesece. Comme pò ajutare,  
 A cchi no nsa addò mettere lo pede,  
 Uno, che non ten'ucchie, e nuo nce vede?

## X.

Chiano. Non ha dirt'isso veramente:  
 Pe trovà chello, che bbuie pretendite,  
 Jate a trovà chella razza de ggente,  
 Che n'hanno mano; ma, si lo bbolite,  
 Jate addò chillo, che non hanno niente  
 De chello, che pportate, e cche tenite.  
 Accossì ha dditto? Accossì ppropio: e bbia,  
 Chessa è la via de mme fa i mpazzia.  
 E ccom-

## XI.

I

no

## XII.

Cheste, e cciento aute ecosa, mano mano,  
 Passavano pe cuorpo a Bbarvajanca,  
 Pe bbedè de potè caccià le mmano  
 De chello, c'ha no ciuccio, e a n'auto manca;  
 Ma no nce dea de cuorpo, e echiano chiano  
 Nce nne vennero tanta, a bbranca a bbranca,  
 Che, a lo rreto, la panza l'abbottajeno,  
 Comm' a ppallone, anzi che ne scappajeno.

## XIII.

Ma, si lo Rrè faccia sti canolicchie,  
 Chill' aute, che ll'aveano accompagnato,  
 Nne faceano castielle! E ggià paricchie,  
 La stessa notte, aveano accommenzato  
 A ffa rotielo; e tutte, comm' a ssicchie  
 Spertosate, scorreano: Che d'è stato,  
 Decea lo primmo, che lo Rrè marfuso  
 Se na' è mornato, e subbeto s'è achiuso?

C 6

Mo

## XIV.

Mo te lo ddico io, deceva n' auto :  
 Isso penzava a ffa morà sta terra ,  
 Comme sapite , e mmetterse cchiù n'auto.  
 Sello ha dditto: E t' malan, che t' afferra,  
 Tu si bbecchione , e te vuois mette nzauto ?  
 Ogge, o craie criope , manca chi la serra ?  
 Donca nce lo levammo già da tuorno ?  
 E' ffraceto, non campa pe nà a ghiuocao.

## XV.

Poveriello ! Perdimmo no gra Rrè !  
 Nè nce nne venaranno cchiù de chiste.  
 Pò esse, che no mmora . E ghiuto , tè ,  
 Nce ll' ha dditto Sello . E lo ssapiste ?  
 Oh , chillo mo , che ll' ave ditto a mme .  
 Gioja mia , no mme quaglia . E nnon bediste .  
 Comm' ascie nzallanuto ? Che ppe cchesto ?  
 Uppola , craie lo bbide priesto priesto .

## XVI.

A n'ata bbanna s'erano addonate  
 Ciert' aute , che ffaceano li sapute ;  
 E nce stanno de chille sbentorate ,  
 Ch' a lo Collegio fujeno vattute ;  
 E ddeceano : Già ssimmo arrojenate .  
 Uh poverielle a nnuie , simmo spedute .  
 Quarche gran guerra va pe lo taoliere ;  
 E ssensite , si è ghiusto lo penziero .

Quan-

## XVII.

Quanno maie so bbenute ssi golie ,  
 De fa , a lo Brè , ste mura , e sto castiello ?  
 Caccosa nc' è ! Chi sa , si chelle spie ,  
 Che mann'attorno , o puro quarch'auciello  
 Ll'avarrà dditto , ca pe ccheste bie .  
 A fravecà se ncigna quà bbsciello ?  
 Adde : è ghiuto a Selleno , e nn'è tornato ,  
 Comm'agnuno ll' ha bbisto , dasterhato .

## XVIII.

Ll'avarrà dditto , ca già li nnemmice ,  
 Comm'a rrasulo , se songo ammolate ,  
 Pe nce scapozzà a ttutte , comm'alice .  
 Poverielle a nnuie aute sfortonate ,  
 Addò jarrimmo ? Va a trovà cchiù ammice ,  
 Va trova cchiù ppariente , nzanetate !  
*Ca , quann'uno è ncappato a na desgrazia ,*  
*Pò sperì , ca no nc' è na bbona razia .*

## XIX.

Accanto a lloro s' era , chiano chiano ,  
 Fatto n' ato rotiello corejuso .  
 De ciucce cchiù gnorante , e bbscia mano ,  
 Che mmetteno lo nase a ogne pertuso :  
 Chiste , ch'erano mo de quatt' a ggrano ,  
 Nzentire sto pparlà , ccossì spantuso ,  
 S'aggliottieno la cosa de la guerra ,  
 E la corzero a spanne pe la Terra .

Non

## XX.

Non sapite? Che d'è? Passammo guaje.  
 Veramente? Accossì fosse boscia.  
 E ceh'è stato? Jere appunto, 'uno scontraje,  
 Uno de chille, che fanno la spia  
 Pe tutte sti contuorna; e mme contaje,  
 Ca veneano volanno, chesta via,  
 Tronta vascielle, chine de cànnune,  
 E menecano cavate li focune.

## XXI.

No mme di niente, respooneva n'auto,  
 Ca ll'ato juorno io paro le bbedene.  
 Frate mio, comme correno l'ogne ssanto,  
 Che fanno, è mmiezo ruotolo. Me jette  
 A scarrecà ncopp'a no' poco d'auto,  
 E nne vedie na mmorra, che bbenette  
 Propio, addò steva; e ghie pe la paura  
 Tanto, che ffeto, comm'a la fortuna.

## XXII.

Si è cchesso, so arrevate? N'ata vota?  
 E ll'aie viste tu propio? Co cchist'uocchie.  
 E mmo addò stanno? Va te le rrevota:  
 Int'a ste ssirve, e ppe sti carafuocchie.  
 Uh mar'a muie, nce mettarranno mmota,  
 Nche schiara juorno! E chilli belli truocchie.  
 De fieno addò jarranno? So pperdute.  
 A cchesso pienze? Nuie già simmo jute.  
 Men-

XXIII.

Mente sto fucce s'era già allommato,  
 Lo Rrè, che stea co cchillo gran panzone,  
 Che v'aggio ditto, se sentie no frato:  
 Auza na coacia, e ffa no pedetone  
 Accossi ggruppo, accossi spotestato,  
 Auto si se crepasse no cannone;  
 E ppiglia, pezzecanno pezzecanno,  
 Tre ciucce, che lo steano ventejanno.

XXIV.

Le ppiglia, e te le sbatte pe dderinto  
 Nface a la porta, ch'era già nzerrata;  
 Ma se rompe a lo bbutto, e ppe lo smitto  
 Esce co li tre cciucce ngravogliata.  
 Lo tierzo de sordate, ch'aggio ditto,  
 Che sempre stea de guardia a cchella strata,  
 Portate da lo viento, e dda le bbotte,  
 Se mesero a ffuure, comm' a equotte.

XXV.

Ma peccchè lo fracasso, e echì lo fiato  
 Se sentie quase pe tutto lo Stato;  
 Chille, che non sapeano lo secreto,  
 E dde la guerra avevano parlato,  
 Steano a ssemi: quann' uno da dereto  
 Strellaie: Cannone è cchisto, ch'è sparato.  
 No nte ll'aggio ditt'io, respose n'auto:  
 Sientetillo, e ncignato già l'assauto.

Nzen-



## XXVI

Nzenti strillà, Sparato è lo cannone,  
 Va te le ppesca, addò se so mpizzate;  
 Se mesero a ffut p'ogne pomtione:  
 A lo ffut, scontraieno li sordate:  
 Chiste crescieno la confosione,  
 Pocca credeano d'esse secotate;  
 Chille credeano, ca le ssecotavano;  
 Ma che bpuò secotà? tutte scappavano.

## XXVII

Nzallanute da ccà, dda llà ffujevano  
 Pe le bbie, pe li campe, e ppo tornavano,  
 Trasevano a le ttane, e ppo nn'ascevano,  
 Strellavano, chiagnevano, arraghiavano,  
 Venevano, correvano, mmestevano  
 Tutte chill' aute ciucce, che scontravano,  
 Sempe decenno: fuite, nzerrateve,  
 Sbrigateve, sarvateve, utanateve.

## XXVIII

Ccà bbiedive na ciuccia, che strellanno  
 Jea co no ciucciariello a la ncorrenno;  
 Llà trovave no ciuccio, che cchiammanno  
 Jea li compagne, chiagneuno, chiagnenno:  
 Chi co la coda mmocca jea teranno  
 No vecchiariello, che bbenea cadenno;  
 E tutte aveano ncuorpo no zeffunno,  
 Che pparea revotato già lo Munno.

Fuie--

## XXIX.

Fuieno tanta li strille, che lo Rrè;  
 Co tutto, ca stea tanto nzallanuto;  
 Sentle sto gra rremmore; e ppe ssapè,  
 Che ccos' era, e dda dove era venuto;  
 Co ll'uocchie nchiuse, disse: Eilà? che nc'è?  
 E bbedenno, ca nullo avea sentuto,  
 Raple ll'uocchie, vedette, e rrevedette,  
 No nce trovaie nesciuno, e sse sosette.

## XXX.

Venne a la porta, e la trovaje aperta:  
 Esce fora, e ccresceva lo remmore:  
 Cammina, ascia na mmorra; che ghiea sperta,  
 Nne ferma uno: Me magno mo sto core,  
 Disse, si no mme cunte allerta allerta  
 Che mmalanno v'afferra lloco ffore.  
 Signore mio, s'è bbista, ch'è ffojuta  
 Na cannonata, e nno nse sa, addò è ghiuta.

## XXXI.

Nzentì chesto, na risa le scappaje;  
 Co tutto, ca stea tanto mmeperuto:  
 Pocca, nzentirlo dī. s'allecordaje  
 De chello, che dda cuorpo ll'era sciuto.  
 E ssi mbè se vedea chino de guaje,  
 Penzaie, ca tutto ll'auto era perduto,  
 Si priunmo n'accoietava sto remmore,  
 Ca nne potea serti carch'auto arrore.

Mper-

## XXXII.

Mperzò jeva strellanno: Addò corrite,  
 Ciucce senza jodicio? addove jate?  
 Chi v'ha puosto paura, che ffoite?  
 Chi ve votta, che itanto vrociolate?  
 'Tornate ccà, fremmateve, e bbedite  
 Chi è stato chillo, che v'ha secotate.  
 O ciucce veramente de gra spireto,  
 Ve fa mette a ffui, puro no pireto!

## XXXIII.

Comme quanno lo Cielo se confonne;  
 Pe li viente, che ffanno a ssecozzune;  
 Lo maro va pe ll'aria, e cco cchell'onno;  
 Ch'una va, e n'auta vene, a rrampecune  
 Mo lo vide sagli, mo s'annasconne,  
 Mo ll'aie 'n Cielo, mo dinto a li cavune;  
 Si lo Sole miez' uocchio te nce jetta,  
 S'ammoscia, se fa n' uoglio, e ss' amocetta:

## XXXIV.

Accossì sto remmore, che ddoraje  
 Quase tutta la notte, e che cresce  
 De manera, che all'utemo arrevaje  
 A ffa tremmà le pprete de le bble.  
 Nche ddisse: è stato pideto; e mostaje  
 Lo Rrè la facce, subbeto sparìe.  
 Ma pecchè nc' era ancora quarche stella,  
 Se nne jett'isso a ffa la nonnarella.  
*Scompetura de l' Arragliata V.*

DE LA  
CIUCCEIDE  
ARRAGLIATA VI.

ARGOMENTO.

*Selleno torna, e trova Varvajanca,  
Che sta confusa, e cchiù lo nzallanesce:  
Po se scommove, e nce mmatte na chianco;  
Ca ll' uno, e ll' auto cchiù se mtennesce.  
All' utemo le dice: Marzafranza.  
Fanno pace, e la chianto se fornese;  
E ppe lo fa scompì de conzolare,  
Le mmocca tutto chello, e' ha da fare.*

I.

*Già s'era la vajassa de lo Sole  
Sosuta, pe ghi a spanne la colata;  
E nfacce, pe ppaura de le mmole,  
S'avea na pezza rossa arravogliata:  
Na barbuglia de papare, e dde cole,  
Nconzierto le faceva na matenata;  
E già Frettella se sentea strillà:  
Doie tre ccavalli caldi, caldi, eà.*

Quan-

## II.

Quanno lo scuro Rrè, ch'appapagnare  
 Tutta la notte non avea potuto  
 Pe li strille, e l'allucche, che stonare  
 Nzi-a lo maro avarriano saputo;  
 Co cchillo frisco, che bervesajare  
 Sole ncampagna, nche lo Sole è sciuto,  
 Pegliaie no sonnariello doce doce;  
 Quanno de bbotta, lo scetaie na voce.

## III.

Varvajanca, deceva, Varvajanca;  
 Scetate, rape ll'uocchie, auzate, e ssiente;  
 Se sose, e cco na facce janca janca  
 Pe la paura, e sbattenno li diente,  
 Disse? Chi è? Votate a mmano manca;  
 Lebbreca chella, e bbì si vide niente.  
 Se vota chiano chiano, e nce trovaje  
 Selleno, e tutto alliegro: Che nce faja?

## IV.

Che nce faie ccà, Selleno mio? le disse:  
 Singhe lo bemmenuto, a mille razie.  
 Figlio, chillo respose, si sapisse  
 Quanto me so ppesate le ddesgrazie,  
 Che ttu passaste, no mme lo dderisse.  
 Ma chi nce corpa? si nn'aviste strazie,  
 Non te puoie lamentà, che de te ssulo,  
 De te ssi, che si stato no cetrulo.

Com-

## V.

Comme? disse lo Rrè, io n'aggio fatto  
Tutto chello, che bbuie mm'avite ditto!  
So bbenuto a ttrovarve, e mme so sfatto  
Pe ccammenare, e ghi sempe de fitto.  
Aggio puosto lo naso, guatto guatto,  
Addò sapite; e mme so stato zitto,  
Aspettanno lo fiato: e mmo, ch'è stato?  
A lo rreto, cornuto, e mmazziato.

## VI.

E' ppoco tutto chello, ch'aie patuto:  
Ca mbè te mmeretave auto castico.  
Comme? dimme no poco? si bbenuto  
A ttrovà a mme da'ammico, o da nnemmico?  
Che bbo dicere chesto? Aggio creduto  
De te venì a ttrovare comm'ammico.  
Comm'ammico, è lo vè? ma n'ha mmancato  
Pe tte, d'averme miezo stroppejato.

## VII.

Selleno mio, chi t'ha dditto ste cose,  
Sarrà carcuno, che mme vorrà male.  
Io farte no dammaggio? e nno nse scose  
Primmo sta vita, e mmora a no spetale.  
Che mmora io primmo a bbotte de ventose,  
De sangozuche, e dde serveziale,  
Che ddarte no desgusto, tè, tantillo:  
Da vero vero so no peccerillo?

Si sta

## VIII.

Si stato troppo gruosso, me despiace:

Ca si nò, poco me nne corarria.

Dimme, che t'aggio fatto? e, ssi te piace,

Famme, che ssacc'io mo? mpalà 'n Turchia;

Ma primmo, Lleno mio, facimmo pace,

E ddimme chesso, ch'è na gran boscia.

E bboscia, si ppe ccierto; no lo credere:

Fa a mmuodo mio, vattenne a ssacredere.

## IX.

Già che lo bbuoie sapè, mo te lo ddico:

Non t'allecorde ajere, che ffaciste

A cchillo ciuccio, che bbenea co mmico?

Non sulo sto nasone le mettiste

Deroto, addò tu saie; atta de nnico!

Ma co tutto sso musso te nce jiste

A ffravecarte propio: che credere,

Locco te, ca si nò, no lo sentive?

## X.

Pe sta cosa restaie lo poveriello

Stroppejato de muodo, e dde manera,

Ch'è na compassione: pacioniello

Mio, che ppariver proprio de cera,

Tant'iere dellecato, e ttenneriello;

E mmo chi sa, si campe nzì a sta sera!

Uh leva lè, no mmè nce fa penzà,

Ca dint'a ll arma me sento schiattà.

E, ssi

XI.

E, ssi n' è ttonnerello, e tu pœ torna;  
 Disse lo Rœ: lo ssi sto naso mio,  
 Ch'ancora me fa male: e bba te nforma;  
 Selleno mio: non saccio, che ggolito  
 Te vene de schiaureme. Chell'orna  
 Non so dde preta? E ssi so ppreta, io  
 Mo, co sto musso, che le potea fare?  
 No me lo ddico, ca mme vuole crepare?

XII.

Te comparesco, figlio, ca non saje  
 Chello, che ddice. Che ane può sperare  
 A ll'utemo da n' aseno! Siente: aje  
 Da sapè, che sto ciuccio, che te pare  
 De preta, è ppreta, e non è ppreta; e mmaje,  
 Senz'isso, no mme pozzo freccecate:  
 Se fa carne, quann' esce pe ste sserve;  
 Se fa de preta, quanno no mme serve.

XIII.

Jere jie cammeranno, e nno l'aveva  
 Manco appannato, quanno tu veniste;  
 Tanto, che ttanno tanno se faceva  
 De preta, e tu corriste, e lo mmestiste.  
 Che ddice mo? sso musso le poteva  
 Fa tutto chello, che tu le faciste?  
 Che ddice? parla: tu si ggjà ammoruto?  
 Te comparesco. Si bbiechio storduto.

Nzen-



## XIV.

Nzentì cheso, no chiagnere a sselluzzo  
 Scappa a lo Rrè, che no nse po accoiutare;  
 Se vo jì a bbrociolà dint' a no puzzo,  
 Se jetta nterra, e non sa, che se fare;  
 E tranto fuie lo chianto, che no vuzzo  
 Dint' a la tana nce potea natate;  
 E, a lo rreto, lo bbuono vecchiarriello!  
 Fice issò puro n' uocchio a ppesciarriello :

## XV.

Chiagnea Selleno, e cchiagnea Varvajanca :  
 Chillo decea : no cchiù. Chisto: mo moro.  
 Chisto: o musso, nne voglio fa na chianca.  
 Chillo: mo nmo mme vene n' antecoro.  
 Chisto: primmo m'avesse rotta n' anca,  
 Che stroppejarte, ciucciariello d' oro.  
 Chillo: scumpela mo, no cchiù, mantiene;  
 Mo nne votto lo ciuccio, e cchi lo tene.

## XVI.

All' utemo Selleno lo sosette,  
 L'annettaie ll'uocchie, e sse l'accarezzaje;  
 E accossì sto sciabbacco se scompette,  
 Ca, si nò, sarria juto pe nzì a ccraje.  
 Po, co na facce a rriso, le decette:  
 Via, core mio, nò cchiù ppenzammo a gguaie;  
 E azzò nfra nuie sta pace aggia a ddorare,  
 Mo te voglio l' Aracolo sprecare.

Sac-

## XVII.

Saccio, ca poco, e nniente lo sentiste:  
Ma pecchè fò? pecchè tu nce corpaste;  
Quanno tutto sso musso nce mettiste  
Dint' a cchillo niozio, l'appelaste;  
L'appelaste de muodo, e te nce jiste  
A ffravecà co ttutte ll'ossa maste,  
Che cchillo fieto, e cchillo scuro sciato  
Nn' appe da scire miezo stroppejato;

## XVIII.

Puro chillo morzillo, che nn' ascle,  
Te mmoccaie chello, che ddevive fare;  
E bbolea gnefecà: Sti gran golie  
Addò le Scigne te le ppuoie levare:  
Pocca cheste so bbone, pe ste bbie,  
Mura, turre, e ccastielle a ffravecare:  
Hanno le mmano, che bbuie non avite;  
E le manca la coda, che ttenite.

## XIX.

Comm'a no guaglionciello, ch' a la scola  
S'è mbrogliato, pe ffare no latino,  
Ca no nne ntenne manco na parola:  
Te lo vide votà lo Calapino,  
Se raspa, se storzella, e cco na mola  
Se roseca mez' ognà; sì, vecino  
A isso, uno nce stà, che nce lo mmezza;  
Lo vasa, e ffa no zumpo p' allerezza.

D

Ac-

## XX.

Accossì Varvajanca, nche ssentette;  
 Ca Selleno ll' avea spalefecato  
 Chello, che ggià l' Aracolo decette;  
 E lo teneva tanto ammojenato;  
 Fice no sauto, e ppo de bbotta jette  
 Pe l'abbracciare, e a cchillo sbentorato  
 Na ciampatella te le conzegnaje,  
 Che ll'arco de' lo pietto le sfonnaje:

## XXI.

No nce lo sfonnaie propio, ca chillo,  
 Vedenno, ca mal'ario nc' era a Bbaja,  
 Se quartejaje, e fice no zumpillo;  
 Ca, si nò, nce potea sorti qua bbaja.  
 Po le disse, redenno: Và chianillo  
 Co sti carizze, core mio; abbaja  
 N' ata vota da vascio, ca no mporta  
 Sagli nzi ncoppa a ttozzolà la porta.

## XXII.

Scusame, Lleno mio, ca io non saccio  
 Mo che mme fare, tanta è la prejezza.  
 Ma, dimme n' ata cosa: comme faccio,  
 Pe ghirele a ttrovà? Si no mme mmezza  
 Primmo carcuno, addove stà lo jaccio,  
 E mme nce tira propio a ccapezza,  
 Va te le ttrova. Mo te lo ddich' io,  
 Respose ll'auto: chisto è ppiso mio.

Si

## XXIII.

Si vaie trovanono Scigne, addò te vuote,  
 Nn'asce a mmegliara pe tutto lo Munno:  
 Ch'auto bene no nc'è, si lo revuote  
 Da la capo a lo pede, nzi a lo funno.  
 Vaie, p'asempio, pe Nnapole; e a le bbote  
 Nne scuntre tanta, che sso no zeffunno:  
 Vanno a ppede, ngalessa, nzi ncarrozza,  
 Che te fanno abbottà tanta na yozza.

## XXIV.

La scigna vonno fa a lo Caaliero  
 Chille, che ssongo de cchiù bbascia mano:  
 Tutte co lo volante, e lo staffiero  
 Vanno facenno ncrine, e bbasamano:  
 Aggio pegliato un bravo repostiero,  
 Che mm'è bbenuto apposta da Milano;  
 Fa sorbette d'incanto, e sceroccate,  
 Peti-zucchere, e ccicere nnasprate.

## XXV.

Una, che stenta tutta na settimana  
 A ffa di rana a bbotta de spotazza;  
 La Festa po te pare na Vammanna:  
 Senza carrozza chi pò jì pe cchiazza?  
 Sciù sciù, è bbriogna, co na scarpa chiana  
 Sott' a lo sacristano! Che si ppazza?  
 Sore mia, comme vaie, tu si stemata:  
 Che mporta po, ca lave la colata?

## XXVI.

Ciert' aute zerbinotte corejuse  
 Te vonno fa la scigna a li Milorde :  
 Feteno de catramma , e bbanno nfuse  
 D'acqua de maro , e mmazzecanno corde ;  
 Tutto lo juorno fanno cuse , e scuse  
 Co le sciammerghe , e le danno le ccorde ;  
 Te scanosceno puro li denare ,  
 Po lo pesone non ponno pagare .

## XXVII.

Nc' è chi fa lo poeta , e bbò jì a pparo  
 Co Ccasa , e ffa la scigna pe nzi a Ddantè.  
 Non fa no vierzo , che non parla sparo :  
 Non bo parola , che non sia sonante :  
 No nce truove no sienso , che ssia chiaro :  
 Uneco ammico de le ccónzonante .  
 Quanno le ccanta po , non saie , si è uorco ,  
 Gatto maimone , o spireto de puorco .

## XXVIII.

N' ato vo fa la scigna a lo Boccaccio ;  
 Ma non sape dir' auto , ch' Jo vorrebbe  
 Unquanco dar de' calci a quel furbaccio  
 Di rovaio , e ad ogni otta io lo farebbe :  
 Jer l' altro otta catotta un buon migliaccio  
 Mi mangiò , e a le guagnel , che non m' increbbe :  
 Io lo mangiò ad un desco , ov' era a scranna  
 Il gran Don Cherche , e la Contessa Orlanna .  
 Nce

## XXIX.

Nce so ccierte , che bbonno fa a bbedere ,  
 C'hanno perza la vista a stodejare.  
 Si le bbide , te fanno stravedere ,  
 So ppeccerille , e pportano l'acchiare :  
 Toccàle po , ca le siente cadere .  
 Da vocca ciente ccose da crepare .  
 A lo rreto , ched'è ? Pe ffa ssa vista ,  
 Restano ciucce , e pperdeno la vista .

## XXX.

Comme so ddinto Napole , accossine  
 So ppe ttutto lo Munno de sse Scigne ;  
 Ca nn'ogne pparte nn'asce nzina fine .  
 Ma non serve mperrò , che ttu te mpigne  
 A ttrovà chesse , ca non so le ffine :  
 Si te vuoie fa rescire li designe ,  
 Vattenne 'n Varvaria , ch' a ssa comarca  
 Nce trovarraie lo Regno de la Varca .

## XXXI.

Llà stanno propio ; pocca llà so nnate  
 Le bbere Scigne , e stanno tutte aonite  
 Mmiezio a ccierte ccampagne abbannonate ;  
 Che lluceno l'arene , comm'a bbrite ,  
 Pe lo Sole , che ll'ha ccarcarejate :  
 No nce songo nocelle , pe ffa antrite ,  
 No nce so ffrunne , no nc'è mmanco sale ,  
 No nc'è mmanc'erva pe sserveziale .

D 3

Ma

## XXXII.

Ma no nce ire tu : ca de portare  
 A no Rrè non commene la mmasciata.  
 Trova duie , che se sacciano sprecare,  
 E tte pozzano fare na parlata .  
 Falle ssagli nzi a Ssomma , e bbrociolare  
 Dint' a lo monte , pe ssape la strata :  
 Là ttrovarranno n' Uorco , che stà lesto ,  
 Pe nce le ffa portare priesto priesto .

## XXXIII.

Orsù , stà ncellevriello , e non fà arrore ;  
 Che ppo non te n' avisse da pentire .  
 Governamette , schiavo , e sservetore .  
 Accossì dditto , se mese a ffuire .  
 Restaie lo Rrè ccontiento ; ma lo core .  
 Le decea : Chi nce manne ? Chi ha da jire ?  
 Ccà sarranno le bbotte . Vi che mbruoglio !  
 Non saccio si lo supere sto scuoglio .

*Scompesusa de l' Arragliata VI.*

DE LA  
**CIUCCEIDE**  
 ARRAGLIATA VII.



ARGOMENTO.

*Se fa no gran concurzo , pe tirovare  
 No ciuccio , che te faccia na mmasciata.  
 Se nce prova cchiù dd'uno , e bbà à pparlare,  
 Ma co la coda restano cacata .  
 Lo Rrè s' arraggia , e non sa , che se fare ,  
 Vedenno la facenna già mbrogliata .  
 A. ll' uremo compare n' Aseniello ,  
 Che mpromette levarlo da st' appielto.*

L.

**C**OMme chi va , pe ffarse na sciacquata ,  
 A na cesterna lorda , e schefenzosa,  
 Tira no cato , e nc' ascia nfracetata  
 Na soreca ; lo jetta , ca n' è ccosa :  
 Torna a tterà , e nce vene mpetenata  
 Na grasta de no càntaro , lo posa :  
 Nne tira ciento , e ttutte te le ghietta ,  
 Ch'acqua maie no nce trova , che ssia netta.



## II.

'Accossì ghiusto justo söccedette

A Bbarvajanca , che bbolea trovare  
 Qua ciuccio pe st' afficio : se nce jette  
 Mpazzenno cchiù dde n' ora , pe ncarrare  
 Uno , a lo mmanco ; ma no le rescette :  
 Scarta lo primmo , ca non sa parlare ,  
 Nne scarta n' auto , ca non sa che ddire :  
 No nne trov' uno , che nne pozza scire .

## III.

A ll' utemo , vedennose mbrogliato ,  
 Disse : Abbesognarrà , che nce vav' io :  
 Ma Selleno non vole , e mm' ha ordenato ,  
 Ch' io no mme parta da lo regno mio .  
 Che ffacimmo ? Selleno , mm' aie gabbato .  
 E dda dò t' è bbenuto sso golio ?  
 No nc è auto , che ffarce no concurzo ,  
 Mano a li fierre , e ppo che nn' esca n' urzo .

## IV.

E bbotatese nfacce a no sordato ,  
 Ch' a la porta facea la sentenella ;  
 Va , e ffa , che mme sia ccà mo mmo portato  
 Lo trommettiero , pe na certa chella .  
 Disse , e nno ntanto ll' ordine fo ddato ,  
 Che cchillo parze , ch' avesse la scella :  
 Corze , trovaie lo ciuccio , le parlaje ,  
 E bbolanno volanno lo portaje .

Eilà ,

## V.

Eilà, disse lo Rrè, nche lo vedette;  
 Va pe tutte li luoche de sto regno,  
 Jetta no hanno, e ssona le ttrommette;  
 Ch'agnuno, che se vanta d'avè gniegno  
 De fare, e dde portà co le staffette  
 Na mmasciata d'annore, e de gra mpegno  
 A la Reggina Scigna, de portante  
 Venga, ca le darò li paraguante.

## VI.

No ntanto appe fornuto de parlare  
 Lo Rrè, che cchillo se lecenziaje.  
 Jette a tutte li luoche, addò trovare  
 Potea cchiù cciucce, e llà ttrommettiaje.  
 Jie pe tutte li sghizze, e ttavernare,  
 Ca llà ssapea, ca nne trovava assaje.  
 Fice ascì fora ogn'aseno, che nc' era,  
 E sse mese a strellà de sta maniera:

## VII.

P'ordene, volontà, e ccommandamianto  
 De lo patre de musece, e ppoiete,  
 De lo lequedatore de strumiento,  
 De lo specchio de ll'uommene coiete,  
 Protettore de ll'unò e ll'auto viento,  
 Distruttore de pinole, e mmofete,  
 Varvajanca Llostrissemò anemale  
 Rrè de tutte li ciucce, e ccaporale,

## VIII.

S' ordena, se fa muto, e sse commanna  
 A tutte chille, che ssanno arragliare,  
 Che bbaano mo, co na capezza ncanna,  
 Nnanze a isso, ca ll'ave da parlare;  
 E cchi stesse mpeduto, che nce mamma  
 Lo scagno. State attiente a ninon mancare:  
 S ha da mannà de pressa na mmasciata  
 A na Scigna, ch'è ttesta ncoronata;

## IX.

Mperzò vengano tutte, luoco luoco,  
 Viecchie, ghuvene, gruosse, e ppeccerille:  
 Se lassa lo mmagnà, se leva juoco  
 Da li ciucce d'azzò, nzi a li verrille.  
 Vengano primmo, che se faccia vruoco,  
 E cch'a ccanità accommenzano li grille:  
 Venga chi s'addelletta de trascorrere  
 Nnanze a lo Rrè, ca s'ave da concorrere.

## X.

Accossi ghiea strellanno: e nche ghiettato  
 Fuie pe tutto lo regno sto gra bbanno,  
 Te vediste lo Munno arrevotato.  
 Chi jeva sulo, e cchi se jea nzaiano  
 Co nò compagno, che pportava a llato:  
 Cierté se nne veneano jastemmanno  
 Chiano chianillo, e le decea lo core,  
 Ca sto concorso no le faceva nore.

Chil-

## . XI.

Chille, che non poteano cammenare,  
 Mannavano li figlie, o li nepute:  
 Jate, figlie, sacciateve portare;  
 Mo è ttiempo de mostrare la vertute.  
 Site figlie a no patre, ch'appassare  
 Maie non s'ha ffatto da li cchiù ssapute.  
 Manteniteme nfacce lo decoro,  
 Faciteme allegrà nnanze, che mmoro.

## XII.

Oh che ttenesse mo dec'anne manco,  
 O si nò, mm'ajutasse sto guarrone;  
 Ve vorria fa a bbedè comme lo sanco  
 Mme sento freccetà a st'accasione.  
 Che nce vuo' fa, dengraziane sto granco,  
 Che mme tene nchiovato a sto pontone.  
 E ddecenno accossì, se l'abbracciava,  
 E qco lo musso te le bbavejava.

## XIII.

Na ciuccia co lo figlio stea a ddescorrere:  
 Figlio, tu non si nato pe la vateca,  
 Ca ggià liegge scorrenno, e ssaie trascorrere,  
 E stodejata aie tutta la grammateca.  
 Curre, puca mia d'oro, e bbà a cconcorrere,  
 Miettete tutte quante sotto nateca:  
 N'avè a ppaura manco de l'Ancroja,  
 Ca te vene a ssentire mamma toja.

## XIV.

Duje aute vecchie steano a no pontone;  
Ch' uno era ciunco, e n' auto stroppejato,  
E ffaceano nconzierto sto catone:  
Vecchiaja cana! Ahù ttiempo passato!  
Vi si la perdarria st' accasione,  
Decea lo primmo: va ca mo ha trovato  
Lo Rrè chi nne pò scì co equarch' annore.  
La vertù s'è sperduta, e ecco nnuie more.

## XV.

No nc'è cchiù chi sa fare na parlata,  
Non bid' auto a lo Munno, che mposture;  
Birbe, ca le farria na cauciata,  
Quanno te vonno fare li dotture:  
Non so bbuone, ch' a fflate na cacata  
Pe ttutte ssi pontune, e a ffa remmure.  
Addò so ghiute chilli ciucce antiche,  
Che pparlavano meglio de le ppiche!

## XVI.

T' arre cuorde, ammecone caro mio,  
Sett' anne arreto, quanno me mannaje  
A Giove lo Rrè nnuosto, pe ggolio  
De levà da nuje aute chilli guaje?  
Chille fuieno trascurze, che ffig' io;  
Vasta dire, ca Giove, nche arrevaje  
Nn. appe gran gusto, e ppe ffarne faore,  
Mme facette aspettà tre ghiurne fore.

Po

## XVII.

Po trasette , e le fice no saluto ,  
Che , ppe mpararlo , n'anno nc' era stato.  
Me disse: Che t'accorre? Bemmenuto.  
Io ch'era cuorvo , e stea premmedetato ,  
Te lo fice restare ascevoluto ,  
Co n' arrenghà , che nce perdìe lo sciato .  
Che bbuò? Potive scepparlo li diente .  
Vasta , mme ne tornaie senza fa niente .

## XVIII.

Tanno se potea dire ., responnette  
Ll' auto , ch'era lo tiempo de li ciucce .  
Va te le trova mo . Quanto le ghiette  
Tutte sti milordielle scuccemucce .  
Non bid' auto , che ccacapozoniette ,  
Che se so ppuoste ncasecavallucce :  
Non fann'auto , che bbevere , e mmagnare ,  
E nno nse parla cchiù de stodejare .

## XIX.

Sempe , che mm' allecordero lo contrasto ,  
Ch' app'io co lo Dottore cepollaro ,  
( Lo saie? ) non pozzo toccare sto tasto ,  
Senz' avè voglia de jettarme a mmaro .  
Io voleva defenne , ca lo mmasto  
Nce facea nore , e sservea pe rreparo ;  
E cchillo era ncocciato a mmantenere ,  
Ca nc'era de sbreguogno , e ddespiacere .

Com-

## XX.

Comme sbreguogno ? io mo le responnie.  
 Tu si ddottore, e nnon saie manco sale.  
 E ppo te lo pegliaie pe ccerte bbie,  
 E cco ccierte argomiente natorale,  
 Che cchillo poveriello rommanie  
 Tutto no piezzo, comm' a n'anemale.  
 Jettemo po a lo Rrè, che ghiodecaje,  
 Ch' io non sapea che ddire, e ppassaie guaje.

## XXI.

Mente ssi viecchie stevano ncanute  
 A llaudà tanto li tiempe passate,  
 Erano a mmorra li ciucce venute,  
 Pe lo concurzo, da tutte le strate.  
 Lo Rrè le bbidde, e ddisse: Bemmenute,  
 Sapite già, pecchè v'aggio chiammate.  
 Via su, saglite ncoppa a sso montone,  
 Ch' io ve stongo a ssenti da sto pontone.

## XXII.

Ma, azzò la cosa meglio aggia a rescire,  
 Saglite a uno a uno, p' avetare  
 Ogni remmore, che nce pò ssortire.  
 Fatto chesto, v'avite a flegorare,  
 Ch' io sia Scigna, co cchi s'ha da comprire,  
 Ecco cchi po avarrite da parlare.  
 Parlate a ggusto vuosto, ch' io dirraggio  
 Nzò, che mme pare, e ve responnarraggio.  
 Sa-

## XXIII.

Sagliette apprimmo chillo ciucciariello ,  
 Ch' era venuto nziemo co la mamma .  
 Mmederlo , se nn' affese lo rotello ,  
 E cco no sgrigno , agnuno auzaie na gamma ;  
 Ma le carcaie la gnora lo cappiello ;  
 Che bbolite peglià lo Munno a fflamma ?  
 Figliemo vene ccà , pe ffarse annore :  
 Chi no lo pò senti , ch' esca llà fore .

## XXIV.

No ncignammo da mo , sia bbenedetta ,  
 Lo Rrè se vota , a ffare sso remmore .  
 Chiano no poco . N' auzà la cascetta ,  
 Ca mo , a tte pprimmo , te faccio ascì fore .  
 Ma , Segnò .... Mo mme frusce la cauzetta :  
 Statte zitto , co ttutte le bbon' ore :  
 Dì , figlio mio , dì chello , che t' accorre :  
 Non perdiamo lo tiempo , che ggìà scorre .

## XXV.

Nzènti chesto lo sure ciucciariello ,  
 Accommenza a tremmare co na pacca :  
 Mamma , mamma . Che bbuoie , figlio mio bello ?  
 Nzeccate ccà . Cher' è ? Voglio fa cacca .  
 N' è niente , core mio . Lo zommaciello  
 Te fa mmale ? mo mamma te l' ammacca ,  
 E ccorze , pe ssagli : ma nche arrevaje ,  
 Lo sanno peccerillo se cacaje .

Fi-



## XXVI.

Figlio mio, ll' hanno puosto già a ppaura  
 Sti vecchiacune, co ttenirle mente;  
 Ma no mporta: avarraggio la fortuna  
 De senti io puro st' asene valiente:  
 Che ssaglia mo carche llamma sicura.  
 Maddamma, chesto a Uscia no mporta niente,  
 Sbota lo Rrè; statte no poco zitto:  
 E ssò ddi vote, che te ll'aggio ditto.

## XXVII.

Appriesso a cchisto venne no vecchione,  
 Saglie, teneva mente, e nnon parlava.  
 Ched'è? Non parle? Aie visto lo Mammone?  
 Sferra lo Rrè. Ma chillo cchiù ncocciava.  
 Sacciammo, che bbò dì ssa immenzione.  
 A ll' utemo sparaje: lo ccà aspettava,  
 Che mm' avissevo data la resposta,  
 Ch'io po nce la portava; pe la posta.

## XXVIII.

Comme? da me aspettave la mmasciata?  
 Si Ssegnore, e ppe cchesto era venuto.  
 Buono, ll'avimmo propio annevenata:  
 Scinne, zi vecchio, ca tu ggì si ghiuto.  
 La ciuccia nc' appè gusto, e na resata  
 Se fice: ma lo Rrè, comme sentuto  
 N' avesse niente, se votaje a n'auto,  
 Che, pe pparlà, già s' era puosto n'auto.

Se-

## XXIX.

Signora mia, io songo mo arrevato.

Bravo, disse lo Rrè, chisso mm' ha ntiso?

Signora mia, io songo mo arrevato.

Secoteja, ca chesso è ggià ccompriso.

Signora mia, io songo mo arrevato.

Tridece co lo gallo', fuss' acciso.

Signora mia, io songo.... E bbà a mmalora:

Pe ccaretà, cacciatennillo fora.

## XXX.

E la ciuccia: N'è nniente, s' ha sperduta

La lezzione, che s'avea mparata.

Mannaggia, quanne maie nce si bbenuta:

Sfrattatela da ccà ssa mmeciata.

Lo Rrè se nfada. Piglia na caduta,

Pe ffuire la ciuccia sfortonata,

Che s'appe a rompe ll'uosso de lo cuollo,

E ll' auti ciucce le cadleno ncuollo.

## XXXI.

Che bbolite da me? No mbì, so mmuosse

A ffa li guappe co na poverella?

Pozzat' essere accise. Gruosse gruosse

Se vonno mette co na peccerella?

No mbì quanta? La carne pe nfi all' osse

Ve pozza fa scolà la cacarella.

Ma chille buono buono l' ammallajeno,

E, a ccauce nculo, fora la cacciajeno.

Ca

## XXXIII.

Ca starrimmo cojete na stezzella,  
 Disse lo Rrè; non se potea dorare.  
*So cchiacchiare: Addò sta na femmenella;*  
*Sempre remmure s' hanno da trovare.*  
 Via sù, decite mo carch' autà chella:  
 Saglia llà ncoppa chi se vo provare.  
 Nne venne n' auto, miezo scioffellato;  
 Ch' avea proprio na cera de scannato.

## XXXIII.

A la commesechiamma vosta autissema:  
 Bona, disse lo Rrè, st' accommenzaglia:  
 Na chelleta ve faccio profonnissema;  
 Po, azzò che lo niozio mio se quaglia,  
 Na commesaddemmanna a Uscia llostrissema  
 Ve cerco, che dde recchia na retaglia  
 Mme mprestate: ch' io dintò, zitto zitto,  
 Nc'aggio a ppescià nzò, che lo Rrè m'ha ddito.

## XXXIV.

Fegliù, chi t' ha mmezzate sse crejanze  
 De parlà cçossi llurdo a sta presenza?  
 Scusateme, credea de no sta nnanze,  
 Signore mio, a bbosta lleverenzia.  
 Comme si llocco! N'aie ntiso mo nnanze,  
 Ch' io mm'aggio fegorato stà nn' assenzia,  
 E ffare, comm' io fosse proprio chella,  
 E mperzò t'aggio fatto sta vocella?

Uh

## XXXV.

Uh si mme deciarrìa de ssa manera,  
 No le resciarria janca la colata.  
 Me votarrìa de bhotta co na cera,  
 Ch'apprimmo apprimmo restarrìa nchiovata:  
 Che bbuoie di, brutta facce de Meggera?  
 Scirpia porca mia, scigna cacata,  
 Lava colata, senza la cammisa,  
 Comme si bbrutta, puozz'essere accisa.

## XXXVI.

O pieto de estrulo nzemmentuto,  
 Lo Rrè se ngrifa: bello mmasciatore!  
 Chist'è lo vero muèdo d'avè ajuto.  
 Simmo arreivate a cchiunzo. Ascite fore,  
 Sfrattate, ca mm'avite già storduto,  
 Rompiteve lo cuollo. Si Ssegnore,  
 S'ha da jì co la lengua strascenune,  
 E bbo fa sto mmerduso a ccostejune.

## XXXVII.

Mente co echella lengua a ttaccariello  
 Facea fuorfece fuorfece lo Rrè,  
 Sè vedette no bello ciucciariello  
 Janco janco llà mmiezo comparè.  
 Po s'azzeccaje, e cco no resariello,  
 Disse nfacce a lo Rrè: Ccà stò ppe tte:  
 Me nce manna Sellenò, c'ha saputo,  
 Ca chiste ccà t'aveano nzallanuto.

Io

## XXXVIII.

Io so cchillo, che pporto le mmasciate,  
 Ch' isso solè mannare a cquarche ammico:  
 Damme na mmorra de li cchiù fforzare,  
 Dille, che se nne vengano co mmico.  
 Jarraggio addò la Scigna, e nzanetate  
 Nosta, te levarraggio da sso ntrico.  
 Non dobbetà de niente. Damme ll' aute,  
 E ttienete co ttico sti masaute.

## XXXIX.

A sta vista, a sta chella, a sto pparlare;  
 Te vediste attassà li concorrente;  
 E ssenza potè manco pepetare,  
 Ll' uno co ll' auto se teneva mente.  
 Lo Rrè stisso si jea pe spaporare,  
 Pe ll' allegrezza non potea di niente.  
 All' utemo strellanno se jettaje  
 Nnanz'a lo ciucciariello, e le parlaje.

## XL.

Gioja mia, chi te pò ddengraziare  
 De sso favore accossì segnalato?  
 Che ppò di Varvajanca, e cche ppò fare;  
 Si mm'aie co na capezza ncatenato?  
 N' è ttiempo, disse chillo, de parlare,  
 Ca ggìa ll' aria, e lo Munno s'è abbricato,  
 Mo avimmo da partì. Lecenziajeno  
 Ll' aute, e ssule sulillo se nzerrajeno..

*Scompetura de l' Arragliata VII.*

DE LA  
**CIUCCCEIDE**  
 ARRAGLIATA VIII.



ARGOMENTO.

*Co li compagne parte l' Aseniello ,  
 Pe ghì a ttrovà le Scigne ; e bbia via  
 Contanno te le va no contariello .  
 Trovano n' Uorco po , che ffa resia ,  
 E le mosta no bellò quatosciello .  
 A ll' utemo le mmette pe la via ,  
 E , cco l' ajuto de no cierto viento ,  
 Le ffa portà pe ll' aria senza stiento .*

I.

**G**là Febbo s'avea rotta la nocella ,  
 Co tutte li fresune , mmiezo mare :  
 Chiagnea lo Cielo , e pp' ogne ffenestella  
 Lle llocerne mettea , pe l' ajutare :  
 La Terra se faceva già la vonnella  
 De lo viseto ncuollo arrepezzare :  
 Pe ll' uorte , e ppe le ssirve sule sule  
 Lo chiagnevano ll' Asce , e li Cucule .

Quan-

## II.

Quanno disse a lo Rrè lo ciucciariello :

Leva mano a le cchiacchiare , ch'è tardo:  
 Damme li ciucce , e statte ncellevriello  
 A ddarmille , ch' agnuno sia gagliardo ;  
 No mmoglio chi vò stà mpappalardiello ,  
 O chi vo stà a ghiettarese lo cardo ;  
 Le bbuoglio tuoste , giuvene , e scheunte ,  
 Chiatte , gruosse , majateche , e cchiantute.

## III.

Sciglie tu chi te pare da ccà fflore ,

Nce nn'è no Tierzo , e sso li cchiù bbaliente,  
 Lo Rrè le disse ; e tte ponno fa annore ,  
 Ca so ssolete a ghire p'acqua , e bbiente.  
 Via su , fegliule mieie , facite core ,  
 Se vota l'aseniello , ca n'è nniente :  
 Venite appriesso a mme,e sse n'acchiappaje  
 Na trentina , ch' abbista l'annasaje .

## IV.

Schiavo . Schiavo . Bonni . A rrevederece .

Commanname . Obbreccato . Trasetenne .  
 No lo ffarraggio maie . Non trattenerece .  
 Non nte scordà la strata . Vavattenne .  
 Fegliulè state attiento . No mpederece .  
 Covernate . Screvimmonce . E bbattonne .  
 E , ffattase sta gra llecenzejata ,  
 Se mettertero a fa na trottejata .

Jea

V.

Jea manze chillo bello ciucciariello ,  
 E ppo veneano tutte ll'aute appriesso;  
 E ccammenaieno co no trottariello ,  
 Che lloro stisse deceano : Ch' è cchesso ?  
 Pegliaieno Somma ; ma a sto viaggiello  
 Restaïeno , pocc' agnuno morea ciesso ,  
 Si facea la montagna de corzera ,  
 E sarriano crepate chella sera .

VI.

Disse lo Caporale : Veramente  
 E' troppo fatecosa sta sagliuta :  
 Jate chiano chianillo , ca n'è nniente;  
 Quanto arrevammo ncoppa , ca po è ghiuta.  
 Ma , pe ffarve sagli cchiù allegramente ,  
 Ve voglio dì na storia scanosciuta  
 De n'Uorco , che llà ddinto stà a ccovare ,  
 E cco cchi nuie po avimmo da trattare .

VII.

Sacciate addonca , ch'into a sta montagna ,  
 Addò nuie trasarrimmo , nce stà n'Uorco .  
 Chisto no scenne maie pe sta campagna ,  
 Ma stà ssempe llà nchiuso , comm'a ppuorco.  
 E cche magna llà ddinto ? Che nce magna ?  
 Magna prete , schefienzie . Comm'è spuorco !  
 Magna oro , magna chiummo , magn' argiento .  
 E lo ppò padejà ? Nne fa n' agniento .

Se



## VIII.

Se chiamma lo Vesuvio, e ha na sore,  
 Ch'è ppur' Orca, e sse chiamma Zorfatara,  
 Che sta poco descuosto, e ascieno fore  
 Tutte duje a no ventre: è ccosa rara,  
 Comme so ttutté de no stisso ammore.  
 Si chella stace allegra, se reschiara  
 La facce de chist' auto; ma si chisso  
 Se nzorfa, chella ncigna a ffa l'aggrisso.

## IX.

Si chisto mo peppeja, e cchella fumma:  
 Si chella ha fflamme, e chisto ave l'abbramma.  
 Veve chisto? e cchell' autà fa la mbumma:  
 Chella cammina, e chisto auza la gamma.  
 Chella stà co na facce de Maumma?  
 E chist' abbotta, e tte fa chiammà mamma.  
 Nzomma si chella ride, e chisto ride;  
 Si chisto chiagne, chiagnere la vide.

## X.

Na cosa schitto ha chisto, che n' ha chella;  
 E pprevene, ca chisto è ccorporente,  
 E cchella accanto a chisto è n'alecella.  
 Chisto fa certe c cose cchiù ffetiente,  
 Pecchè ssole patè de cacarella,  
 E cquarche bota vommecca pe nniente;  
 E cquanno lo bbò fa, pe nzi a la vocca  
 Saglie de sta montagna, e tte l'abbocca.  
 E mper-

## XI.

E mperzò , à ppadejà quanno n' arriva  
 Co ppeglià lo ttabbacco, e fformecare;  
 Vommecca nà montagna viva viva ,  
 E ffa cose de fuoco , e dda crepare :  
 Ma chella , pecch'è steteca , se civa  
 Co mmanco rrobba ; e ppe la padejare ,  
 Quanno chisto va ncoppa a ddevacà ,  
 Chella s'ajuta co lo ppeppejà .

## XII.

Mar'a nnuie poverielle , e addò nce puorte ?  
 Decevano li ciucce sbentorate:  
 Nch'arrivarrimmo llà , sarrimmo muorte :  
 Già simmo jute , e mmiezo padejate .  
 Comme de jì a l' acito ve sa a fforte ?  
 Responnea ll'auto ; ma non dobbetate,  
 Isso ve stà aspettanno . Allegramente ,  
 Saglimmo ncoppa , ca no ve fa niente .

## XIII.

Co sti trascurze , e aute contarielle ,  
 Che ghiettero facenno pe la via ,  
 Arrevattero a ghiuorno , addò le cchelle  
 Vommecca ll'Uorco , quanno fa resia :  
 Veddero , ca da certe ssengolelle  
 Ascea no po de fummo : Mamma mia :  
 Strellaieno tutte : già ll'Uorco peppeja :  
 Si fa na vommecata , nce stroppeja .

E

Che

## XIV.

Che bbommecà ? Venite appriesso a mme ,  
 Disse lo ciuccio ; e zuffete , se jetta  
 Dint' a la vocca ; e stea da llà a bbedè ,  
 Quanno ll' aute zompavano . Ma , aspetta ,  
 Ca mo veneno ! Chisto : Tocca a tte .  
 Decea chill'auto : No mmoglio , a cchi aspetta ,  
 Levà lo luoco . Eh Uscia mme perdona ,  
 Nol farrò mmaie : sta cosa non va bbona .

## XV.

A ll' utemo , co ttanta pregarie ,  
 Co ttanta strille , e ttanto ammenacciare ,  
 Ca le ffarria scannare , le rescie  
 De fa zompà lo primmo ; e , nche ghiettare  
 Vedette lo compagno , se nce jle  
 Ll'auto acconcianno ; e ppo , senz' aspettare  
 Ll' uno a ll' auto , fatt'armo , se lassajeno  
 Tutte nziemo , e dde botta se jettajeno .

## XVI,

Fecero , comme fanno co lo gallo  
 Le ggallenelle ncopp' a n' asteciello :  
 Vola isso abbascio , c' ha fatto lo callo ,  
 Cchiù de na vota , a ffa sso volariello ;  
 Vanno lloro pe mmettersè a ss' abballo ,  
 Ma le ncigna a ttremmà lo stommaciello :  
 Tornano a scellejà ; ma , nche se lassa  
 La primma , la paura a ttutte passa .

Jet-

## XVII.

Jettate tutte, jieno cammenanno  
 No poco pe cchell' aria chiarascura.  
 Veccote ll' Uorco, che stea peppejanno :  
 Uh mamma mia, e cche brutta fegura!  
 Si l'avesse scontrato Cont' Arlanno,  
 Se sarria juto sotto pe' ppaura ;  
 E, ssi co cchisto se mettesse a fronte,  
 Na gioja pararria porzi Ccaronte.

## XVIII.

Po votatose a lloro : E mbè, le disse,  
 Vuie site chille, che mmanna Selleno ?  
 Gnorsì, disse lo ciuccio ; a mme, e a cchisse  
 Avite da portà . No po de fieno  
 Magnateve, si è cchesto, ca jarrisse  
 Tu puro, figlio mio, pe sso terreno  
 Malamente dejuno : n'è bbejaggio  
 Chisso, da farlo senza companaggio .

## XIX.

Trasette dinto, e ascie co no sportone  
 Zippo zippo de fave, d'uorgio, e bbrenna;  
 Scusateme, si è ppoco, a le pperzone  
 De la qualetà bosta, sta marennà :  
 Potite fare na colazione,  
 Ch'abbesogna, ch'io primmo mme la ntenna  
 Co lo Scerocco, che ll'aggio mannato  
 A ppregà, che mme dia no po de sciato.

E 2

Mme-

## XX.

Mmedè ll' uorgio li buone compagne,  
 N' aspettaieno, che ffossero pregate:  
 Dieno dint' a la sporta a bbuonneccchiune;  
 Ca pe la corza stevano alloplate;  
 Tanto, che cchelle ccose 'n duie voccune  
 Scomparieno, cche pparzero ncantate:  
 Po, pecchè no nc'era auto, che ccardare,  
 Se mettieno llà ddinto a ppassejare.

## XXI.

Oh, già che stammo ccà senza fa niente,  
 Se vota ll' Uorco, e avimmo d'aspettare  
 N' ato ppoco, che bbengano li viene,  
 Ch'aggio mannato mo nnante a chiammare;  
 Ve voglio dà cierte trattenemiente,  
 Che nc'avarrite gusto sengolare.  
 Venite ccà: dint' a sta grottecella  
 Ve voglio fa vedè na cosa bella.

## XXII.

Trasieno dinto, e nfacce a cchelle mmura  
 Co no cravone steano desegnate  
 Certe ccose, co cchiù de na fegura.  
 Che bella cosa! Vuie v'addelettate,  
 Pe cchello, che mme pare; de pettura?  
 Disse no ciuccio. Mme spasso li frate,  
 Respose ll' Uoreo, co no tezzonciello,  
 Da quanno nquanno, a ffa no quatroschiello.  
 Car-

## XXIII.

Carche bbota me vene qua fforore,  
 Comme ll' ha Febbo, e ccarcata perzona:  
 Quanno me vene, sento no remmore  
 Dinto a lo cellevriello, che mme stona,  
 E bbedo cose, c' hanno d' ascì fore  
 Megliara d' anne appriesso. A ll' ora bona,  
 Site Astroleco puro? Uh, pe sta via,  
 Donco quinnece, e ffallo a cchi se sia.

## XXIV.

Nche mm' acquieto, piglio no cravone,  
 E le bbao pettanno pe sse mmure.  
 Chessa è na bella sodesfazione!  
 Se vota n' auto. Che sso ste ffigure,  
 Che stanno desegnate a sto pontone?  
 No le ccanosco. N' accorre, che ghiure,  
 Lebbreca ll' Uorco: ca dapò mill' anne  
 Hanno da comparè sti Varvajanne.

## XXV.

Chessa è na storia, ch' è dde groleia vosta;  
 E, ppe cchesto, ccà mmo v'aggio portate,  
 Azzò vedite, quanto co la gnosta  
 Cierte ve nnauzarranno. Ora sacciate,  
 C' ha da venì no tiempo, che s' accosta  
 Propio, quanno le Pparche hanno felate  
 Gliommara settecento, e bbintequatto  
 Ncopp' a le mmille, pe no cunto fatto.

E 3

A cchis-

## XXVI.

A cchisso tiempo venarrà golio

A no viecchio de jì a na montagnella.

Chist'è lo viecchio, che ve dico io:

Chest'è mmontagna, e sse chiamma Arenella.

Chisto mme pare, a lo jodicio mio,

C'ha perduta na meza chiancarella;

E, ppe se le ffa mette tutte nove,

E bbenuto a ste ssirve, che ccà truove.

## XXVII.

Acchia naso! decette uno de chille.

E cche bella vocchella, che se trova,

E' nnaso, ma che nnaso? Si destille

Tutto li nase, no nne puote fa prova:

Naso, addò so ccolate a mmille a mmille

Li penziere, e bbertù nce fa la cova:

Naso saputo, naso, ch'è allongato

Pe li tanta niozie, c'ha addorato.

## XXVIII.

Chesta è na cosa, che no la credite;

Ma, si vedite na cocozza longa,

Senz'auta chella mme la credarrite.

Quanno chesta è già schiusa, azzò s'allonga;

No vaso d'acqua sotto nce vedite;

E cchesta, co cchell'acqua se sdellonga

De manera, che ssempe crescerria,

Si ll'acqua sotto maie non mancarria.

Chi-

## XXIX.

Chisto è lo capotroppa de ssa gente,  
 Che bbedite pe ttutte ssi pontune.  
 E cche ffanno ccà cchisse aonitamente?  
 Stanno a llaudà a bbuje aute, anemalane.  
 Se so ttutte scöpierte pe ppariente  
 Dè li ciucce, e ppe cchesto a buonneccchiune  
 Se so impegnate a llaudare sta razza,  
 E ffanno cose, che nce vo la mazza.

## XXX.

Chisso, che stace co la voccà aperta,  
 Chi è, e cche ffa? Chist'è lo secretario,  
 E ccanta, che te fa morì a l'allerta,  
 Co na voce de passaro canario:  
 E' ttutto buono, e bello; ma na certa  
 Cosa, che ssole avè a lo tafanario,  
 Lo fa stà co na facce, a bbota a bbota,  
 Che no stà bbona, ma pare devota.

## XXXI.

E cchisso ccà, che le stà cchiù bbècino,  
 E ppare, che ccontrastano nfra lloro?  
 Chisso è figlio a lo viecchio, e ppe destino  
 Se nc'è ttrovato, ca è no figlio d'oro:  
 E' no saputo nfunno, e lo scarpino  
 Se sa cauzà cò, ttutte ss'aute ncoro:  
 E' ammico de l'ammice, ncrosejone  
 Non te lo truove cchiù a n'accasejone.



## XXXII.

Sapute, comm'a isso, e nniente manco;  
 So cchist' aute, che stanno da sta via:  
 E ttutte so de chille, che lo ghianco  
 Te fanno parè nigro, arrasso sia.  
 Chisso, che stà cchiù nnanze, è lo cchiù ffranco,  
 Che ppozza maie vantà la Povesia;  
 Ma si accommenza a ddì, no la fornescè;  
 Si pe ddoje ora no nte nzallanesce.

## XXXIII.

St' auto, che le stà appriesso, e a la figura  
 Pare propio la morte de Sorriento,  
 Ave lo stisso male; e ssi a la scura  
 Non se vede restà, non trova abbiento:  
 Na cosa schitto nc'è, ca chillo dura,  
 Pecch' ha che ddì, ma corre, comm'a bbiènto;  
 Chisto non dice troppo, ma ha n' affanno,  
 Che, pe ddì na parola, nce vo n' anno.

## XXXIV.

Venite ccà. Uh, comm'è bbello chisso!  
 Spara no ciuccio, che stea a no pontone:  
 Le ccude ha porzì ncapo lo scurisso.  
 Non vide nè? Che d'è ssa. mmenzione?  
 Oh, chisto mo se pò chiammà l'aggrisso;  
 Se vota ll' Uorco; è na tentazione:  
 Che bboglio di? No nne truove lo paro,  
 Si revuote porzì lo Lavanaro.

Chis-

## XXXV.

Chiss' è no ciuccio : ma che ddico ciuccio ?  
 So ttrenta ciucce dinto a no pasticcio .  
 Farrà parlare Ciccio , e Ghiatanuccio ,  
 Pe ffa la bbaja a Ghiatanuccio , e a Ciccio .  
 Nfra tutte ll' aute pare lo galluccio ,  
 E sta sempe allummato co lo miccio  
 Ncopp' a la serpentina ; pe ddà gusto :  
 Cerca che bbuò , ca ll' asce int' a sso fusto .

## XXXVI.

Si dice , canta ; t' apre na vocchella ;  
 Che ppare propio propio lo vasillo ,  
 Addò le Ggrazie fanno là cacchella .  
 Si lo faie mprovesà ; te scaca chillo ,  
 Che stà a Ggalluccio co la chitarrella .  
 Si dice , te sto libro , sprecamillo ;  
 Te le fa dire cose , che mzonno  
 Maie chillo no nse l'ha , che ll'ha stampato .

## XXXVII.

Si vuoie na predecozza , te la jetta .  
 Parla Carveno , comm' a no porciello .  
 Magna , comm' a no Conte , e n' arrecetta  
 No gallo d'nnio co no sfarzetiello :  
 Ma te fa scompestià si po se metta ,  
 Co ttanta ngiegne , a ddà no contariello ;  
 E te fa restà ll' uommene ncantate ,  
 Ca tutte quante resceno a ccacate .  
 E s

Pe

## • XXXVIII.

Pe cchesto ll' hanno posta ssa corona  
 De cude , e dde gramme gnà ntorcegliata ;  
 Co na campana ncanna , che te ntrona  
 Tutte ste ssirve , e na cegna attaccata ;  
 Po , co sti guarnemiente , bella , e bbona  
 Te pararrà na bbestia ncoronata ;  
 E tutte ll' aute le farranno annore ,  
 Da lo echiù bbascio pe nzì a lo Prejore .

## XXXIX.

Vedite chistó ccà , che la stà appriesso ,  
 E ppareno cardasce , e ccammareta ?  
 Chiss' auto farrà ttanto no prociesso  
 De na storia , che isso s' ha accacciata .  
 Mo pare , che la legga ; e ffarrà cchesso :  
 LA REGGIA DE LI CIUCCE CONZARVATA .  
 De cchiste mo no nne pozzo di niente ,  
 Ll' ammo cchiù , che ssi fossemo pariente .

## XL.

E cchiste ccà , che stanno accossì nn' auto ?  
 Pe cchiste mo , n' è llengua chesta mia ,  
 Che le ppozza laudà ; trovate n' auto ,  
 Che ssaccia di : ma chi nce resciarria ?  
 So ccierte , c' hanno fatto no gran stauto  
 Ncopp' a ttutto , nzì ncoppa 'a la bboscia ;  
 E stanno sulo ccà , pe ffa faore  
 A ssi povere ciucce affritte cete .

No

## XLI.

No mbi sta mmorra ccà? Gomme so' belle?  
 Chi so cchiste, previta de Messere?  
 Ccà fice ll' Uorco ll' uocchie a ppesciarille,  
 E, figlie, disse, nn' aggio despiacere.  
 Chisse songo ciert' asene morielle,  
 Che non se potarranno trattenere  
 Troppo co ll' aute, e ppriesto scapparranno,  
 E le pprete porzi nne chiagnarranno:

## XLII.

So ciuffee puro addotte. Ma lo vintò  
 Già se ne vene. N'è ttiempo cchiù cchisto  
 De perderlo co sso trattenemiento.  
 Eccolo là. Già spona. Ll' aggio visto.  
 Via su, fegliule mieie, stateve attiento:  
 D' arme, e dde core agnuno stia provisto:  
 Mo mmo volanno ve faccio artevare  
 Addò le Scigne, che ghiate a trovare.

## XLIII.

Nà chesò, se vedette no cascione  
 Venì pe ll' aria pe ddinto a la grotta:  
 Quatt' aute viene, comm' a no pallone,  
 Lo portavano pesole, e dda sotto:  
 Uno da ccà le dea no scoppolone,  
 N'auto da llà le schiaffava na libotta,  
 Pe mmantenerlo sempe paro paro,  
 E non farle trovà carche riparo.

## XLIV.

Ma , n'che bbeddero ll' Uorco , lo lassajeno  
 Chiano chianillo calare nzi a nterra ,  
 E , lassatolo llà , se la scocciajeno .  
 Ccà ddinto è lo Scerocco ; e , azzò no sferra ,  
 Nchiuso chill' aute viente lo portajeno ,  
 Disse ll' Uorco ; jarrite terra terra ,  
 Non dobbetate : mettiteve a ffila ,  
 Ch' avite da passà pe la trafila .

## XLV.

Po pegliaie certe ppezze , e l' ammarraje  
 Ll' uocchie , azzò che n' avessero a ppaura ,  
 Ch' aveano da volare ; e le pportaje  
 Dint' a na grottecella stretta , e scura ,  
 Le mmese a ffila , e ppo accossì strellaje-  
 Armo , fegliule su , ca poco dura  
 Sto bbolà , che ffarrite . E , nmitto nfatto ,  
 Se mmoccaie sto cascione accossì ffatto .

## XLVI.

Nche ll' appe mmocca , le deze doie strente ,  
 Comme la gatta fa no sorecillo ;  
 E , nzerrate le mmole co li diente ,  
 Se l' aggliottile : po aprle chiano chianillo  
 La vocca , e l' abbottaje ; e rrente rente  
 A cchille ciucce stregne lo mussillo :  
 Cacciaje lo viento , che te le bbottaje ,  
 E ssecato ssecato le pportaje .

*Seompertura de. l' Arragliata VIII.*

DE LA  
CIUCCCEIDE  
ARRAGLIATA IX.



ARGOMENTO.

*Arrevate li ciucce, no remmore  
Fanno le Scigne, pe bbedè, ched' era;  
Ma la Reggina, che ll'appe nremore,  
Le rrecevete co na bona cera.  
Traseno a la Cetate, e ddinto, e ffore  
Vedeno mirabilia chella sera.  
Po se vanno a ccorcà, ca la Reggina  
Le bbo ammette a l'aodienza la matino.*

L

**M**Ente li ciucce, comm' a na froanella  
Jeano pesole pesole portate  
Da lo Scerocco pe la grottecella;  
Selleno, pe le fa trovà agghiustate  
Tutte le ccose co la Reggenella,  
Primma che lloso fossero arrevate,  
Llà, matino matino, se nne jette,  
La trovaie sola sola, e le decette:

Chiar-

## II.

Chiarchiolla mia (ch'accossì se chiammava  
 Chella, ch'era la capo de lo Regno,  
 E le ffeste llà ttanno commannava)  
 Chiarchiolla mia, aggio no gruosso mpegno;  
 Mm'aie d'ajutare, si vuo' bbene a bbava;  
 Aggio mprommisso de fa fa no ngiegno  
 A ll'asenielle mieie, che mme so ccare,  
 Quant'a cchist'uocchie, e ttu me puoie sarvare.

## III.

Selleno mio, le respose la Scigna,  
 Io, commè saje, stò fflaglio de faglio;  
 Ma, pe sservirte, che bbuo' che me mpigna?  
 Eccome ccà, spienneme nzò, cche bbaglio:  
 Pe te servi, mme venno mo na vigna:  
 Vuo' abburlà? me sbaratto nzì a lo maglio.  
 Dì, gioja mia, commaname a bbacchetta:  
 Non dico nò, si mbè vuo', che t'annetta.

## IV.

Fata mia bella, io sempe ll'aggio ditto,  
 Ca jere la Reggina de le ffe mmene:  
 Mme vuo' sconfonne? Parla zitto zitto,  
 Simmo nfra nuie, leva mo ssi tremmene.  
 Io t'aggio da sevrìre; e echesto schitto?  
 Chiammaname quanno ccà fanno le sse mmene,  
 Ca, nquatto botte te caccio no maujo:  
 Vao puro pe llotamma a lo precujo.

Ma

## V.

Ma, pe pparlarte propio nconfidenza, -  
 Aggio abbesuogno de no centenaro,  
 E ffuorze cchiù de Scigne. E che schafienza  
 Mme vaie decenno? Nne vuo' no megliro?  
 De Scigne venì pozza la scaienza.     i  
 Vide pe lloco, tè! nce nn'è no maro.  
 Pegliatenne porzì no melejone,  
 Ca mme lieve na gran soggezzione.

## VI.

Oh che ssia benedetta! sso pparlare  
 Schitto mme sazia. Va cerca mpiacere.  
 A ccarch' un'auto, porzì lo ccacare;  
 Ca te lo nnega, e tte lo ffa a bbedere,  
 Va, figlia bella, che ppuozz' aonare,  
 E sso regno se pozza mantenere  
 Pe nzi a la scolatura de lo Munno,  
 E ssi pirchie, che ppozan' i a zeffunna.

## VII.

Ma siente: s' ha da fare no Castiello,  
 E cciert' aute arresidie pe la Terra  
 De lo Brè de li ciucce; e ppe st' appiello  
 M' abbesognano chelle, che la terra  
 Sanno ternere, e ppo co lo zappiello  
 Fanno la cauce. E lo guaie, che t' afferra:  
 Che non te piglie nzi a le llatronare?  
 Spacca, e ppesa, e ffa chello, che te pare.  
 Quan-



## VIII.

Quanno vuoie, che le mmanno? Nò, pe ogge  
 Veneno ccà li ciucce, e sse le ppigliano.  
 Sa, ch'aie da fa? Besogna, che l'alluogge  
 Na sera, o doie, pe nzì cche rrepigliano  
 No po de sciato pe fflore a sse llogge:  
 Ca li scure; pe ccorre, s' assottigliano,  
 Comm'a no spao: e ppo puoie carrecarele  
 Ncopp'a llo ro medeseme, e mmannarele.

## IX.

N' accorr' auto. Vattenne alleramente,  
 Vavone bello, ch'è ppenziero mio  
 De farele restà tutte contiente.  
 Figlia, tu mm'aie levato sto golio;  
 Ed io non te sarraggio scanoscente:  
 Cercame nzò cche bbuoie, ca ccà stongh'io.  
 Io no mmoglio auto, che mme state buono.  
 Schiavo. Puoze stà sempe comm'a ttruono.

## X.

Partutose lo viècchio, fa chiammare  
 Chiarchiolla le bbajasse, e ffa allestire  
 Na quantetà de fieno. Po annettare  
 Fa no gran cammarone, che sservire  
 Pe ccellaro potea; nce fa jettare  
 Trenta rite de paglia, pe ddormire:  
 Essa propio jea attuorno, e stea a bbedere;  
 Sempe decenno: Avimmo forastiere.

Già

## XI.

Già lo Sole, correnno, er' arrevato  
A la taverna de miezocammino;  
E pparea, che se fosse llà ffremmato;  
P'arrefrescarse, e ppe pprovà lo vino:  
Ll'ombra, che mmo da nante, e mmo de lato  
Va sempe a ll'ommo vicino vicino,  
Pe non sentì lo caudo, era sparuta,  
E ssott' a isso s'era annasconnuta:

## XII.

Quanno li ciucce ascieno da la grotta,  
Pe ddo aveano volato, stretta stretta;  
E, nch' ascieno, facettero na bbotta,  
Comme quanno se spara na scoppetta:  
La palla, che stà dinto, quanno sbotta,  
Fa no fracasso, e bbà pe la staffetta,  
Pecchè primmo d'ascire a ffa sto vuolo,  
Era corza pe ddint' a lo cannuolo.

## XIII.

Ascieno a na campagna rasa rasa,  
Ma lloro no la veddero: ca nchiuse  
Teneano ll' uocchie, che nc' era rommasa  
La pezza ancora. Ma, nche ffuieno schiuse,  
Da na frotta de scigne, che stea spasa  
Pe llà mmiezo, restaieno cchiù cconfuse:  
Pocca sentieno fà no gran remmore:  
Chi so cchiste, che sso sciute ccà fiore?  
Sore

## XIV.

Sore mia, e che ppiezze de mammune?  
 Chiammammo aggente, pe bbedè ch'è cchesso?  
 Venite ccà: portate li cannune:  
 Corrite: non sapimmo ch'è ssocciesso:  
 Priesto priesto, cevate li focune,  
 Ca già vonne scappà: jammole appriesso:  
 Portate spate, scopette, rotelle,  
 Spontune, zappe, pertecche, e ccortelle.

## XV.

Tanto fuie sso fracasso, e sso remmore,  
 Ch'arrevatte pe nzi ddinto a la Terra:  
 Ccà cchiù ecresce, tanto che ghie nzentore  
 A la Reggina; e nzentì ch'a la sfera:  
 Deano tutte de mano, p'ascì fore,  
 Zompa essa ncoppa, trase dinto, afferra  
 No bastonciello, ch'era d'oro fauzo,  
 E ppo se jetta abbascio co no sbauzo.

## XVI.

Non correno, ma volano, e, scorrenno,  
 Esceno fora pe cchielle ccampagne;  
 Vanno pe ccà, e ppe llà, sempe vattenno,  
 Pe ttrovà ssi mammune, le ccarcagne.  
 Arrivano addò stevano; e, bbedenno,  
 La ccanoscìe Chiarchiolla: Eilà, ccompagne,  
 Eilà; non sia nesciuna, che le ttocca,  
 Ca le faccio ascì ll'arma mo ccà minoceca.  
 Com-

## XVII.

Comme, mmedè li cane, ch'abbajanno  
 Correno neuollo a uno dint'a ll' uorto,  
 Vola lo parzonaro, e bba sbroffanno;  
 Si nc'aseia lo compare mieto muorto:  
 Passe ccà? passe llà? le bba scostanno,  
 E ppo se scusa, ch'avea visto stuorto;  
 Accossi, pe ssarvarle da sti guaje,  
 Facette la Reggina, e ssecotaje:

## XVIII.

Scioglite chelle ppezze, c'hanno nfronte:  
 Accossi bboglio. Nzenti: Accossi bboglio;  
 Jettaieno ll'arme, e ecco le mmano agghionte  
 Steano tutte a bbedè, ch'era sto mbruoglio,  
 Certe po fanno a ppunia a cchi le sponte  
 Ll'uocchie; ma chille aveano fatto ll'uoglio,  
 Tanto ch'a mmala ppena se rejevano,  
 E ggià ghiacovo jacovo facevano.

## XIX.

Ma, nche le ppezze le fuieno sciogliute;  
 Nche rrapettero ll'uocchie, e le bbedettero,  
 Cadieno nterra tutte addebbolute:  
 Acqua,acqua.Pegliat'acqua.Acqua. Correttero  
 Llà bbecino a no fuosso; e ppo venute,  
 Da la capo a la coda le nfonnettero;  
 A ll'autè sì, ma nò a lo ciucciariello,  
 Che non fice auto, che no resariello.

Re-

## XX.

Revenute , Chiarchiolla le facette  
Na manejata de ciceremuolle :  
Po , pe non darle nfado se nne jette :  
Restaïeno ll' aote , e cchi co le mmanzolla  
Le fa no carezziello , chi le mette  
Na pollecara ncanna , chi a li cuolle  
S' appenne , e lebbaveja ; e cchi se nzecca,  
Pe llevarle da reto carche zecca .

## XXI.

Ma tutte quante stavano stordute  
A bbedè chelle ccude , che pportavano ;  
Tanto che te l'aveano nzallanute :  
Le ttocavano , e ppo le rretocavano ,  
E nno ntanto ll'avevano scompute  
De toccà , che dda capo accommenzavano ;  
Ch' uno , ch' era geluso no morzillo ,  
Stie mpizzo d' azzeccarle no caucillo .

## XXII.

Po H' una a ll' autà jevase mmeranno ,  
E non se vedea coda da dereto ;  
Pe cchesto , cammenanno cammenanno ,  
Pe non se fa a bbedere maie da reto ,  
Nnanze a lloro se jeano quartejanno ,  
E cquase sempe co no passo arreto :  
Gran vetoperio , mmiezo a ttanta cude ,  
De comparere accossì nnude , e ccrude !  
Co

## XXIII.

Co ssi carizze, e cco ssi frusciamente  
Arrevattero dinto a la Cetate.  
Oh che ccosa de spanto! Traspariente  
Pareano de crestallo nzì a le strate;  
Le ccase, e li palazze straluciente  
Pareano tutte d'oro ntonacate:  
Ma va nce trase? Tutt'era llà finto,  
E non nc'er' auto, che no muro tinto.

## XXIV.

Fente erano le flogge, e li bbarcune;  
Fente le bbetrejate, e le pportelle;  
Finte li titte, co li torriune;  
Finte li potecuozze, e le ccastelle,  
Li soppigine, li trave, li portune,  
Li mierole, le ttenne, le ccancelle:  
Tutto quanto era finto; e, mmeretate,  
Parea na scigna de na gran Cetate.

## XXV.

Chesto no lo ffaceano, pecchè lloro  
Fa non poteano ssa manefattura;  
Pocc'aveano, pe ffare sso lavoro,  
Le mmano, comm'agn'auta criatura:  
Ma sulo, pe no genio, e n' antecoro,  
C'hanno tutte le scigne pe nnatura,  
De ire sempe appriesso a l'apparenzia,  
E nnon fa cose maie de sossestenzia.

Sulo

## XXVI.

Sulo na casa nc' era , ed era chella ,  
 Addò steva abbetanno la Reggina :  
 Chesta teneva na gradejatella ,  
 Co na sala , na cammara , e ccocina ;  
 Abbascio nc' era quarche ccammarella ,  
 Co ccerte llogge , e ssotta na cantina ,  
 Ch' era chella , ch' aveano apparecchiata  
 Pe li ciucce , e stea tutta affommecata .

## XXVII.

Llà ddinto le ttrasëttero , addò steva .  
 Apparecchiata rrobba da magnare :  
 Le dissero , si nc' era chi voleva  
 Smorzà no poco , llà se potea stare ;  
 E ssi carchedun' auto se senteva  
 Stracquo , llà ppuro se potea corcare ;  
 Ca nc' era paglia , pe mmagnà , e ddormire ,  
 E lloro erano llà , pe le sservire .

## XXVIII.

Che sservì ? Jatevenne , ca nuie stammo  
 Meglio ccà , nfra de nuie , sule sulille ,  
 Jatevenne ; ca mo nc' arrecettammo ,  
 Ca pe ddirela , stammo stracquolille .  
 Comme volite , nuie mo nce ne jammo .  
 Ve restammo obbredate a mmille a mmille .  
 E , rrestate llà ssule , se magnajeno  
 Meza la paglia , e ppo se nce corcajeno .  
 Men-

## XXIX.

Mente steano dormenno, la Reggina  
Chiamma tutte le Scigne, e le cconziglia :  
Figlie, chillo a sto Munno l'annevina,  
Che ffa le ccose senza parapiglia;  
E cchi vace cchiù adaso, cchiù ccammuna:  
Mperzò se sole dice, ca la figlia  
Fa cecata la gatta pe la pressa,  
E ppo nc' ha da stentare la mastressa.

## XXX.

Pe cchesto mo, no mmoglio dare aodienza  
A cchisse forastiese chesta sera,  
Dimano sì. Pe ttanto s'accommenza  
Agnuna de vuje aute de manera  
A bbestì, che nce sia na comparenza  
Co na gala de spanfio, ch'aggia cera  
De chella, ch'anne arreto se facette,  
Che te fice restà chi la vedette.

## XXXI

Ntratanto ssi conziglie se facevano,  
Li ciucciariille se jieno scetanno:  
Le ntesero le Scigne, che le stevano  
Servenno, e ppe llà fflore passejanno,  
Trasleno dinto; e, mmente se sosevano,  
Diss' una: Volimm'ire cammenanno?  
Si volite vedè la Gallaria,  
Saglimmo ncoppa, e ve faccio la via.

Sa-



## XXXII.

Saglieno ncoppa , e mmiezo a lo cortiglio .  
 Trova'eno quatto , o cinco cammarelle ;  
 Traseno. C'ha che ffare lo Cerriglio  
 Co tutte li vrasiere , e le ttielle ;  
 Agnuno te pareva cchiù de no miglio ,  
 Co ttanta lontananze , e lloggetelle :  
 Ma n'erano lo vero ; erano pente  
 A pprospettiva , e ppuro erano fente .

## XXXIII.

La primma era de statole de stucco ,  
 A colore de marmora lucente :  
 Nfacce nce stea no viecchio , che lo mucco  
 Le scennea da lo naso nzì a li diente :  
 E mmano se tenea no stojavucco ,  
 Creo , pe s'annetare ; e straluciente  
 Aveva ll' uocchie , co na lacremella ,  
 E tteneva na facce affrettolella .

## XXXIV.

Chisto fegnea ciert' uommene mmarditte ,  
 Che dde tutte li vizie so mpastate ;  
 Ma co ssa facce , e cco cchiss uocchie affritte ,  
 Fanno la scigna a ll' uommene norate :  
 Deceano , ch' era Senneca ; e ppo scritte  
 Nc' erano certe llettere nnaurate :  
*N' abbesogna maie credere a le bbuce ,  
 Ca n' è tutt' oro nò chello , che lluce .*

Ap-

## XXXV.

Appriesso a cchisto nc'era na fegura  
 D'uno, che pparea n' Ercole vestuto,  
 Ch' a pprimma vista te mettea a ppaura:  
 Tenea na capo de puorco zannuto  
 Ncopp' a la capo soia, co n' armatura  
 Mmano, ch' era no spruoccolo appontuto,  
 E mponta nc' era na saglioecolella  
 Tutta chiena de punte de centrella.

## XXXVI.

Era Alisanthro, che ppe la prejezza  
 Era juto mpazzia lo poveriello:  
 Facea la scigna a cchillo pe ggrannezza,  
 E sse chiammava ll' Ercole noviello.  
 Sott' a cchist' auto, chino de monnezza  
 Se leggea, co ggra stiento, sto cartiello:  
*Pe ste mmalenconie nce vo chell' uorgio,*  
*Che stà a la Speziaria de Masto Giorgio.*

## XXXVII.

De esse Statoe nce nn'era na provista  
 Dint' a sta cammarella, che le ghiettero  
 Vedenno a una a una; e ppo, che bbista  
 Ll' appero tutta quanta, se nn' ascettero.  
 Asciute da llà ddinto, a ffa na vista  
 A la seconna cammara, trasettero.  
 Chesta era tutta chiena de scanzie,  
 Chi co pportelle, e cchi co gelosie.

F

Nn'

## XXXVIII.

Nn'aprieno una, che stev' a mmano manca,  
 E nce veddero tanta carrafelle,  
 Tutte chiene de n'acqua janca janca:  
 A n'ato pizzo po cert' arvarelle  
 Co ccierto rrusso dinto; e ppo na vranca  
 De certe, che pparevano moschelle.  
 Disse no ciuccio: Che ssongo ste ccose?  
 Una, pe ffa la Scigna, le respone.

## XXXIX.

So tutte bobbe, e sserveno pe ccerte,  
 Che tteneno le ffacce nere, e bbrutte,  
 Vierde, comm'aglio, e ppareno lacerte:  
 Cheste, pe pparè belle, se so struttè  
 A sceregà la facce, e li lacierte  
 Co st'acqua janca; e sse so ttente tutte  
 Le mmasche, nzi a le labbra co sto rrusso,  
 E pportano sse mmosche nzi a lo musso.

## XL.

Dinto a n'auta nce steano li medielle  
 De li mantò, de scuffie, e ssacristane:  
 E cchiste, disse, serveno pe ccelle,  
 Che bbonno fa la scigna a le ccampane,  
 E, cco ste ceude, nzi a li ciucciarielle:  
 Ma chesto è ppoco: pe nzi a li tiane  
 La vonno fare, e bbanno peste peste  
 Portanno ncapo coperchiole, e ttieste.

Po-

## XLI.

Popate a mmucchio, co li Pellegrine,  
 Co li Cappucce, e cco li Priggioniere:  
 Certe co l'Antriè, e li Perocchine,  
 Che ppareano ceriffe de galere:  
 Chi co li Schiavottielle, e Palladine,  
 Co le mmanizze de tutte manere.  
 Smorfie, che se veden' accacciare  
 Pe ffa la scigna, e ghieta li denare.

## XLII.

De cheste, e aote ccose, che servevano  
 Pe le ffeffene, mille nne vedettero;  
 E mmente tutte quante le bbedevano,  
 Cchiù de na resatella se facettero;  
 E ppo a la terza cammara, addò stevano  
 Le ppetture, e li quate se nne jettero,  
 Che nn'era chiena, e aveano le ccornice  
 Fatte, comm'oro, ma co la vernice.

## XLIII.

Apprimmo apprimmo nc'era no quatrone,  
 Che nce steva la storia de chill'auto,  
 Che bboze fa la scigna, e mparagone  
 D'Apollo, se mette a ssonà lo frauto;  
 Ma male le rescie la mmenzione:  
 Pocca chillo, che nn'era lo masauto,  
 Passaielo a ppiede chiuppe co no trillo,  
 E ppo lo scortecaie, comm'a ggattillo.

## XLIV.

Se vedeva Marzullo poveriello ,  
 ( Ch' accossi se chiammaie sto sonatore )  
 Attaccato depietto a n' arvosciello ;  
 E Febbo neuollo , comm' a tradetore ,  
 Levanno te le jea co lo cortiello ,  
 Sott' a la pella , chillo mal' ammore :  
 Isso tenea na facce , che ppareva ,  
 Che non potea fa cacca , e sse spremmeva.

## XLV.

Accanto a isso stevano chiagnenno  
 De Satore , e dde Sninfie na marmaglia :  
 Steano tutte sorriessete vedenno  
 Chillo cortiello co cche arraggia taglia ;  
 E ssotta , comme jevano scorrenno  
 Le llagreme de chella gran canaglia ,  
 Nascea no sciummo , che pe cchilli guaje  
 Marzia da Marzullo se chiammaje.

## XLVI.

A n'auto quatro nc' era lo retratto  
 De Sarmoneo , che ttutte avea squagliato  
 Le cconcole de Grecia , e nn' avea fatto  
 No ponte , pe ddo isso strascenato  
 A rrompecuollo int' a no tir' a cquatto ,  
 Facea la scigna a Giove lo sciaurato :  
 E cco sso cciampejà , co ccerte bampe  
 Se jea spassanno a mmenà truone , e llampe.  
 Lo

## XLVII.

Lo bbedea Giove, e le decea: Che ffaje?  
 Vi che ffreoma! t' aspetto quanto pozzo.  
 A ca mo, a ca po, ca oie, ca craje,  
 Ca pescraie, ca pescrigno, ca pescruozzo  
 Mette jodizio. A ll' utemo sferraje,  
 Vedenno, ca nc'avea fatto lo cuozzo;  
 E cco na botta de frùolo pazzo  
 Peglià le fce chillo gra mmallazzo.

## XLVIII.

Mente tutta la mmorra stea ncantata  
 A bbedè chesto, no ciuccio, che steva  
 Poco descuosto, auza no strillo: Uh tata,  
 Tata mio, tata mio, che nne voleva  
 Fa de venì a bbedere sta frettata?  
 Uh quanto facea meglio, e mme nn' asceva.  
 Corzero tutte quante a lo strellare:  
 Ched' è sso chianto? Ch' è sso ppeccejare?

## XLIX.

E cche bbo esse? Ecco ccà tata mio  
 Chisso, che stà a sso quatro, chiss' è isso.  
 Gioja, da dò te venne stò golio?  
 Che nne volive fare? Uh, tè, marisso,  
 Che le fanno! Ched' è? Uh, lo ssacc' io,  
 Ch' era fegliulo, quanno fuie ss' aggrisso.  
 Ndì chesto, ll' auti ciucce se mettertero  
 A cchiagne, ca porzì lo canoscettero.

## L.

Era chessa la storia de lo ciuccio,  
 Che bboze fa la scigna na giornata  
 A lo liono; e, ppe ffa lo galluccio,  
 Non ssaccio comme, s'aveva abboscata  
 Na pella de liono, e no cappuccio  
 Se nn'avea fatto; e ppo jea pe la strata  
 Nnanze a li lupe co na posetura,  
 Credennose de metterle a ppaura.

## LI.

Chille apprimmo, vedennolo, scappajeno;  
 Credennolo da vero no liono:  
 Ma nche a la voce po se nn'addonajeno;  
 Ch'era no ciuccio, e cch'era fenzione,  
 Se le ncanaieno ncuollo, lo sbranajeno,  
 E nne fecero justo no voccone:  
 Le levaieno accossì la vezzarria,  
 Ca no nce ane restaie manco na cria.

## LII.

Mmedè chesto, restaieno de manera  
 Destorbate li ciucce, che n'avevano  
 Cchiù bboglia de vedè ll'auto, che nc'era.  
 L'allummaieno le scigne, ca nce stevano  
 De mala chella, ota ca po era sera,  
 E ll'ombre da li munte già ccadevano:  
 Potite reterarve a la cantina,  
 Dissero, a rrevederce crammatina.  
*Scompetura de l'Arragliata IX.*

DE LA  
CIUCCEIDE  
ARRAGLIATA X.



ARGOMENTO.

*A ghiuorno hanno li ciucce la chiamata ,  
Ca la Reggina le bbolea sentire :  
La trovano , che steva apparecchiato  
De na maniera , ch' era da stordire .  
Lo Ciucciariello le fa l' ammasciata ;  
E dapò li remmure , che a ssortire  
Nc' appera pe li ciucce , che nce jettero ,  
Contiente da l' audienza se nn' ascettero .*

L

**S**E nn' era Mastro Febbo già ttornato  
Da l' Antripete , e lluoche commecine ,  
Che ll' avea lo carruocciolo affittato ,  
Pe ffa la Festa de li Battagline .  
Le zzoccole , ch' aveano pazziato  
Mmiez a la chiazza , abbascio a le ccantine  
S' erano ncaforchiate ; e dda pe tutto  
S' era già lo zoffritto miezo strutto .



## II.

Quanno li ciucce, ch'erano scetate,  
 Sentieno ncoppa fa no gra rremmore,  
 Po lo sentieno pe le ggradejate,  
 E all' utemo na Scigna, che dda fore  
 Le decea: site tutte apparecchiate,  
 Ca già è bbenuto ccà lo Mmasciatore?  
 Simmo leste, resposero, trasite,  
 Stammo tutte a l'allerta, che bbolite?

## III.

E bbecote trasì na manejata  
 De scignuotte vestute da Volante;  
 Ch' no Scignone faceano la strata,  
 Che te pareva no Caaliero arrante.  
 Largo. Facite largo. Da l'antrata,  
 Segnure mieie. Levateve da nante.  
 Reterateve tutte a no pontone,  
 Si nò, non se pò fa la fonzione.

## IV.

Scompute sti fracasse, trasle dinto  
 Lo Scignone vestuto a la besbeteca;  
 Bello, che te pareva no cuccopinto;  
 Ma pareva, che ppatea no po d'arteteca:  
 Parev' uno, c' ha bbinto, e cche n' ha bbinto.  
 E bba parlanno sulo, e ssempe leteca  
 Nfra isso, e isso; e bba quase mpazzia,  
 Che ffa crepà le ggente pe la via.

Ict-

## V.

Jettato ncuollo avea no cappottiello;  
 Ch'era na straccia de setiglia sfatta:  
 Ncapo tenea carcato no cappiello,  
 Ch'era na cosa longa, tonna, e cchiatta;  
 A ll'uso propio de no cantariello:  
 Da ll'una, e ll'aota banna nce stea fatta  
 Na scelletella, ch'aveano scèppata  
 Da na povera Cola sfortonata.

## VI.

E n'ato paro, puro comm'a cchelle;  
 Nn'avea a li piede: mmano, nzanetate,  
 Tenea na mazzarella de nocelle,  
 Co ddoie scorze de sierpe ntorcegliate.  
 Deceano, ch'era chillo, che le zelle  
 Sape de Giove, e pporta le mmasciate,  
 Chillo, ch'addò nc'è bbuglia, e cosa peo,  
 Fa strunzo mmiezo co lo Cadoceo.

## VII.

Arrevato che ffluie, se mette nchianta;  
 Rape la vocca, e ghietta ste baviglie  
 O de ll'auta, asenesca, orreda schianta  
 Belle, anemuse, allevrecate sguiglie!  
 Schianta, che ppe ssi sguiglie ogge se vanta,  
 Sguiglie de ssa gra schianta ammate figlie.  
 Schianta, e sguiglie, che ssimmele a lo Munno  
 Sguiglie, e schianta no ll'asce e bbota a trunno.

F 5

Gio-

## VIII.

Giove, che de le nnuvole pecciose  
 Corcato stà ncopp' a li matarazze,  
 E ll'aote Addeità, che ccorejose  
 Stanno aspettanno, e fanno comm'a ppazze,  
 Ve chiammano. Corrite: e le mmancose  
 Tate a bbasà, ca no ve danno mazze.  
 Venite su, venite a la ncorrenno:  
 Giove aspetta, io so ccà, e bbe stò sservenno.

## IX.

Che cchiove, e schiove? Chisso stà mpazzuto.  
 Nuie volimmo parlare a la Reggina,  
 Disse no ciuccio, sso Giove addò è sciuto?  
 No mporta, Signorè: Uscia cammina,  
 (Sferra na Scigna, che ll'avea sentuto)  
 Ca po vide si chisto nc'annevina.  
 Bene, dissero ll'aute: già ch'è cchesso,  
 Cammenate, ca nuie venimmo appriesso.

## X.

Chiano. All'ordene, spara la Majesta  
 De zeremonie, e ll'ordene sia chisto:  
 Jarrà, comm'è bhenuta, primmo chesta  
 Barbuglia de lacchè, po pisto pisto  
 Secotarrà Mercurio, e ffarrà ttesta  
 A bbuje aute: nfra vuie, comm'aggio visto  
 Prattecà, creo, che ddarrà sempe luoco.  
 A chi ha chiù anne, uno, che nn'ha chiù poco.  
 De

## XI.

De lo riesto, si nc' è carcat' aomanza  
 A lo pajese vuosto, ve potite  
 Arregolà, còmm'è la costomanza.  
 Facite tutto chello, che bolite,  
 Resposero li ciucce, ca crejanza  
 Non s'ausa nfra nuie, comme sapite:  
 Jammo a la bbona, e nno nc'è nnanze, o arreto,  
 Ca vò agnuno de nuie campà cojeto.

## XII.

Già ch'è cchesso, abbejateve, fegliule,  
 Ascite fore, e ppo jate a bbotare.  
 Li ciucce jeano mo, comm' a ccetrule,  
 Nnanze, e arreto: mo jeano pare pare,  
 Mo a ttre, mo a cquatto, e cquanno sule sule;  
 Ma qua bbota, che ghieano pe ppassare  
 Nnanze a lo Mmasciatore, le correva  
 Ncuollo la Masta, e tte le tiratteneva.

## XIII.

Co sso ght nnanze, e cco ss' artetochella,  
 Ch' avevano li ciucce cammenanno,  
 Tant' uno s' avanzaie, senza che cchella  
 Se nue fosse addonata, ch' azzeccano  
 Se jìe a Mercurio; e l' afferraie na scella  
 Co na ponta de pede, pezzecanno;  
 Ma pecchè ffuie no pizzeco de ciuccio.  
 Le fice fa lo casecavalluccio.

## XIV.

Piglia la scella, e ppecchè non fuie leste  
 A aizà lo pede, ment' isso l' afferra,  
 Chillo va a ccammenà: mponta: ch'è cchesto?  
 Tira, non vene, e bbà de musso nterra:  
 A lo tterà, se nne vene lo riesto  
 De la scella: vo aizarese, e le sferra  
 Lo cadoceo: torna a ccadè, e sse sparte  
 La mazzarella, e sse nne fa di parte.

## XV.

Va pe 'ssosirse fà seconna vota,  
 E ttorna a ccadè nterra; e mmente piglia  
 Sto tierzo nciampecone, se revota  
 Lo cadoceo, e straccia la setiglia.  
 Stracciata la setiglia, chillo sbota,  
 Piglia lo cantariello, e sse lo sciglia:  
 Po se nne va ammosato a no pontone:  
 Facitevella vuie la fonzione.

## XVI.

Lo ciuccio de Selleno, che mbrogliata  
 Vede la cosa, pe nc' arrearare,  
 Se vota, e ffa na gra nfrocechejata  
 A lo ciuccio; po corre, p' accoietaie  
 Mercurio: Aie ntiso? nce ll'aggio cantata  
 A cchella bestia. Tu mo che bbuo' fare?  
 Venga da chi la tene la prodenzia,  
 Che te ll' aie da peglia co no schenzia?  
 Si

## XVII.

Si è schefenzia, che bbaa a contrattare.  
Co ll' aute schefenzuse pare suoje,  
E llassa fa chello, che s' ha da fare.  
Dice buono. Aie raggione: ma che bbuoje  
Fa? Abbesogna quà bbota, sopportare.  
Priesto mo, ca n' è nniente: vi si puoje  
Acconcià sse bagaglie? Io non saccio  
Che bbuo' acconcià, si no nce nn' è ppetaccio?

## XVIII.

Via su, pigliate tutte sse coselle,  
E ghiammonce accossine, ca n' è nniente.  
Chillo, che steva co le cchiancarelle  
Sbotate, corre, e straccia co li diente  
Nforejato lo riesto de le scelle,  
Se piglia tutte ll' aute ngrediente,  
Co la setiglia, nne fa no mmattuoglio,  
Vota vico, e le llassa int'a sso mbruoglio.

## XIX.

Che ffacimmo? ( li ciucce sbentorate,  
Nche se veddero senz' ammasciatore,  
Restà mmiezo a la via fridde, e ghielate )  
Saglimmo ncoppa, e aspettammo llà fiore.  
Tornano arreto, e ppe le ggradejate  
Mente jeano saglienno, lo remmore.  
Se ntese dinto, addò stea la Reggina,  
Pocca la gradejata era vicina.

Chi

## XX.

Chi so echisse, che saglieno? se vota .  
 A no paggio, che steva a lo portiero.  
 Chillo corre: Signora, a cchesta vota .  
 Già veneno li ciucce. Via, portiero,  
 Stà ncellevriello. E ncignaie na revota  
 Dint'a la sala: agnuna stea mpenziero  
 A ffa la parte soja, agnuna tocca  
 A mmettere a lo pizzo, che l'attocca.

## XXI.

Arrevate li ciucce: Quanno veno  
 Lo Mmasciatore? le disse no paggio.  
 Ll'è afferrata na cosa, e mmo revene,  
 Respose l'Aseniello. Mo jarraggio  
 A dirlo dinto. Corre, e ttrase: Bene,  
 Repreca la Reggina: pe bejaggio  
 Schitto servea; già chisse so bbenute,  
 Ch'entrano. Tutte attiento, zitto, e mmutite.

## XXII.

Segnure mièje, facite faore,  
 Esce lo paggio: tterre a lo portiero.  
 Traseno, auzano ll'uocchie. O che stopore!  
 Agne cciuccio restaie, comm'a ssommiero:  
 Non sapeano, che ffare, e dd'ascl fore  
 Già quase quase stevano mpenziero:  
 Ched'è? se n'addonaie lo Ciucciariello:  
 Stateve sode, state ncellevriello.

Stea-

## XXIII.

Steano llà ddinto, comm' a scanneliere,  
 Da ccà, e dda llà, a l' allerta trenta scigne,  
 Tutte co li trobbante, e ppennacchiere;  
 Armate, chi de tareche de ligne,  
 Chi d' arche, e spate, e cchi co li lampiere  
 De ntorce a biento, e sciaccole de pigne:  
 A le mmura nce stea n' aparamiento,  
 Che na scunma pareva d' oro, e dd' argento;

## XXIV.

Ma chi se nc' azzecava echì becino,  
 Ch' era oropella subbeto vedeva.  
 Lo lavoro era bello, e stea chine  
 Tutto de frunne, e sciure. Po nce stava,  
 P' ogne fferza, no quatro: e no pottino  
 Avea da sotta, che lo manteneva:  
 Dinto nce steano certe storielle,  
 Comm' a cchell' aote de le ccammarelle.

## XXV.

Nfacce a no muro stea no tiatriello,  
 Fatto a lo muodo de na gradejata:  
 Traseva minto, e cco no cantonciello  
 Ascea da ccà, e da llà, che, speccecata  
 Pareva, senza votà lo cellevriello,  
 Na fella de melione rosecata:  
 Lo primmo grado steva auto da terra  
 No parmo, e muniso, o poco cco, che sferra.  
Ncop-



XXVI.

Ncopp' a la gradejata se contavano  
 Dudece casarelle, e ttutte stevano  
 Chiene, fore che una, e l'accopavano  
 Unnece scigne. Cheste comparevano  
 Vestute a ll'uso, comme se pittavano  
 Ll'unnece Addeità, ch'esse fegnevano;  
 L'Addeità cchiù ggrosse, e nce mancava  
 Mercurio, che no nse nce trovava.

XXVII.

Chella, ch'era la primma a mmano manca;  
 Facea la Dea Cerere, e ammantata  
 Co na cammisa stea de tela janca:  
 Duie sierpe la teravano assettata  
 Ncopp'a no carro: mmano avea na vranca  
 De papagne: la capo era ntrezzata  
 Co na corona, ch'era tutta chiena  
 De spiche jonne jonne d'uorgio, e bbenà.

XXVIII.

La primma a mmano ritta era Dejana;  
 Che ffacea tre ccomparze defferiente:  
 Co na paglietta ncapo, e cco na cana,  
 Fegnea jl a ccaccia: co li duie serpiente;  
 Che ttenea mmano, avea na mmerejana  
 De Furia; e, cco no specchio trasparente,  
 Facea la Luna; e stea ncopp'a no carro,  
 Terata da doie vacche, si no sgarro.

A 10

## XXIX.

A lo gradino appriesso nc'era Apollo;  
 Co lo carruoccihillo, e li cavalle:  
 Le penneva la cetola a armacuollo,  
 E nfacce avea li ragge d' oro gialle.  
 Da ll' aota banna, co na lanza neuollo  
 Stea Marte, co le ccosce, pietto, e spalle  
 Tutto ngiaccato: mmano avea la spata,  
 E a lo scuto na Furia stea pittata.

## XXX.

J Il' autò nc'era Vennera, e Borcano:  
 Chella terata da li palommielle;  
 Chisto da tre Cecrope, e aveano mmano  
 Lo mantece, l'ancunia, e li martielle.  
 Ncoppa stea Palla co n' Ascio, e no Cano  
 Ncapo d' auliva avea li ramoscielle:  
 Mmiez' a lo piett' a bbotta, che pportava,  
 La coccia de Medusa serpejava.

## XXXI.

Nc'era Nettuno co la cincorenza,  
 Chino de pisce, e dd' aleche de maro:  
 Cchiù nn' auto steano senza precedenza  
 Gionone, e Besta, bello, paro paro:  
 Tutte doie co lo sceltro, e ttutte senza  
 Armatura. Avea chella no panaro  
 De granata, ch'est' ha li torriune,  
 Da payune terate, e dda liune.

Ncop-

## XXXII.

Ncopp'a ste ddoie, cchiù nn'auto, e ncopp'a ttutte,  
 Che bbenea a esse a lo sesto gradino,  
 Nc' era Chiarchiolla, che nn' aveva strutte  
 Arvarelle de cuoncio lo cchiù ffino,  
 Pe ffa ssa mosta! Quanto te l'aggliutte  
 Sta vota. Stea sott'a no bardacchino  
 Lavorato da penne de pavone,  
 E n'Aquela stea sotta a no pontone.

## XXXIII.

Jea co na veste janca, e ttutta stelle,  
 No varvone apposticcio, e na quaquiglia,  
 Co na corona fatt' a ppezzielle,  
 Che, ccomm'a na cepolla, quanno sguiglia,  
 D'oro brattino avea li raggetiello:  
 Teneva mmano po na carrettiglia,  
 Co no truono mpizzato, e dda duie mazze  
 De tricchetracche, e dde frùole pazze.

## XXXIV.

Chest'era la comparza, che stordute  
 Fice restà li ciucce, nche ttrasleno.  
 Trasute dintò, no ntanto scompute  
 Fuieno ll'alleverenzie, che ffacieno,  
 Che rrestaïeno de nuovo nzallanute:  
 Pocca li Deje, nche lloro scompleno,  
 S'accommenzaïeno tutte a ffreccecare,  
 Che ffuie na cosa da strasecolare.

Aje

## XXXV.

Aje visto no presebbio, che se fricceca,  
 E tutto nziemo le vene l'arteteca?  
 Chi cade, chi se sose, chi se mpicceca;  
 Chi nfora, chi arresedia, chi leteca,  
 Chi na matassa de filo te spicceca,  
 Chi fa caso recotta a la besbeteca:  
 Esce a lo rreto no cacciatoriello,  
 Sisca, va, vede, spara, e ffa l'auciello.

## XXXVI.

Accossì a ffreccecà s'accommenzavano  
 Chelle, che ncopp' a lo tiatro stevano;  
 Li cavallucce d'Apollò zompavano,  
 Li liune de Vesta se sosevano,  
 De Cerere li sierpe cotelavano,  
 Le bbacche de Dejana se movevano,  
 Co li palumme Vennera, e Gionone  
 Se vidde scellejà co lo pavone.

## XXXVII.

Mmiezò a sto ffreccecare se votaje  
 Giove a na scigna, e le disse: Dà fuoco:  
 E cchella, co no miccio, s'azzeccaje  
 Vecino a isso: scioscia, e a ppoco a ppoco  
 Li chille, ch'avea mmano, l'allommaje.  
 Allomm te che ffuieno, p' ogni llucò  
 Te vediste squiglià, comm' a cconiglie,  
 Frùole, tricchetracche, e ccarrettiglie;

E, a

## XXXVIII.

E, a lo rreto, no truono, che na bbotta  
 Fice, che lo solaro nne tremmaje.  
 Nzentli chesto li ciucce cacasotta  
 Scappano: Vi addò mine? Vi che ffaje?  
 Vonno fùl; se mmesteno; e cchi sotto  
 Cade, e cchi ncoppa; e a cchelle l'afferraje  
 Na risa, che dda mano le scappajeno  
 Le rretene, e nno cchiù se frececajeno,

## XXXIX.

Lo Ciucciariello se vota: Ch'è stato?  
 Già ve site cacate de paura?  
 Chi de vuje è rrestato smafarato?  
 Già site muorte, attà de la fortuna!  
 No poco sode, ch'avite arrevato  
 A ffa ride le pprete de sse mmura.  
 Co ssa parlata agnuno s'accoietaje,  
 E isso accossì a Giove se votaje:

## XL.

Giove, che co ssi truone, e cco ssi lampe  
 Le ccercole, e le ppigne allumme, e rrumpe.  
 Nettuno, che ppe ll'acqua co le cciampe  
 De ssi cavalle sempe curre, e zumpe.  
 Vorcano, che ssi mantece, e sse bbampe  
 T'hanno nzeccuto, e ppuro no la scumpe.  
 Febbo, e Dejana, che de notte, e ghiuorno  
 Iate co ssi lampiere sempe attuorno.

Mar-

## XLI.

Marte , che ssaie peglià lo Munno a fiamme,  
E nce puorte a le bbote summe summe .  
Cerere bella, che la Terra sbrammé  
Co sse spiche de rano , e sse bberdumme .  
Vuie , che de lo ssapè site le mmamme ,  
De ll' Aria , de lo Ffuoco , e de li Sciumme,  
Pallade , Vesta , Vennera , e Gionone,  
E ffacite ssa bella fenzione :

## XLII.

Vuie mm'avite ..... Ma , mente isso parlava,  
Restaie ntterutto da no gra rremmore ..  
Se vota : ascia no ciuccio , che mmagnava  
Na spica d' uorgio , e ghieva p' ascì fore :  
Cerere , che sbroffava , e ppeccejava ,  
E pparea , che ssentea no gran dolore ;  
E mmedè chesto , subbeto penzaje ,  
Ch' era stato qua cciuccio , e la ncarraje :

## XLIII.

Pocca no ciuccio , che non capesceva  
Sso pparlà , che ppe isso er' a lo scuro ,  
Abbistaie chelle spiche , che tteneva  
Cerere ncapo : e ttirato lo scuro  
Da n' abbramma cauina , che ssentea ,  
Se nce jeze accostanno muro muro ;  
Po se lanza , e no muorzo le schiaffaje  
Ncapo , che nzi a li pile nne scippaje .  
Corr'

## XLIV.

Corr' isso , pe le fa na cauciata ,  
 No ntanto pecch' ha ffatto sso dammaggio,  
 Quanto ca ll'avea rotta la parlata ;  
 E ssente , a n' ata via , strellà no paggio :  
 Lassa stà lloco ? Ah ccano , l'ha sceppata !  
 E Dejana : Corrite ? che ffarraggio ,  
 Scura me ! ca mme tremmano le ggamme:  
 Comme sbatte lo core ! Chess' è ffamme !

## XLV.

Lassa lo ciuccio , e sse vota de bbrocca  
 A bbedè , ch' è socciesso a ss' autà banna ;  
 Vede fùl , co na paglietta mmocca ,  
 N' ato ciuccio : le dà no muorzo ncanna:  
 Jetta sta cosa ? E lo guaie , che te stocca ?  
 Che bbuò jettà ? Lassa , ca mo te scanna ;  
 Strellava n' auto . E Dejana : zeffonna ,  
 Dalle a sso ciuccio ; vi ca mo la sfonna ?

## XLVI.

Chesso n' è niente a cchello , c'hanno fatto,  
 Giove mio , a Mercurio poveriello ;  
 ( No volante sparaie : che guatto guatto  
 Era trasuto , e stea a no pontonciello )  
 Te ll' hanno spetacciato , e ll' hanno sfatto  
 Lo vestito pe nfi a lo cantariello ;  
 E ssi non se fedava a lo tallone ,  
 Nce nn'avarriano date poche , e bbone .

## XLVII.

Jostizia , Giove , jostizia , jostizia :

Zompa dinto Mercurio , e lo repiglia :

Ssi ciucce so mpastate de trestizia .

No mbì la mazza ? E cchesta è la setiglia .

Si tu mo non castiche ssa malizia ,

Mercurio è ghiuto già , va te lo piglia ,

Non potarraggio ascì , ca nzì a na gatta

Mm'abburlarrà : Ah si setiglia sfatta .

## XLVIII.

A cchesto tutte quante ll'aute Deje ,

Giove , dissero , penza , ch' aie da fare .

Videne proprio mo chello , che nn' eje ;

Chesta n'è ccosa cchiù da sopportare .

E una , e una a doje , e una a treje :

Ch' aspiette , che te vengano a ccacare

Nzì lloco mmocca ? Si lo bbaie trovanono ,

No ngghiarrà troppo a llungo , e tte lo ffanno ,

## XLIX.

Grazia , grazia . No cchiù a ssi poverielle ,

Ca ll'avite pegliate a ccacagliutte .

Ched'è a la fine ? Songo ciucciarielle .

Nè sso , comme decite , tanto brutte .

Scommuovete , o gran Giove : a ppesciarlelle

Già fanno ll'uocchie , e ppigliano li bbutte :

E ssi nò , fallo almeno a questi prieghi :

*A tanto intercessor nulla si nieghi .*

A ssa



## L.

A ssa parlata , a Giove , e a ll' aute Ddie  
 No riso a schiattariello le scappaje;  
 E , cco sto riso , subbeto sparle  
 Lo mal' ario , ch' agnuno s' appraccaje .  
 Li ciucce , non sapenno da dò scie  
 Ssa voce , e cchi era chillo , che pparlaje;  
 Se votavano attuorno , e nno mmedevano  
 Nesciuno llà , e cchiù se confonnevano .

## LL.

Tennero mente nterra , e ccammenare  
 Vedieno na cosella nera nera .  
 Era na scigna , che sservea , pe ffare  
 Lo bboffone a Charchiolla ; e dde manera  
 Le deva gusto , che , nche fommecare  
 Tantillo le vedea la ceminera ,  
 Tahta ngiegne , e strammuottole faceva ,  
 Ch'a fforza , o a bbona voglia essa redeva .

## LII.

Nc' avea pe cchesto tanta confidenza ,  
 Che pe nzì a 'ngiuriarla l'arrevava ,  
 Tanto che ssì facea qua mpertenenza  
 A ccarche scigna , e cchella ll' accosava ;  
 Essa decea : Le darrò la scaienza ;  
 Ma po , vedenno a cchella , se cacava .  
*Va dà la mano no poco a ssa sciorta*  
*De bboffune , ca vide addò te porta .*

Sta

## LIII.

Sta vota, pe ffa ride a ttutte quante,  
Apposticcio de cartà s'avea fatto  
No vestiello, ch'era assaie galante,  
E pparea de no ciuccio no retratto.  
S'avea fatte doie recchie, nnante nnante;  
Puro de carta tenta; e mmo co n'atto  
Le ccalava, co n'auto mo ll'aizava,  
E a bbota a bbota te le storzellava.

## LIV.

Da dereto na coda le penneva,  
Ch'era na cosa propio straformata;  
E cco no garbetiello la moveva,  
Che ppareva na ciuccia speccecata:  
Da quanno nquanno la vocchella apreva,  
E ffaceva llà mmiezo n'arragliata:  
Po co dduie piede la vedive auzare,  
E accommenzav' a ridere, e abballare.

## LV.

Sta cosa non feneva de piacere  
A li ciucce, ca ntesero lo ciasco;  
Tanto cchiù, che, pe ffarle despiacere;  
Essa le ghiea tentanno; e già lo masco  
Uno avea carrecato, e stea a bbedere.  
N'auto decea: Vattenne, ca te casco.  
No la vuoie fentì cchiù? Ma, nche ssenteve  
Chella sso lampo, a n'auto se nne jeva.

G

Men-

## LVI.

Mente, ch' essa facea sse guattarelle,  
E ss' erano li Deie già puoste ngusto,  
Lo Ciucciariello co ddi parolelle,  
Se sbrigaie, ca pegliaie lo tiempo justo:  
Cercaie tutte li maste, e li parrelle,  
Pe ffa le mmura; e scompie justo justo,  
Che le ggatte ncignavano a strellare,  
Ca s'accostava ll'ora de magnare.

## LVII.

La Reggina co mmuodo assaie cortese,  
E ppe le cconzonanze le respone:  
So già lleste, facitele le spese,  
Ca lloro se farranno ll'auta ccose;  
E, ffa sta risposta, se nne scese.  
Li ciucce le vasaieno le mmancose;  
Po se nne jieno a ffa colazione,  
E accossì se scompie sta fonzione.

*Scompetura de l' Arragliata X.*

DE LA  
**CIUCCEIDE**  
 ARRAGLIATA XI.



ARGOMENTO.

*Tutte li ciucce co le scigne ricuollo,  
 E cco rappe, co ccuosane, e ccoechiare  
 So ppe ll' aria portate a rrompecuollo  
 Dinto a na nuvolccla, che ccompare.  
 Vanno a Gragnano, e pposano a lo mmuollo,  
 Nnanze a lo Rrè, che nn' appe a speretare.  
 Ncignano a sffravecane, e no lavore  
 Fanno, nsacce a na porta, de stopore.*

I.

**M**A la Reggina, che bolea sbrigare  
 De jostizia li ciucce chella sera,  
 Ch' avea vista a cchiù dd'una fommecare  
 Pe cchilli tratte già la cemmenera;  
 Fice subbeto subbeto jettare  
 No banno pe lo Stato a la nzorzera,  
 Ch' agnuna, che bolesse cagnà luoco,  
 A ppartì s' allestesse pe lo bruoco.

## II.

Tanto cchiù che Dejana, pe fluire  
 Da Febbo, che ll'aveva ntommacata,  
 Se vedeva de notte compariree,  
 Ca de juorno non s'era assecorata;  
 E ssi mbè meza se vedeva scire,  
 Ca ll'ata meza stev' annegrecata,  
 Puro faceva tanta lummenaria,  
 Che se vedeva no ciuccio pe ll'aria :

## III.

No ntanto sto gran banno fu ghiettato,  
 Che bediste le scigne a mmelejune  
 Venì volanno da tutto lo Stato;  
 Chi stea co li pariente a ccostejune,  
 Chi s'avea le mmognole spetejato,  
 Chi teneva nzavuorio li patrune.  
 Nzomma, chi pe na cosa, e cchi pe n'auta,  
 Nzemì jettà lo banno, corre, e ssauta,

## IV.

E, zompanno zompanno, s'abbiavano  
 A la casa rejale, addò correvano  
 A mmorra, comm'a ppuorce; e ccammenavano  
 Co n'allegrezza tale, che pparevano,  
 Ch' a ccorrere lo palio se nzajavano.  
 Arrevatè po llà, comme venevano  
 Ll'aote, faceano no fracassatorio,  
 Peo de le ggatte int' a no refettorio.

Tan-

## V.

Tanta fuieno li strille, e lo remmore;  
 Che la Reggina se mese a ppaura:  
 Jea pe bbedè, ma no lo decea core  
 De cacciare la capo da le mmura.  
 Po se deze armo, e n'occhio cacciaie fore  
 Da na fenesta, e bedde scura scura  
 Ll'aria, pe la gra nneglia, ch'era aizata  
 Da la mmorra, che stea mmiezo a la strata.

## VI.

Ma nche se n'addonaie de chello, ch'era;  
 Co no riso sardoneco: Corrite,  
 Disse a ttutte, corrite, ca sta sera  
 La sciorta vosta propio trovarrite.  
 Jate, ch'avite asciata la manera  
 De ve fa quanta doppie vorrite:  
 Si ccà non site state canosciute,  
 Llà ve canosciarranno sti sapute.

## VII.

Sulo ve dico, e ttenitelo a mmente;  
 Ca chi n'ha fatto bene nfra li suoje;  
 Nfra ll'aote tanto peo nne farrà nniente.  
 N'è ll'ario, o lo pajese, di che bbuoje,  
 Che non te fa a ccanosce da la gente;  
 So li defiette, e sso li vizie tuoje.  
 Cagna chisse, si vuoie cagnà fortuna;  
 Si nò, cagna che buoie, ch'è na freddura:

## VIII.

Jate mo, e coovernateve. E cchiammato  
 No paggio, le decette, ch'avesasse  
 Li ciucce, ch'era tutto apparecchiato.  
 Jette chillo, e ttrovaie, ch'a sti fracasse  
 Stevano sorrejute; ma, passato  
 Che ffuie lo tremmoliccio, nquatto passe  
 Fuieno mmiezo a la chiazza, addove jettero  
 Squatranno tutte chelle, che benettero.

## IX.

Visto tutto, saglie lo Ciucciariello  
 A ccercà la lecienzia a Chiarchiolla;  
 Po disse: Si nce stà no sportoncicillo,  
 O carcuna ha na stola, me la molla,  
 Ca serve, p'agghiustà no vejaggiello  
 A sti compagne mieie, ch'agnuno colla.  
 Vennero leste leste, a bbuon necchiune,  
 Stole, sacche, sportelle co sportune.

## X.

Cert'aote se mettleno a ccarrejare  
 Fune, zappe, mazzoccole, zappielle;  
 Cate, sciamarre, cuofane, cocchiare,  
 Pale, scale, scalille, manganielle,  
 Crive, chiuove, teroccirole, vregare,  
 Serre, pennielle, sfragasse, martielle,  
 E cquanto maie nce vò, pe ffa na casa,  
 Da lo soppigno pe nzi a la prevasa.

Scese

## XI.

Scese isso abbascio, e le fice acconciare  
 Ncopp' a ttutte li ciucce; e ppo votato  
 A cchelle: Via, chi s' ha da carrecare,  
 Accommenz' a ssaglì, ca stà agghiustato:  
 Lloco vediste le scigne a mmeigliare  
 Zompà dint' a le sporte, e, ccarrecato  
 Che ffuje agnuno, disse: Lleva mano.  
 Abbejateye tutte chiano chiano.

## XII.

Ccà mmo chi po contare li lamiente  
 De chi restava, ca no nce capeva:  
 Lo cchiagne de l'ammice, e li pariente  
 De chi stea carrecata, e sse me jeva:  
 Li schiaffe, li mmascune, e li scenniente  
 De chi aveva d' avè da chi parteva.  
 Vasta. Pe n' ora, e mmeza pe le strate  
 Sentieno allucche, chiante, e ghiastemmate.

## XIII.

Scomputo sto fracasso, e stò remmote,  
 Ascieno a na campagna largolella;  
 E, mmente cammenavano, da fore  
 Vedettero spontà na nuvolella:  
 Chessa è cchella, che me manna lo Gnore,  
 Disse lo Ciucciariello; chessa è cchella.  
 Eccola ccà, comme vene de pressa:  
 Stateye allegramente, chessa è essa.

G 4

No



## XIV.

No ntanto avea scomputo de parlare ,  
 Che la nuvola venne , e sse fremmaje :  
 Po chiano chiano se vidde allongare ,  
 E ttutte quante te l' attorniaje :  
 A ll'utemo se ngrossa , e ppare pare ,  
 E dda coppa , e dda sotto le nzerraje ;  
 Che non sulo servevate p' ombrella ,  
 Ma le pportava a mmammara , e nnocella .

## XV.

Po piglia na corzera . Che ccorzera ?  
 Piglia no vuole accossì spotestato ,  
 Ch' a le ddoje ora de la stessa sera  
 Toccaie Gragnano . Bello ritrovato !  
 Chesto sì , ch' è bbolà . De ssa manera  
 Porrisse avè magnato , e ppadejato ,  
 Co mmanco de no juorno , attunno attunno  
 Tutto lo tortanone de lo Munno .

## XVI.

Già la Luna a ffa spuonole era sciuta ;  
 E pecchè co lo frate stea nzorfata ,  
 Pe non se fa a bbedè , stea annasconnuta  
 Dereto a 'no pontone de la strata ;  
 E cco n' uocchio da llà s' era mettuta  
 A ffa la spia ; e stea meza cacciata  
 Da fore , e mmeza nò , pe se magnare  
 Lo tiempo justo de se la scocciare .

Quan-

## XVII.

Quanno lo Rrè, che stea sempe penzuso  
Pe li ciucce, che s'erano partute;  
Se senteva già ghì pe lo caruso,  
Ca chilli scure s'erano perdute.  
Va trova, isso deceva, a cquà pertuso  
S'hanno rutto lo cuollo? Addò so ghiute?  
Uh poverielle! Che rrazza de via  
De jì pe ssotta terra 'n Varvaria!

## XVIII.

E ppe non se fa abbence da li frate,  
Che ll'erano sagliute nzi a le rrecchie;  
For' a la tana stea co li sordate  
A ceontà cunte: comme fa a le bbecchie  
Vedimmo sera sera, quann'è State,  
Nnanze a le pporte; e ccerte ccose vecchie  
Te contano de ll'anne, ch' a' li sbriglie  
Se stea spassanno Giove co li figlie.

## XIX.

Io m'allecordero, ca mme. decea Tata,  
Decev' uno, che ntese da Vavone,  
Pe bbocca de la Zia de la Cognata  
De Sogrema, che benea ncrosione  
Ad esse Nora a cchella, che sposata  
Fuie co cchillo, che ddeva lezione  
A lo Sivavo de li Pronepute,  
Ch'erano Frate, e Ssore a li Nepute;

## XX.

Decea Tata no bello contariello ,  
 Che mo non saccio, si mme l'allecordero :  
 Si si. Nc' era na vota a lo castiello ,  
 Ch'aveva nomme... uh, sempe me lo scordo;  
 Ma, che nne voglio fà? E' ssaporetello  
 Lo cunto. Tutto stà, si mo l'accordero.  
 Vasta. Veneva a ddì, ca non s'aveva  
 D'ascire maie co cchi non se sapeve.

## XXI.

Mperzò ve dico mo, Signore mio ,  
 Già mme ntennite. Avite fatto arrore  
 A mmannà. N' è lo vè? N'avè golio  
 De nformarve, si chillo era mpostore;  
 O che ddiella er' isso, che ssacc' io.  
 Chi sa? Co scusa de farce faore,  
 Nc'avesse, Uscia mme ntenne. Chella vocca  
 De la montagna me stà sempe nchiocca.

## XXII.

Ment'isso ntartagliava, ecco de bbotta-  
 Vene volanno la nuvola nterra :  
 Vene, cala, se crepa, e ffa na bbotta ;  
 Che no jajo pe ll'ossa a ttutte afferra.  
 Lo primmo primmo, che nn'esce da sotto,  
 E' ll'Aseniello, ch'abbista nne sferra ;  
 Po, co le scigne ncuollo, chiano chiano  
 Se nne vennero ll'aute retomano .

Mme-

## XXIII.

Mmederle, tale triemmolo venette

A Bbarvajanca, e all' aute tutte quante;  
Ch' abballavano; e ppòto nce volette,  
Che non cadieno nterra. E, nnante nnante,  
Chillo povero ciuccio, che ddecette,  
Ca ll'Ase niello era no gran forfante,  
Nch' ascì lo vedde da la nuvolella,  
Le venne, arrasso sia, la cacarella.

## XXIV.

Tanto cchiù, ca lo buono Ciucciariello,  
Che ccarcosella già nn' avea sentuto,  
Le tenne mente; e cco no resariello  
Le disse: Eccome ccà, già so bbenuto.  
Cchiù bbolea dì; ma pe no gran rotiello  
Che s'era fatto a ddà lo bemmenuto  
A la gran compagnia, ch'era tornata,  
Chillo scuro scappaie sta pozonata.

## XXV.

Venevano l' ammice, e ll' pariente,  
Patre, figlio, nepute, e li vecine;  
E tutte le faceano compremiente,  
Salute, e rreverenzie nzina fine.  
Fratiello addio. T'aggio da servì a nniente.  
Schiavo. No nc' è dde cche, sempe accossine.  
Lo ssà, ca staie bellone. E' ll' ario vuosto.  
Chello, ched' eje. A lo commanno nuosto.

## XXVI.

Cierte mo s'affollavano a spiare,  
 Che ll'era ntravenuto pe la via.  
 Ciert' aute se mettevano a strillare:  
 Vi ch'è bbenuta già la compagnia.  
 Galoppavano ll' aute, pe cchiammare  
 Lo riesto de li ciucce via via;  
 Ed era tanta la confosejone,  
 Che se ntenneano pe ddescrezzejone.

## XXVII.

Storduto l'Aseniello: Ecco le scigne,  
 Disse nfacce a lo Rrè, ch'aggio portate:  
 Cheste te faciarranno li designe,  
 Le mmura, lo Castiello, e la Cetate.  
 Auto mo no nce vò, che te le ncigne  
 A pprovà, ca già stanno apparecchiate;  
 E ppo, senza aspettà lo compremiento,  
 Tocca. Sparette, che pparze no viento.

## XXVIII.

Restaie lo Rrè co la parola mmocca,  
 E cco no pede aizato, pe bbolere  
 Abbraccià, e ngrazià; ma po de brocca.  
 Vedennolo partì, senza poterelo  
 Fremmà, le passaie subbeto da chiocca  
 La volontà, ch'avea de trattenerelo;  
 E bbotato a le scigne: O bemmenute,  
 Le disse, figlie meje, scigne sapute.

Mo

## XXIX.

Mo mme pozzo chiammà lo Si Felice,  
Pocc'aggio a bbuie, che mme facite annore.  
Volimm'essere nziemo cchiù ch'ammice,  
E nce volimmo rallegrà sto core.  
N'aggio a ppaura cchiù de li nneimmice,  
Che mme vengano a ffa lo bell'ammore:  
Ca quanno sarrà fatto lo fortino,  
Sa quanto vanno? quant'a no lopino.

## XXX.

Sulo mme despejace, ca non aggio  
Apparecchiato rrobba da magnare;  
Pocca credeva, ca sto gran vejaggio  
N'anno a lo mmanco, avesse da dorare.  
Puro mo mmo servire ve farraggio  
De lo muodo, che mmeghio se pò fare;  
E ssi n'avite nzò, che mmeretate,  
Pegliatene la bona volontate.

## XXXI.

Poco descuosto nce stà n'orteciello,  
Che pe mme ssulo mme ll'aggio sarvato;  
Tanto che no nce va manco n'auciello.  
Co ttutto ca de mura n'è nzerrato.  
E' cchino d'erva, co no sciummetiello,  
Che lo va addefrescanno p'ogne llato:  
Llà ddinto sgolejà pe potarrite  
De veverè, e amagnà quanto vorrite.

Ve

## XXXII.

Ve restammo obbrecate, ca n' avimmo  
 Nuje aote vocca de magnà sse ccose,  
 Resposero le scigne; e nce pascimmo  
 De rrobbe, che non so accossì sforgiose.  
 Nce vasta sulo, quanto nce coglimmo.  
 Quatto nuce, ca simmo goliose  
 De sse schefienzie, e ssimmele coselle,  
 Scioscelle, pigne, castagne, e unocelle.

## XXXIII.

Si nn'avite de cheste, nce potite  
 Dà la lecienzia, ca le ghiammo a ffare.  
 Urr, de sse ccose, quanta nne volite,  
 Disse lo Rrè; no ve ponno mancare.  
 Si de nuce, e nnocelle ve pascite,  
 Ve nne potite propio sgolejare:  
 Da ccà becino nce ne stà na serva,  
 Che de ste zorbie pare la conserva.

## XXXIV.

E botato a li ciucce: Via su, jate  
 A lo voschetto co ste Ssegnorelle.  
 Jettero tutte, e nzhe ffuieno arrevate,  
 Nce trovaieno no munno de nocelle.  
 Nche le schiusero, chelle, nzanetate,  
 Te le bediste ncimma a l'arvoscielle;  
 Ca Dejana, pe ffarele faore,  
 Comm'aggio ditto, stea meza da fore.

Da-

## XXXV.

Dapò , che se un' anchieno de maniera ,  
 Che , e quanto a no tammurro, aveano fatte  
 Le ppanze: Vasta chesto pe sta sera ,  
 Dissero ; e sse nne jleno guatte guatte .  
 Lo Rrè nfra tanto avea già a la ncorzera  
 ▲ ccierti ciucce fatto dà li sfratte ,  
 Che stevano abbetanno int'a na tana ,  
 Ch'era da chella soia poco lontana ;

## XXXVI.

Tanto che cquanno fuieno de retuorno  
 Chelle , trovaieno leste pe le strate  
 Li ciucce , che da tutto lo contuorno ,  
 Pe le sservire , steano apparecchiate :  
 A da li stisse , nche le fuieno attuorno ,  
 Fuieno zeppa , e dde pesole portate  
 Dint'a la tana , addò s' arrecettajeno  
 Pe nzì che la matina non s' auzajeno .

## XXXVII.

Lo Sole già , co la lanterna a bbota ,  
 A li Cucù decea : Fremma , la corte .  
 E li seure pegliavano la vota ,  
 Pe se jì a neaforchià dint'a lo fforté .  
 Li passarielle , pe le fa dà vota ,  
 Le faceano l'allueca nzì a le pporte ;  
 E ddapò , fatto a isso no saluto ,  
 Le ncignaieno a ceantà lo Bemmenuto .

Quan-



## XXXVIII.

Quanno le scigne jettero a ttrovare  
 A Barvajanca , ch' era già scetato ,  
 Le dissero , ch' er' ora de ncignare  
 A ffa chello , ch' aveano desegnato ;  
 Cercà vrecce , fa ccauce , caucenare ,  
 Scavà la pezzolamma ; azzò cche ddato  
 Se fosse , quanto primmo via via ,  
 Prencipio a ffa quant' isso volarria .

## XXXIX.

E , avuta la leciencia , se nne jettero  
 Chi a na parte , e cchi a n'aota retrovannole ;  
 E ttrovate le brecce , nne mettertero  
 Paricchie int' a no fuosso , ammontonannole  
 Bello una ncopp'a ll'aota , e ppo nce dettero  
 Fuoco , che le ghie ardenno , e ghianchejannole ,  
 Tanto che nquatto juorne se trovajeno  
 Tanta cauce , che cchiù no nne cercajeno .

## XL.

Cert' aote se mettertero a scavare  
 Pezzolamma , e rrapillo p'ogne strata :  
 Certe ncignaïeno a ffa li caucenare ,  
 E ll'aote a ccarrejà a la desperata  
 Se mesero acqua , pe la devacare  
 Dint' a ssi fuosse ; e cquanno apparecchiata  
 Vedettero ogne ccosa , accommenzajeno  
 A ddesegnà le mmura , e ppo scavajeno .  
 Ma

## XLI.

Ma pecchè tutte quante erano assaje  
A ffatecà schitto a no pezzetiello,  
Se spartieno ; e na parte nne restaje  
A ffa le mmura , e n'aota lo Castiello .  
E cchisto abbista mo se desegnaje ,  
Ca nn' aveano portato lo modiello ,  
Comm' a cchillo , ch' avea fatto pittare,  
Chiarchiolla a lo pajese , e n' avea pare ,

## XLII.

Chisto era fatto , comm' a n' arteficio ,  
Stritto , e appezzuto ncoppa , e ssotta chiatto,  
Da terra asceano , fatte co ghiodicio  
Quatto moraglie nquattro , che dde quatto  
Battarie te facevano l' afficio .  
Mmiezio a sse bbattarie po nc' era fatto  
No muro a uso de no gran cannuolo ,  
Che pparea la Lanterna de lo Muolo ,

## XLIII.

A cchesta forma accommenzaieno a ffare  
Le scigne lo Castiello de Gragnano .  
Ncignaieno a ffa le mmura ; e nche arrevare  
Le bedettero nzì a lo primmo chiano ,  
No le parze cchiù ncoppa secotare  
A ffa lo riesto , ma levaieno mano ;  
E sse mesero a ffare no lavore  
Ntuorno a la porta , ch' era no stopore .

Ap.

## XLIV.

Apprimmo apprimmo stevano chiantate

Nterra doie vrecce tonne , che pparevano  
Doie gran rote de carro , o doie frettate :  
Ncopp' a ccheste , a l' allerta , se vedevano  
Doie colonne , ma tutte storzellate ,  
Che sotta erano chiatte , e ppo se jevano  
Cchiù ncopp' assotteglianno , e mmiezo steva  
.No po de guobbo , che cchiù nfore asceva.

## XLV.

Da sso guobbo po jevano crescenno ,  
E cquanto cchiù nzi mponta s'allongavano ,  
Tanto cchiù se vedevan' l' nchiattenno :  
Arrevate nzi ncoppa , s' accovavano ,  
Tanto che n' arco veneano facenno ;  
E , ffatte a cchisso muodo , fegoravano  
Li quarte de no ciuccio de dereto ,  
Da ll'ogna nzi addò vrociola lo fieto.

## XLVI.

Ncoppa ne' era no Tunno , che sserveva  
Pe ffa llà nfacce no cuorpo de mpresa ;  
E cchest' era na coda , che scenneva  
Mmiezo a sso Tunno , e steva stesa stesa .  
A ssa coda na scritta se vedeva  
Mpont' a li pile , co na nocca appesa :  
*Si n'aie chessa , jarraie sempe cchiù a ffunno :*  
*Chessa è cchella , che ddommena lo Munno .*  
Cchiù

## XLVII.

Cchiù nn'auto na corona noe facettero,  
 Che simmele a lo Munno non fue vista:  
 Doie Recchiune a li pizze nce mettettero,  
 Che dduie cuoppe pareano a pprimma vista,  
 E ssotta st'auto mutto noe scriverettero,  
 Che le rrecchie cegna, comm' a na lista:  
*A ssi cuoppe vo bene la Fortuna,*  
*Ca dnt' a schiste li recchine auna.*

## XLVIII.

Da sott' a sta corona a la rejale,  
 Da ccà, e dda llà penneano campanielle;  
 Stole, testere, capezze, cegnale,  
 Varde, mmaste, mologne, sciocchetiell,  
 Morge, cancelli, pannielle, stracquale,  
 Fierre a galletta, cuofane, e zappielle:  
 Sotta nce stea: *Nuie sule le pportammo,*  
*Si mbè non sule nce le mmeretammo.*

## XLIX.

A sta porta, da ll'una, e da ll'aut'anca,  
 Fatte a uovo nce steano doie cornice:  
 Dinto a cchella, che stev' a mmano manca,  
 D'Apoleio lo retratto se nce fice,  
 Tanto simmele, ch'auto no le manca,  
 Che n' arragliata; e ssott' a isso, dice  
 No mutto, appiso co no correjulo:  
*Si so lo primmo, non sarraggio sulo.*

Ditt.

## L.

Dint' a ll' aota cornice , a mmano ritta ;  
 Nc'era fatto no Cielo co ddoie stelle ,  
 Che si liegge la storia , che nn'è scritta ,  
 Saie , ca fuieno no paro d'Asenielle ,  
 E mmo puro so ttale ; e n' aota scritta  
 Nce stea sotta , attaccata co ddi anelle :  
*Chi a lo Munno vo essere stemato ,*  
*Sia comm' a nnuie , ca pe nzi 'n Cielo è auzato.*

## LI.

Chist'era lo lavore , che ffacettero  
 Nnante a la porta ; e ffu accossì ccomprito ,  
 Che cquanta po nce jleno , e lo vedettero ,  
 Dissero : Veramente stà polito .  
 Ma mente a ffa lo riesto se mettettero ,  
 Sentieno sorzetà no gran desquito ,  
 Comm' a no serra serra , into Gragnano ,  
 Che le ffice a lo mmeglio levà mano .

*Scomperura de l'Arragliata XI.*

DE

DE LA  
**CIUCCEIDE**  
 ARRAGLIATA XII.



ARGOMENTO.

*Dice a lo Rrè no ciuccio , ca volanno  
 Veneno cierte , pe lo stroppejare  
 Isso va addò Sello , e lo malanno  
 Le conta ; e cchillo Giove va a trovare:  
 Vede 'n Cielo gran cose ; e mmente stanno  
 Li Deie nconzorta , le bene a ppregare  
 Na Dea vecchia , che cco na penzata  
 De Mercurio se nn' esce conzolata.*

I.

**M**Ente se jea facenno lo Castiello ,  
 E sse stev' a lo primmo appartamento ,  
 Venne a lo Rrè volanno n' aseniello ,  
 Ch' a ccorre la facea porzì a lo viento ;  
 E le disse : Segnò , stà ncellevriello ,  
 Da fora mme ne chiammo : statt' attiento ,  
 Ca nc' è na mala nova , e n' aggio core  
 De te la dì , ca nn' aggio gran dolore.

Che

## II.

Ched' è ? Le scigne se ne so ffojute ,  
 O l'è ccaduto lo Castiello ncuollo ,  
 Disse lo Rrè. Se nne fossero jute ,  
 Respose chillo , tutte a rrompecuollo ,  
 Ca manco sarria niente. So ccadute  
 Dint'a la cauce, e stanno llà nnammuollo?  
 Peo. Co li ciucce se so mpeccecate ?  
 Uh nc'è cchiù ppeo. Site state scannate ?

## III.

Site muorte de subbeto ? A mmalora  
 Se nne so ghiute ll'asene ? Ch'è stato ?  
 No mme tenè a la corda , che bbonora  
 E' ? Parla , che puozz'essere squartato.  
 Signore mio , no lo bolea di ancora ,  
 Ca v'aggio visto troppo nforejato .  
 Dillo , co ttutte le bbonore toje ,  
 Dillo mmo , dillo ppriesto , e ddì che bbuoje.

## IV.

Già cchē ssapè mo propio lo bolite ,  
 Mo ve lo cconto : Aggiate da sapere ,  
 Ca li Cicciune se so ttutte aonite  
 Contra de nuie , pe ffarce despiacere .  
 E cchi so sti Cicciune ? Non sapite  
 Chilli Griecce , che stanno a mmonnà pere  
 De l'Acacaja mmocca a li confine ?  
 Ah, yuo' di Siciune ? Gnòressine .

E cché

## V.

**E** cche bonno da nuie? Mo ve lo ddico :  
Chiste ccà fanno guerra a l'Ambraciuote ,  
Chille de la Prevasa . Atta de nnico ,  
Comme mme le stropplè ! Mme le rrevuote  
De manera , che non se sa l'ammico ,  
Nè cquà sia lo nnemmico . Addò te vuote ,  
Co sso pparlà , mme faie cadè na casa :  
Se chiamma la Prevesa , e non Prevasa .

## VI.

**Scusatèmè** , ca songo n'anemale ,  
E dde ste ccose maie nn'aggio saputo .  
Chiste songo nemmice capetale ,  
E nfra lloro semp'hanno commattuto :  
Ma , da poc'ha , pe se fa propio male ,  
Era ncampagna ll'uno , e ll'auto asciuto ;  
E steano tutte duie tanto ncanate ,  
Che pparevano vufere stezzate .

## VII.

**Ora** mo li Secciune , pe ppegliare  
Li povere Ambraciuote a la gajola ,  
De notte tiempo se jleno a schiaffare  
Dint'a no vosco ; e steano a ffa la cola ,  
Aspettanno into llà , pe le stagliare  
Li passe , e ppe ncapparle a la tagliola .  
Nchesto , venne a ppassà pe cchella via  
No ciuccio , e n'Ambraciuoto ncompagnia .  
Nnan-



## VIII.

Nnanz' a lloro venea no ciucciariello ,  
 Che ghiea pascenno sulo pe la strata ;  
 E mmederse , ncignaieno no greciello ,  
 Che pparea, se movesse già n' armata .  
 Li Secciune , ch' a ffa lo trajeniello  
 Steano dintò a lo vosco , a st' arragliata  
 D' esse state scopierte se penzajeno ,  
 E a ggamme ncuollo subbeto scappajeno .

## IX.

Accuortose dé chesto l' Ambraciutè ,  
 Le dieno ncuollo , e ttutte l' accedettero ;  
 E ppecchè songo gente assaie devote ,  
 Na statoa d' oro a lo ciuccio facettero .  
 Chille sapenno pò , ca ste rrevote  
 Pe ccaosa de no ciuccio soccedettero ,  
 Pe se nne vennecare , hanno jorato  
 A fferro , e ffluoco de mannà sso Stato .

## X.

E già mo tutte sē vanno movenno  
 Pe benì quāto primmo chesta via :  
 Io , nche ll'aggio saputo , a la ncorrenno  
 So benuto ccà a ddirlo , azzò ch' Uscia  
 Nce trova quà rremmedio . Sentenno  
 Chesto lo Rrè , tremmanno , arrasso sia ,  
 Cala le rrecchie , allonga lo mossillo ,  
 Schiaffa nterra , e pperdiè lo speretillo .

Re-

## XI.

Revenuto che ffuie , senz' aspettare  
 La Guardia de lo cuorpo , s'abbiaje  
 A Lettere , pe ghirse a cconzortare  
 Co Selleno ; e arrevato , se jettaje  
 Nnante a la statoa , e la ncignaie a ppregare,  
 Che l'avesse sarvato da sti guaje :  
 Chiagnè tanto , che stracquo s'addormette:  
 Nzuonno chillo l'apparze , e le decette :

## XII.

Figlio , lo ssaccio ; ma non dobbetare ,  
 Ca è ppiso mio de te sarvà sso Stato .  
 Vattenne allegramente , e llassa fare .  
 Ora sacce , ca 'n Cielo è ddecretato ,  
 Che sta razzimma toja aggia a rregnare  
 Sempe a lo Munno . Accossì bbò lo Fato :  
 Torn' a Gragnano , e statte llà a ssentire  
 Chello , che ppo te mannarraggio a ddire .

## XIII.

Nchesto dì , Varvajanca se scetaje ,  
 Rengraziaie Selleno , e a la ncorzera  
 Mmiero Gragnano se l'appalorciaje ;  
 E ssi mbè llà trovaie , che già se nn' era  
 Spasa la nova , e agnuno s'agghiajaje ,  
 Mmederne ascl lo Rrè co cchella cera ;  
 Puro tornanno co no pizzo a rriso ,  
 Fice allegrà chi se chiagnea pe mpiso .

H

Sel-

## XIV.

Selleno ntanto , pe se confarfare .

Co Giove de lo muodo , che ttenere  
 S'avea a sto mbruoglio , e cche s'avea da fare ,  
 Sagliette 'n Cielo ; e mmente fa a bbedere  
 Si nce stev' a la casa , e ttozzolare ,  
 Uno da dinto le fice a ssapere ,  
 Ch'era juto a lo Tempio de la Gloreja ,  
 Pe ffa la festa de na gran vettoreja .

## XV.

Era lo juorno , che scompeva ll'anno ,  
 Che 'n Cielo li Giagante nforejate  
 Saglieno , pe le dà no gran malanno ;  
 Ma da llà ncoppa , a bbotta de vrecciate  
 Comme sapite , jieno vrociolanno  
 Tanto pe cchella via , che nche arrevate  
 Fuieno abbascio , atterrate rommanettero  
 Da li munte , che ncuollo le cadettero :

## XVI.

Pe sta vittoria , accossi ssegnalata ,  
 Se fa ogn'anno a sto tempio na gran festa ,  
 For' a la porta se nce fa n' arcata ,  
 Tutta de lauro , e sciure de jenesta ;  
 A lo primm' arco , ch'è nfacce a la strata ,  
 Nce stà na Screzzione , e creo , ch'è cchosta :  
*Venite ccà a bbedere , capotuoste ,  
 Comme se tratta co li pare vuoste .*

Tra-

## XVII.

Trasute dintò , nfacce a no pòntone ,  
Da la banna deritta , se trovava  
Na tenna co na banca de terrone ,  
Addò Giove , trasenno , s'assettava ;  
E , pprimmo de ncegnà la fonzione ,  
Agnuno `de li Deie se nc' azzeccava :  
Isso a cchi deva no sosamelluccio ,  
O na zitola , e a cchi no martelluccio .

## XVIII.

A mmano manca nc'era no ntàolato ,  
Auzato apposta pe li sonature :  
Ncoppa stea lo Cortese , e lo Cecato  
Da ccà , e da llà , a li primme sedeture ;  
Chisso a na tromma , e cchill'auto dea sciato  
A no connutto de ntofolature ;  
Ma pecchè chella è bbecchia , e chisso è nuovo ,  
Se sentea meglio chisso , e ddea a lo chiuovo .

## XIX.

Dereto a lloro , Rota , e Samazzaro  
Sonavano , nconzierto , no sconciglio ;  
E no poco cchiù ncoppa , a pparo a pparo  
Teocreto , e Bergilio , patre , e ffiglio ,  
Co na zampogna de no pecoraro  
A bevere na meza a lo Cerriglio  
S'erano desfedate ; e appriesso a lloro  
Nc'era de sonature n'auto coro .

H 2

E sso-

## XX.

E ssonavano nzì che Giove steva  
 Assettato a la banca , e ddespenzava ;  
 Ma subbeto che cchillo se soseva ,  
 Tutta esa mmorra abbascio vrociolava ,  
 E nnanze a isso , e a ll'aute se metteva ;  
 E ssonanno sonanno le pportava  
 Dint' a lo tempio , addò , pe la vettoreja ,  
 Scampanejava la campana a groleja .

## XXI.

Scomputo chello , che s'avea da fare  
 Dint' a lo tempio , se nn'ascieno fore ,  
 E ss'assettaieno , pe bedè jocare  
 Le ppapare ; ca caccia de li tore  
 Non se pò 'n Cielo manco nnommenare :  
 Pocca , da che ncappaie Giove a n'arore ,  
 Deze a sta caccia li quatto de Maggio ,  
 Sotta coperta , ca facea dammaggio .

## XXII.

Co sto juoco no piezzo se spassajeno  
 A bbedè chi sapea taglià cchiù nnietto ;  
 Ma nfra l'adacciature , che ghiocajeno ,  
 Tre bbecchiune nce dezere de pietto ,  
 Che bberamente se nc'ammortalajeno :  
 Ll'aute venì le fecero l'appietto ,  
 Ca non correano , e cquanno erano sotta ,  
 Nce volea n'anno , pe le dà na bbotta .

Lo

## XXIII.

Lo primmo de li tre fù Ghiovenale ,  
 E le dea de manera , ch'ogne bota ,  
 Che la cogliea , chella n' avea cchiù mmale:  
 Ll'auto fù Perzio ; ma , da vota a bbota,  
 No nce lassava manco lo nzegnale ,  
 E ppe ttrovà la botta , se jea mmota:  
 Ll'utemo Arazio , che la capozzella  
 Le facea netta co na resarella .

## XXIV.

Chiste , e ttutte chill' aute , che ssonavano ;  
 Nce le pportava Febbo sta jornata ;  
 E dda Parnaso , addò se la scialavano ,  
 Ogn' anno nne venea na ncarrozzata ;  
 Ma , nche aveano scomputo , appalorciavano  
 Subbeto abbascio pe la stessa strata :  
 Ca co ssa gente non se pazziava ,  
 E nnante nnante Giove nne tremmava .

## XXV.

Nce mancaie , pe ffortura de li vecchie ,  
 Settano , e ll' Ariosto ; ch' acciarrato  
 La Corte tenea chisto pe le rrecchie ,  
 E ncasa ll' avea fatto lo mannato :  
 L'auto , pecchè pegliare a ppezze vecchie  
 Na paparona schitto avea jorato ,  
 Nche la vedette spetacciata , e mmorta ,  
 La cortella appennè reto a la porta .

H 3

Fatta

## XXVI.

Fatta ssa festa , primmo che s' auzasse  
 Giove da lo barchetto , s' accostaje  
 Selleno , e le decerte li fracasse ,  
 E tutto lo miozio le contaje .  
 Nzentirl' isso : Che bbonno sti smargiasse ,  
 Disse , da ll' asenielle ? Non sia maje ,  
 Ch' aggia a sortì st' arrove : vè che ccosa !  
 Le volimmo fa fa na bona ntosa .

## XXVII.

Fa accossine : mo mmò nuie nce nè janno  
 Tutte a la casa , a ffare li festine ,  
 Viene tu puro , ca llà conzurtammo  
 Che ll' avimmo da fa a sti babbuine ;  
 E botato a li Deie : Via su ammarciammo ,  
 Disse a ttutte , ca già pe le ccantine  
 Va votanno lo Sole ; ch' aggio a ccaro ,  
 Che mmagnate na zuppa a lo pagliaro .

## XXVIII.

Nzentì zuppa , toccaïeno tutte quante  
 A la casa de Giove a la ncorrenno ;  
 Ma Selleno le ffice passà nnante ,  
 Ca pateva de jorde , e ghiea attegnenno ;  
 E ppe la via trovaie n'auto tardante ,  
 Che se la jleno nziemo trascorrenno :  
 Era chisso Vorcano sfortonato ,  
 Che cco na coscia stea miezo sciancato .

Tan-

## XXIX.

Tanto che cquanno lloro po venettero ,  
 Trovaieno li festine già scompute ;  
 Ch' era longa la strata , che ffacettero ;  
 E lloro adaso adaso erano jute ;  
 Otr ca nquanno nquanno se nce jettero  
 Fremmanno , comme cierte addebbolute  
 Vanno facenno spisso pe la strata ,  
 Che te fanno ascì h' arma ogne pposata .

## XXX.

Co tutto chesto asciaieno na resuglia  
 De presutto , e no po de sottestato ,  
 Che Dejana , co n' aota rommasuglia ,  
 Pe li cane de caccia avea stipato .  
 Lloro nce l'abbistaieno , e cco la bbuglìz  
 Se l'asciuttaieno miezo arrefreddato ;  
 E stotate di lampe d'amarena ,  
 Pe n'esse viste , votaieno carena ;

## XXXI.

E sse menettero a bbedè jocare  
 Cierte , che se faceano n' Aseniello ;  
 Ma nche arrevaieno , s'appe a ssorzetare ;  
 Pe na mala jocata , no greciello ,  
 Che ssi non se vedea Giove spontare ,  
 Cierto nce soccedea no gran maciello :  
*Vi che ffa lo ghiorà , quanno lo mmusto .*  
*Ncigna lo primmo vullo int' a lo fusto !*



## XXXII.

Se spassavano a ll'Aseno sti sette,  
 Mercurio, Febbo, Palladé, Gionone,  
 Vennera, Marte, e Bacco; e sse scoprette  
 Lo trejunfo a ddenaro. A no pontone  
 Stea Bacco, e avea la mano. Joca, e scette  
 Co Rrè de coppa. Mercurio mbroglione,  
 Che ll'Asso mmano a Pallade allommaje,  
 Co tutto ch'avea coppa, lo fagliaje:

## XXXIII.

Ponticcio a ll'ogna. Essa se fa corriva:  
 Ched'è Ssegnora? E cche bbo esse? Avev  
 St'Asso, e mme ll'aie fagliato. Ora v' arriva  
 A ssapè chesto, ca no l'accedeva.  
 Benissemmo: jocate. Spata. E bbiva,  
 Se vota Marte, chesta ccà voleva,  
 Ca nc'aggio tanto n'Asso. Spata, spata;  
 Tutt' hanno spata, e bbene la jocata.

## XXXIV.

Sette mazza. Gionone mette ll'Asso;  
 E Bacco nce lo faglia. Che ccrejanza?  
 Ch'era lo vuosto? V! ca no nce passo  
 Pe stà carata, sa Si Sancio Panza:  
 Ca si va a ccoffejare, ve repasso  
 Quanta site, e bedimmo chi nc'avanza;  
 E' stato sbaglio. Dì, ch'è stato vino,  
 Ca fiete, che nc'ammuorbe, e nne staie chino.  
 Bac-

## XXXV.

Bacco ha Rrè de denaro , e ssè lo vatte:  
 Torna pe ccoppa ; e Bennera nce passa  
 Cavallo de denaro , e ffa ciert' atte  
 A Marte : isso avea ll'Asso , e nce lo lassa.  
 Gionone , c'ha la Donna , s'auza , e sbatte  
 Le ccarte : De malizia no mm'appassa  
 Manco patremo , E Bacco : No strellare ;  
 E' ffemmena , e bisogna rispettare.

## XXXVI.

N'abbasta ll'esse ffemmena : bisogna.  
 Essere tale ffemmena , respose  
 Gionone : la sia Vennera ! E bbreogna ,  
 Che cca ncoppa se sentano ste ccose ,  
 S'auza Febbo. Isso vo , ch'io lo sbreogna ,  
 Lebbreca chella , e pprimmo che se sose ,  
 Te lo janchejo . Zitto , ca n'è nniente :  
 Vi ca nc'è lo marito , che te sente . ,

## XXXVII.

Che mmarito , e mmogliera ? Aggio a li bbene  
 A essa , e a cchi nne vo peglià le pparte .  
 Giù la mano , ca nc'è chi te nce tene  
 Vattutta , e rrebbattuta ; (sferra Marte)  
 Si la defenno , è mmeglio assaie de tene .  
 Jodicio de Pacchiano . Atta de ll'arte !  
 Si non mme vene voglia de . . . Ma venne  
 Giove a ttiempo da dinto , e ssè mantenne .

H S

Sel-

## XXXVIII.

Selleno, che bbedette ntrovolato

Ll'ario de mala chella, pe ppaura

De sgarrà co sta bbuglia lo ffelato,

Se fa nnanze: Avarraggio la fortuna

D'essere pe sta sera conzolato?

Si, disse Giove: Eilà? Stamm'a la scura?

Luce. Terate segge. Via Segnure,

Ch'aggio besuogno ccà de conzurture.

## XXXIX.

Mente stea Giove pe ccontà lo fatto,

E già fatta nc'avea na gra rrascata;

Se vedie trasì dinto, nnitto nfatto,

Na Ddea vecchia, che benea appojata

A no Ddio vraccollillo, e cchiatto chiatto.

Che bella cocchia! Chella nzesetata

Steva pe la vecchiaja, e ghiea cadenno:

Chisso stea nzallanuto, e ghiea mmestenno.

## XL.

La primma era la granne Asenetate,

Che pportava na coda de seie canne.

Dereto a lo mantò: ncapo nzeppate

Doie recchie avea, ch'a mmesura de ll'anne,

Ch'avea campato, s'erano allongate.

Ll'auto era Bacco, ch'a li strille granne

De Marte, e dde Gionone, a ffa-licette

Era juto azì abbascio, e la saglieue.

Mme-

## XLI.

Mmederla Giove, subbeto s'auzàjé  
 Da lo pizzo, assetato addove stèva;  
 Agnun' auto, passanno, la ncrenaje:  
 Ma chella mmala pena se moveva;  
 Po se nne jte deritto, e ss'assettaje  
 A cchella stessa seggia, che sserveva  
 Pe lo Rrè de li Deie: fice assettare  
 Tutte ll' aute, e ccossì ncignaie a pparlare:

## XLII.

Figlie ( ca figlie mieie pozzo chiammarevè;  
 Mente sulo pe mme vuie site nate )  
 Io fuie chella, ch' a ll' ommo d' adorareve  
 Le mise ncapo, e ppe mme ccà ve state :  
 Ca si non era io, ch' a ffravecareve  
 Ste ccase fizerretava ssi cecate,  
 Ll' uocchie avarriano apierte, e ccanosciute  
 L' arrure, vuie sarrissevo perdute.

## XLIII.

Mmperzò a l' Asenetà vuie mo devite  
 Tutto chello, che ll' uommene ve fanno;  
 Anze ll' essere stisso, e cquanto avite,  
 Chi ve l' ha ddato? io schitto, e nno ve nganno;  
 E pe mme assecorà ve potarrite,  
 Ca pe nzi a ttanto ch' asene sarranno  
 Ll' uommene nterra, vuie sarrite ammate;  
 E comu' a Ddeie servute, e bbenerate.

## XLIV.

Si chesto è bero, comm'è cchiù che bero;  
E mmaie da nullo ndubbio s'è mmettuto;  
Vo la jostizia, ch'io da vuie nne spero.  
Chello, che buie da me nn'avite avuto.  
Ma io non boglio tanto: auto mpenziero  
Non aggio, che d'avè no po d'ajuto:  
Si chesto puro mme sarrà nnegato,  
Ll'avere fatto a bbuie, che mm'ha frottato?

## XLV.

Mara me, ch'aggio ditto! Dobbetare  
Comme maie pozzo de sti figlie mieje?  
Che lo ffacciano ll'uommene, assa fare,  
Ma ccà non se sa manco che ccos'eje;  
Ch'ogn'ato vizio se ponno vantare  
D'avè mparato lloro da li Deje,  
Fore che cchisso, d'esse scanosciente  
Co li benefatture, e li pariente.

## XLVI.

Pe cchesto mo, sicura de la razia;  
Ve preo a ttutte quante de soccorrere  
Li ciucciarielle mieie, che na desgrazia  
Da li Griecce mo mmo stanno pe ccorrere.  
Venite, e non facite, che se sazia  
L'arraggia lloro, e a llav'aggia da scorrere  
Lo sango de ssi povere asenielle,  
Che ssi a mme figlie, a bbuie ve so ffratielle.  
Mam-

## XLVII.

Mamma mia , quanno maie , le responnette.  
Giove , nuje aute simmo state sgrate  
Co cchi na bona razia nce facette?  
E cco tte , che nc'aie propio ferrettate ,  
Comme se dice , co ccippe , e mmanette ,  
Vuo' che ssimm' accossì? Simm' obbreocate  
De spennerce lo sango , e cquanto avimmo,  
Ca quanto nc'è , da te lo ccanoscimmo.

## XLVIII.

E ppe te fa a bbedè quante nce mporta  
De sarvà li fratielle , aie da sapere ,  
Ca primmo , che spontasse da la porta ,  
Nuie nc' erano acchiattate , pe bedere  
Che s'aveva da fare , e dde che sciorta  
Trattà ssi guitte ; e ffarle no piacere ,  
Che no l'è stato fatto da la mamma ,  
Ch'abbesogna che ssia na gran Quarchiamma.

## XLIX.

No nce vo niente , se votaie Vorcano :  
E' ppiso mio de te le ccastecare .  
Mo na rezza de fierro , mano mano ,  
Da li Cecrope mieie faccio stampare ,  
E tte le nchiappo abbista ; e cquanto mmano  
Po ll'avarraie , fa chello , che te pare.  
Che rrezza , e ttrezza? aie da ncappà n'auciello?  
(Repreca Marte) sempe simmo a cchello .

Zit-

## L

Zitto, Vavone mio, ca n'è ppe ttene  
 De parlare de machene de guerra;  
 Va a ffa tripete, e spite; e llassa a mmene,  
 Ch'è arte mia, de manejà la sferra.  
 Tu co rrezze, e ggajole te nne viene,  
 E ccà nce vonno mazze, comme terra:  
 Lassa fa a mmene, ca nfra capo, e ccuollo  
 Le schiaffo na cagliosa, e tte le zollo.

## LI.

Annettatevi, già ch'avite fatto,  
 Guappune mieie, Giove le responnette:  
 Si Marte mio, non serve sso sbaratto,  
 Pe ccastecà ssi cacapozonette.  
 Sarraggio muorto già, che nnitto nfatto,  
 Co na quatra de frdole, e ssajette,  
 Non pozza fa canosce a ssi smargiasse,  
 Ca uce stongh'io, pe le staglià li passe?

## LII.

Lo guaie n'è echisso; e già ve site puoste  
 A mpennere, e squartà, senza penzare,  
 Ca s'ha da fa co ccierti capotuoste,  
 Che nn'ogne ccunto la vonno spontare:  
 S'io mo, peglianno ssi conziglie vuoste,  
 Manno sse cquatto gatte a ccarrejare  
 Lotamma co na bbotta, se starranno  
 Ll'autè cojete? E' llesto: peo farranno.

Lo

## LIII.

Lo ffanno? (disse Marte) e nuie che ssimmo  
Ciunche, ch'abbista non te le sgorgiammo?  
Si, Giove lebbrecaie, jammo, accedinmo  
Tutto lo Munuo, e ppo comme restammo?  
E non saie, ca si ll'uommene perdinmo,  
Nuie deritto a lo ponte nce ne jammo  
A bbotà ossa? Si n'avimmo a lloro,  
De chi restammo Deie? de l'antecoro?

## LIV.

Otra ca po, co ttutto ca no Munno  
Avite sano sano de perzune,  
Co cchi spassà vuie ve potete attunno,  
Quanno patite de male de lune;  
Co ttutto chesto, sempe no zeffunno  
Siente ccà ncoppa; sempe a ccostejune  
Facite nfra de vuje: e cche sfiorria,  
Si lo Munno pe buie no nce sarria?

## LV.

Dice buono lo Gnore veramente,  
S'auza Mercurio, è no gran cervellone.  
E ppo ve pare cosa da prodente,  
Che sfaccia uno de nuie st'accesione?  
*Quanno fa grazia, mosta allegramente*  
*La mano, che la fa, no saracone;*  
*Quann' ha da castecà, lo llassa fare,*  
*Isso puro la ffa, ma no nce pare.*

Pe



## LVI.

Pe cchesto , pe ssarvà , comme se dice ,  
Li cavole , e la crapa ; da na banna ,  
Si s' hanno a ccastecà comm'a nnemmice ,  
E dda n' aota , n' è buono , che le scanna  
Uno de nuie ; pe mmantenerle ammice ,  
Che s' ha da fa ? bisogna , che se manna  
N' ommo , che sserva pe ffare lo bboja ,  
Ca tutta la disgrazia sarrà soja .

## LVII.

E' lo vero , pe ll' arma de Messere ,  
Disse l' Asenetate , dice buono .  
Accossì s' ha da fa : ma sti penziere ,  
Chi se lo ppiglia , d' accordà sto suono ,  
Azzò che st' ommo abballa ? Stà a bbedere ,  
Disse Mercurio : io carreo sto truono ,  
E buie ve sentarrite da ccà ncoppa  
La bbotta , che ffarrà , quando po schioppa .

## LVIII.

Chesto non po jì meglio pe nà via ,  
Se vota Giove , ma pe n' aota sgarra :  
Se ll' ha da dà na bbotta , ma che ssia  
Na bottecchia de mazza , e non de varra .  
Che bboglio di ? La ntenzione mia  
E de toccarle schitto la zimarra :  
E' buono , che nnuie simmo rispettate ,  
Ma n' è buono , che restano scannate .  
A ccche-

## LIX.

A cchesto so cco ttico: si te pare,  
Potimmo fa na cosa, le respose  
Mercurio. E cche ssarria? Jammo a ttrovare  
Una de chelle, che co ccerte ddose,  
Co ccerte magari, che ssanno fare,  
E cco ddi parolelle, e aote ccose,  
Te fanno n'ommo-arreventà porciello,  
Na vreccia, no cavallo, ò n'arvosciello;

## LX.

E dda cheste, pe scagno de la ntosa;  
Che le vorriamo fa, te le ffacimmo  
Trasformà tutte nciucce; co sta cosa;  
Nuie co ll'annore nuosto rommanimmo,  
Lloro se sentarranno sta cagliosa,  
Nce restarranno ammice, comm'apprimmo,  
E lloro, co li ciucce conzarvate,  
Staranno, e ss'amarranno comm'a ffrate.

## LXI.

Bene, bene, resposero, bellissemmo,  
Tutte li Deie: ll'aie propio annevenata.  
Oh comm'è bbona! Via jammo a ppelissemo.  
No nce vo auto. Cierto, ll'aie ncarrata.  
Non se po fa cchiù bella. Va bravissemo.  
Quanto la truove meglio? Ll'aie nzertata.  
Si no mmalora. O bravo! Va nc'arriva.  
Viva sempe Mercurio, Viva Viva.

E, ccon-

## LXII.

E, cconcruso accossine, se scompette  
 Sto gran conziglio. Giove s' accostaje  
 Nnanze a l'Asenetate, le projette  
 La mano, e nzi a le ggrade l' appojaje.  
 Vasta nzi ccà. No mporta. Eh Uscia me mette  
 Nzoggezzione. Nol farraggio maje.  
 Via mo, ca mme ne scenno chiano chiano.  
 P' obbedireve. E le vasaie la mano.

## LXIII.

Tutte ll' aute, nche bbeddero scompute  
 Ste zeremonie, se lecenziajeno;  
 E ppecchè steano tutte mieze jute,  
 Ca fue brutta la scigna, che ppigliajeno,  
 Nche arrevaieno a le ccase, appaghiarute  
 Ncopp' a li matarazze se jettajeno;  
 E llà chi se mettette a bbommecare,  
 E cchi, comm' a scannato, a rroufejare.

## LXIV.

Sulo Mercurio, che se mantenette,  
 S'abbiaie co Selleno a mmano a mmano;  
 E ppe la via lo tutto le decette,  
 Ch'avea da fa lo Rrè dinto Gragnano:  
 Po le die no vasillo, e sse nne jette  
 Chilò addò Varvajanca chiano chiano;  
 Isso cchiù llieggio de chillo, che squaglia,  
 Co no vuole fue dinto a la Tessaglia.

*Scompetura de l'Arragliata XII.*

DE LA  
**CIUCCEIDE**  
 ARRAGLIATA XIII.



ARGOMENTO.

*Mercurio arriva dinto a la Tessaglia,  
 E bba a pparlare co na vecchiarella  
 De chelle, che tenè chillo, che squaglia,  
 Soleno nchiuso int' a na carrasella.  
 Le dice, che pe ncopp' a la moraglia  
 De Gragnano le faccia na cosella.  
 Arrivano li Grieci, e hanno attuorno  
 Pe ddà l' assauto, ninche schiera juorno.*

I.

**T**Essaglia è no pajese de lo Munno,  
 Che stà propio a lo Guorso de Zitorno;  
 Attuorno ha de montagne no zeffunno,  
 Che cquase nnommenà manco se ponno:  
 Nc'è Otirre, e Pinno, che lo Ddio, ch'è ghiunno,  
 Sgargeia, quanno stà mpierno, e quanno à suonno;  
 E dda do scioscia la Terrazzanella,  
 Nce so ll'aote mmontagne d'Ossa, e Pella.  
 A sto

## II.

A sto luoco, da tanno che nce stette  
 Chella bonora nera de janara,  
 Che, pe ggabbà lo Suocro, lo vollette;  
 Comm' a bballana, dint' a na caudara;  
 Da chillo tiempo no nce rommanette  
 Na vecchia, che non fosse fattocchiara.  
 Ché ddico, vecchia? nzi a le ppeccerille  
 Se mmezzaieno de fa le ppopatelle.

## III.

E ffuieno tanta le ffattocchiarie,  
 Che, scurisso, chi schitto se nzonnava.  
 De notte prattecà pe cchelle bie,  
 Ch'auciello auciello, abbista nce ncappava;  
 E ghiuto mmano a cchelle brutte Arpie,  
 Chi da ccà, chi da llà lo storzellava  
 De muodo, e dde manera, che lo scuro  
 Non servea manco pe ttrapanaturo.

## IV.

Po de chi nne faceano no cavallo,  
 No voie, na vaccarella, o no vetiello:  
 Cert' aute arreventavano no gallo,  
 Na vrecchia, na cestunia, o n' arvosciello:  
 Chi na seggia, chi ciuccio, o pappagallo,  
 E cchi no pappamosca, o no porciello,  
 E ttutte nzomma d' uommene perdevano  
 E bboce, e ccuorpo, e n'auto nne vestevano.  
 Mper-

## V.

Mperzò si cammenanno , pe ffortura  
Pe cchelle bie trovave na Cajazza ,  
Potive dî: Sta bella criatura  
Fuie na femmena cierto ; e sta vociazza ,  
Co tutto ca n' è ffemmena , le dura :  
E ssi a rrevota te mettea na chiazza ,  
Quanno stea a ttatanà co le ccompagne ;  
Mo te nfetta ste ssirve , e ste ccampagne .

## VI.

Si scontrave no Ciuccio a no pontone  
Carreco de lotamma, e dde mmonnezza ,  
Potive dî: Chist' era no reccone ,  
Vi addò so li zecchine , e la rrecchezza ?  
Si vedive volà no Sportegljone :  
No mbì chist' auto ? e ssa che ffinà pezza  
Era lo bene mio ? lo marranchino  
Ascea de notte , pe ghiocà d'ancino .

## VII.

Si le ttele facevano li Ragne ,  
Pe ncappà li moschillè , che ppassavano ;  
Puro accossì faceano a li compagne  
Chiste, che mino so rragne , e le ggabbavano.  
Si lo ggrano pe mmiezo a le ccampagne  
Le Fformiche arroccchiavano , e stepavano ;  
St'avarune porzi accossì ffacevano ,  
Quann'a ll'aute arrobbavano, e nchiudevano.  
Nzom-

## VIII.

Nzomma , si nfensejava no Froncillo ,  
 Si zecchejava llà no Marvezziello ,  
 Si zio zì facea no Sorecillo ,  
 Si mbè mbè responnea no Pecoriello ,  
 Si t'abbajava ncuollo no Canillo ,  
 Si sentive arraglià no Ciucciariello ,  
 Potive dire : Tutte st'anemale  
 Eran' uommene primmo , e mmo so tale.

## IX.

Na cosa schitto nc'era , che ppoteva ,  
 Co lo tempo , sarvà sti sfortunate ;  
 Ca si a ll'auti cazune se nne jeva ,  
 Primma de lloro , chella , che mnotate  
 Ll'avea d' uommene mmestia ; se rompeva  
 Subbeto la fattecchia , e rretornate  
 A la forma de primmo , se nne jevano ,  
 Senza che cchelle cchiù le ttattenevano .

## X.

Comm'a cchi na Tarantola ha schiaffato  
 No muorzo , siente di a le becchiarelle ,  
 Ch'ogn'anno ha d'abballà lo sbentorato ,  
 Tutto chino de nocche , e ziarelle ,  
 Pe nzi che cchella , che l'ha mozzecato ;  
 No le faccia passà le ttarantelle ;  
 E nce le ffa passà , quanno na gatta  
 Le fa no carezziello , e tte la schiatta.

Ma

## XI.

Ma si mbè chilli scure retornavano  
 Uommene, comm'a pprimmo, se vedevano  
 Fa certe ccose, che s'allecordavano,  
 Che, quanr' erano bestie, facevano.  
 Ca si de chillo scuorzo se spogliavano,  
 Chille costume sempe mantenevano;  
 Tanto che cchi era stato n'anemale,  
 Ommo, e buono era puro bestejale.

## XII.

Chist' era lo pajese, addò volanno  
 Da lo Cielo Mercurio se nne jette;  
 E ssenza che lo jesse revetanno,  
 Pe ttrovà chelle ffemmene mmardette,  
 Tutt'aonite l'asciaie, che ghiusto tanno  
 Steano facenno cierte descurzette  
 De lo cchiù, e de lo mmanco, sotta voce,  
 De notte, ncopp'a n'arvolo de noce.

## XIII.

Sta noce era lo luoco, addò st'Arpie  
 Se nne jeano de notte a cconfarfare,  
 Pe bedè de che mmuodo, e ppe cche bie  
 Potessero lo Munno sconquassare;  
 E ppe ffa meglio ste ffrabbottarie,  
 Senza farene ll'uommene addonare,  
 Quanno chille dormevano, pegliavano  
 Deverze forme, e sse l'appalorciavano.

Chi



## XIV.

Chi venea nforma de na Coccovaja ,  
 Chi pegliava de n' Ascio la fegura ,  
 Chi da Cuculo te facea la baja ,  
 Chi da Cevetta te mettea a ppaura ;  
 E ttutte nzomma jeano a ffa ssa baja  
 Nforma de chill' aucielle , ch' a la scura  
 Te le bide ronnà pe ssi pontune ,  
 Luccare , Varvajanne , e Sportegliune .

## XV.

Ma chillo , ch' era aucielle cchiù de lloro ,  
 E ssapeva da ll' A pe nzì a lo Rummo ,  
 E , a ffa nziemo co cchelle sto lavoro ,  
 Te ll'avarria portate summo summo :  
 Ca mmano a isso se colava ll' oro ,  
 Anz' oro te facea parè lo cchiummo ,  
 E ppe ffa mbroglie nne venea da metere ,  
 Tanto che nullo nce pòtea competere .

## XVI.

Nche n' uocchio nce jettaje , e le bedette ,  
 Le ccanoscette a cchella ncornatura ,  
 E cco no ppizzo a rriso le decette :  
 Schiavo , Signore meie ; che ggran fortuna  
 E' dde Mercurio vuosto ! Nche ssentette ,  
 Ch' era Mercurio , agnuna pe ppaura  
 Restaie fredda , e ghielata ; se schiaffaje  
 Lo pizzo int' a le scelle , e ss' accovaje .  
 Ched'

## XVII.

Ched' è stato, che buie v' anasconnite?  
 (Le lebbrecaie Mercurio) so benuto  
 A sservireve à ttutte, ca mm' avite  
 Da fa no gran piacere, e ddarme ajuto:  
 Saccio quanto mm'ammate, e cche ppotite,  
 Ca da no piezzo v' aggio canosciuto;  
 Mperzò stammo nfra nuie da frate, e ssore,  
 Azzeccateve tutte, anemo, e core.

## XVIII.

Co sto pparlare agnuna jle caccianno  
 La paura da dinto a le bodelle;  
 E ccomme se nce jeva assecoranno;  
 Jea caccianno lo pizzo da le scelle:  
 A lo rreto, zompanno, e scellejanno  
 Da ccà, e dda llà pe cchille ramoscielle;  
 S'aonieno tutte ncopp' a cchillo rammo,  
 Addò Mercurio stea, comm' a rrechiammo.

## XIX.

Nche le bidde azzeccate, le contaje  
 Chillo la guerra de li Siciune,  
 E tutto chello, che se confarfaje  
 Nfra isso, Giove, e ll' aute Satrapune;  
 E all' utemo le disse: S' appontaje,  
 Ch' una de vuie, co cchelle mmenzejune,  
 Che so ssolete voste, avesse fatto  
 Deventà agnuno ciuccio mitto nfatto.

I

Pe

## XX.

Pe cchesto chi se fida, e lo ssa fare,  
 Lo ffaccia primmo, che se schiara juorno.  
 Via su, mano a li fierre. A sto pparlare  
 Tutte l'aucielle se votaïeno attuorno;  
 Po se mesero fitto a sgargejare  
 N'Ascio, che stea cchiù truosto de no cuorno,  
 Comm' avessero ditto: Chist' è isso,  
 No nc' accorr' auto, no nte cagnà chisso.

## XXI.

Panfela se chiammava, ed era chella,  
 Ch' a lo scuro Apoleio fice la festa,  
 Ma senza corpa; ch' a la carrafella,  
 Che cchella tenea fore a la fenesta,  
 Si isso non avea l'artetechella  
 De se nce jì a ssedognere, da chesta  
 Desgrazia fuorze nne sarria scappato,  
 E n' avarria lotamma carrejato.

## XXII.

Ma, fosse soia la corpa, che credeva  
 De fa no vuolo co chell' onzione:  
 Fosse de la Vajassa, che ddeveva  
 Nformarse meglio de la mmenzione:  
 Fosse de la Patrona, che ssapeva  
 Quanto sti duje aveano ntenzione;  
 Vasta, ca essa avea st' arte a le mmano  
 De fa arreventà ciuccio no pacchiano.

Ora

## XXIII.

Ora chesta vadenno , ca da essa  
 Steano tutte aspettanno la risposta ,  
 Votàtasse a Mercurio , disse : Chessa  
 E' na fatica , che ppoco mme costa ;  
 Ma n' è ccosa de farla co ssa pressa ,  
 Ca Febbo co lo carro già s' accosta ;  
 E caà bisogna , che la notte stia  
 Secotanno li grille a mmeza via .

## XXIV.

Mperzò dimano a ssera vienetannè ,  
 Ca nce nne jammo a ffa sta fonzione ;  
 E ssi non puòie venire , vavattenne ,  
 Ca resta a ppiso mio sta mménzione :  
 Mme nne vao co no volo int' a le ttenne ,  
 E ssedognenno co no carrafone ,  
 Che mme porto co mmico , lo tterreno ,  
 Te le mmano volanno a mmagnà fieno .

## XXV.

Nò , facimm' accossì : ( le responnette  
 Mercurio ) azzò che ttoccano co mmano ,  
 Ca nuollo sto malanno le chiovette ,  
 Pecchè bozero jì dinto Gragnano ;  
 Sto zuchillo bisogna , che lo jiette  
 Ncopp' a le mmura , azzò che mmano mano ,  
 Comme chille le beneno zompanno ,  
 Vengano tutte ciucce arreventanno .

## XXVI.

Chesto mo a gustu tuio , le disse chella ,  
 Già che tu vuò accossi , accossi bogl'io .  
 Covernate. Orsù fa , che rresca bella  
 La mmenzione . E' penziero lo mio  
 De servireve a ttutte a barda , e ssella .  
 Schiavo. Obbreccato. A lo commanno. Addio.  
 E bolato Mercurio , se scompette  
 So pisse pisse , e agnuna se nne jette.

## XXVII.

L'Aurora ntanto, che s'era addonata ,  
 Ca li cavalle co lo carrettone  
 D'Apollo già s'avevano pigliata  
 La mano , p'asci fore a lo portone;  
 Non sapenno che ffa , s'era affacciata  
 Tutt'arrossuta ncopp'a no barcone ,  
 E stea da llà nfettanno miezo Munno :  
 Aparate , aparate sto zeffunno .

## XXVIII.

Quanno li Siciune compatterò  
 Sott'a Gragnano , mmiezo a na chianura ;  
 E ffuieno tanta , che nce nne venettero ,  
 Che ccreo , no nce restaie na criatura  
 Dint'a le Terre lloro . Nce correrò  
 Le mmogliere , e le ffiglie ; e ppe ffortura ,  
 Nzi a cchi non potea scì senza stanfella ,  
 Nce fuie portato a mmammara , e nno cella .  
 E nn'

## XXIX.

E nn'aveano ragione , ca penzavano  
De nce jì a ffa na festa into Gragnano :  
Pocca lo mmanco', che se smacenavano ,  
Era d'avè co cchille a ccaccià mano ;  
E dd'auto pe la strata non parlavano ,  
Che de banchette , e farse no tiano  
Tutto de capezzale , e ffecatielle  
De pollaste de ciuccio , e stentenielle.

## XXX.

Ma li papurchie , che s'aveano fatto  
Male lo cunto senza tavernaro ,  
Non sapeano , ca jevano de chiatto ,  
Quanno credeano agliotterse lo maro :  
Penzavano de fa no buono accatto ,  
E ghiocarse li ciucce a pparo , e sparo ;  
Ma po co na codella se trovajeno ,  
Che pe cquarch'anno se la strascenajeno.

## XXXI.

Musa tu , che lo mese , e ssaie lo juorno ,  
Che ssocedette sto caso de chiappo ,  
E ssaie ll'anne , la facce , e lo contuorno  
D'agnuno , che nce jette a ffa lo guappo ;  
Fa , sore mia , ch'io scompa sto taluorno ,  
Che mm'ha storduto , e llevame sto tappo :  
Ca si sta vota me nne veo asciuto ,  
Te mpromecco da mo de farne yuto .

I 3

Era

## XXXII.

Era justò lo primmo de lo mese ,  
 Che ffa mette nzoperhja li Vastase ,  
 Ca lo carrino tuio va no tornese ,  
 Quanno le cchiamme , pe sfrattà le ccase ;  
 E pp' uso , e ccostomanza a stò pajese  
 Se janchejano puro le pprevase ,  
 E strellà pe le strate , nzi a le pprete ,  
 Non sint' auto , che: Ghiettalo , ca feto.

## XXXIII.

Quanno li ciucce veddèro da fore  
 Spontà n' alarbaria de spellecchiune ;  
 Che beneano facenno no remmore ,  
 Comme fosserò vespe , o moschegliune.  
 Chi jea ncammissa , e cchi a lo cosetore  
 Ave lassato mpigno li cauzune ,  
 Chi scauzo , chi ncaruso , e cchi portava  
 Na tabbanella , che te pernejava.

## XXXIV.

Venea primmo na mmorra de sordate ;  
 Ch'avarria fatt' a ppunia co la morte ;  
 Gente de fazzejone , e ddesperate ,  
 Che ssubbeto veneano a ll' arme corte ;  
 Deceano , ch' a lo mmanco erano state  
 N' anno ncomposta int' a l'acito forte ;  
 E , ccomm' a ppeparuolo , russo russo  
 Portavano lo naso co lo musso .

Chi-

## XXXV.

Chiste jeano ncammisa , e non s'ervevano ,  
 Ch' a ffarese na bona ponejata ;  
 E mmare a li nnemmico , che mmestevano ,  
 Ca , nche ll' erano ncuollo , na granfata  
 A pprimma botta nfacce le mettevano ,  
 E a ccauce , e a mmuorze po , a la desperata ,  
 Nne faceano na pizza , e l' ammallavano ,  
 Tanto che mmieze muorte le lassavano .

## XXXVI.

Secotejava po na compagnia  
 De gente de tracolla , e dde scoppetta ;  
 E arreto a cchiste n' ata frattaria ,  
 Tutta d' arranca , e ffuie , de scippa , e ghietta ;  
 Veneva appriesso la cavallaria ,  
 Ch' era de mariuole na scoglietta :  
 Viate a cchelle tterre , pe ddò passa ,  
 Ca manco lo tterreno ne nce lassa .

## XXXVII.

Passata chesta , miezo nfracetato  
 Veneva lo Capetanio Cennerale :  
 Tenea ncapo na pezza pe ttocate ,  
 Ch' uno asciuto pareva da lo Spetale :  
 No pede , co na gamma avea nfasciato ,  
 E ncanna le pennea no varvazzale  
 Chino de nozzolelle ; e cchi le bedde ,  
 Le ppassaie tutte pe ppostcome fredde .



## XXXVIII.

Lo teravano dinto a na carretta  
 Na mula, e no cavallo scortecone:  
 Tenea accanto la spata, e la moletta,  
 Lo scuto, l'aurinaro, e lo pistone:  
 Nzomma dinto nce stea nzi a la cascetta  
 Lesta, chi sa, pe cquarche accasione,  
 Che dda dinto no sciauro nne scappava  
 Da quanno nquanno, che te conzolava.

## XXXIX.

Attuorno a isso se vedea lo sciore;  
 L'accoppatura de li smargiassune;  
 Tuttè jeano vestute a no colòre:  
 Tutte aveano le spate, e li bastune;  
 E itutte, nche ssentevano l'addore  
 De lo zuchillo co li maccarune,  
 Menavano le mmano a ttunno a ttunno;  
 Nzi che no nne vedevano lo funno.

## XL.

Mmiezo a llo ro de Grecia la bannera  
 Venea, comm'a no luoco cchiù ssecuru;  
 Ch'era na pezza nquatro, de manera,  
 Che pproprio te pareva no moccaturu,  
 Ma de ohille a ddoie facce; sotta nc' era  
 Na lenza de colòre chiaroscuro,  
 Che ddinto sta settenzia nce stea scritta:  
*Non se sa qua è la smerza, e la deritta.*  
 Chiu.

## XLI.

Chiudeva po st'aserzeto na folla  
De femmene, de vecchie, e ppeccerille:  
Chi portava no citolo nfasciolla,  
Chi se spassava co li strommolille,  
Chi venea arrepezzanno na tracolla,  
Chi jea cosenno, e cchi facea pezzille,  
Chi pazzejava co no pecoriello,  
E cchi s'accarezzava no porciello.

## XLII.

Chist'erano li Grieco, che benettero  
Pe se magnà li ciucce sbentorate;  
Ma nche nfacce Gragnano se vedettero,  
Posaieno tutto nziemo; e rreterate  
Da ll'aote li Qualisse, se mettertero  
Sott'a ciert'arvoscielle, addò assettate  
Se stettero no piezzo a cconfarfare,  
Pe bedè chello, che s'avea da fare.

## XLIII.

Decea lo primmo: lo songo de parere,  
Che s'aggia a ddà l'assauto a sta pedata,  
Azzò che ppo no nc'aggia a ddespiacere  
D'avè perza, pe niente, sta giornata:  
Ca certe bote, pe lo stà a bedere,  
Se sole sgarrà tonna la colata;  
Mperzò mo propio, comme nce trovammo,  
Movimmoce, corrimmoce, e zompammo.

## XLIV.

Ched' è ssa pressa? ( responneva n'auto )  
 Sotta correzzione , no mme pare ,  
 Che s'aggia mo da corre a ddà st'assauto:  
 Nuie stammo stracque pe lo ccammenare,  
 Nce vò no pò de forza a ffa sso sauto;  
 Si non facimmo primmo arreposare  
 Pe no juorno , a lo mmanco , sti sordate,  
 Comme ponno zompà , si so spedate?

## XLV.

Ch'avimmo da zompà carche Castiello?  
 ( Repegliava lo tierzo ) no le bide  
 Sse ggra mmoraglie? co no zompetiello  
 L' accuoppe meza canna , che te cride?  
 Non so sseie parme; e cco no passetiello  
 Si de trasirce dinto no nte fide ,  
 Sarraie siseto , ciunco , e stroppejato ,  
 O da tre ghiurne n'avarraie magnato.

## XLVI.

Segnure mieie , decea lo Caporale ,  
 Pe mme non saccio , che bonora avite?  
 State a ssenti. La caosa prencepale  
 De non dà mo st' assauto , che ddecite,  
 Non è , ch' a li sordate le fa male  
 Ll' uosso pezzillo , comme ve credite;  
 Ca a zompà chelle mmura è na freddura;  
 E lo ffarria porzì na criatura .

Ma

## XLVII.

Ma , p' ògne bona regola de guetra ,  
 Besogna primmo , che ghiammo vedenno  
 La desposezione de la Terra :  
 Ca a mme, pe ve la dì, comme la ntenno ,  
 Mmie dà che sospetà , ca no nne sferra  
 No ciuccio da llà ddinto ; e non comprenho,  
 Comme a tanta remmure, che ffacimmo,  
 Non s' affaccia uno , pe bbedè chi simmo .

## XLVIII.

Chi sa che nce po esse lloco ssotta ?  
 Chi sa che marcangegna vonno fare ?  
 Mperzò non s' ha da correre de botta ,  
 Ma bisogna aspettà , pe la ncarrare .  
 Stammo ccà pe ttutt' oggi a ffa la scotta ,  
 Pe bedè che pò esse, e pp' asservare  
 Li motive , che ffanno ; e ppo dimano  
 Nne cacciammo nne n' attemo le mmano .

## KLIX.

Ment' isso stea parlanno , se vedevano  
 Calà tutte la capo , e l' approbbavano ;  
 Po , quanno appe scomputo , le decevano ,  
 Ca non potea dì meglio , e lo ncenzavano ;  
 A lo rreto affollate le correvano  
 Ncuollo , e tte l' abbracciavano , e basavano ;  
 E isso mmiezo puosto mperecuoccolo ,  
 Pe la prejezza se nne jeva nzuoccolo .

## L.

Po se nne jleno tutte, e sse mettette  
Agnuno pe spià chello, che nc'era;  
Ma nce perdle lo tiempo, ca nce stette,  
A ffa sta penetenzia nzi a la sera,  
E dda dinto Gragnano no nn'ascette  
Manco na gatta. E dde chesta manera,  
Avle la fattocchiara tiempo, e lluoco  
D'addecrejarle a ttutte pe lo brüoco.

*Scompetura de l'Arragliata XIII.*

DE LA  
**CIUCCEIDE**  
 ARRAGLIATA XIV.



ARGOMENTO.

*Panfela se fa n'Ascio, e a mmeza notte  
 Va la fattecchia a ffa ncopp'a le mmura.  
 Se dà a ghiuorno l'assauto, e nquatto bbotte  
 So ncappate li Griecce a la fattura,  
 E nc' abbuscano certe ppoco zotte.  
 Ncapo de tiempo cagnano fortuna,  
 Tanto, che ppuoste neasecavallucee,  
 Conzervano la Reggia de li Ciucce.*

I.

**L**A Notte, che mpararse de pettura  
 Maie a la scola non avea potuto,  
 Vedenno, ca nc' avea na gran fortuna  
 Lo Sole; e cch' a ppetà nc' era rescuito;  
 Pe ffarle no despietto, er' a la scura  
 Juta nfacce a no quattro, addò scomputo  
 Nc' aveva chillo de pittà lo Munno,  
 E scacanno lo jea da capo a fianno.

Quan-

## II.

Quanno la fattocchiara , ch'aspettanno  
 La meza notte stea co ll'ova mpietto ,  
 Vedenno , ca già n'ora stea toccanno ,  
 Se sosie , zitto e mmutto , da lò lieto ,  
 Addò stea lo marito ronfejanno ,  
 Ed a la nnuda s'accostaie depietto  
 A na fenesta , addò tenea stipate  
 Tutte le ccarrafelle percantate .

## III.

Nne piglia una , nne leva lo stoppaglio ,  
 E nne devaca dint'a n'arvariello  
 No po d'agniento , verde comm'a n'aglio :  
 Po dà de mano a no carrafonciello ,  
 Se cala , e cco no capo de sguinzaglio  
 Se l'attacca a no pede , s'auza , e cchello ,  
 Che ddinto a l'arvariello avea colato ,  
 Lo mmesca co n'at'uoglio mmalorato .

## IV.

E ssedottane n'una , e n'aruta mano ,  
 Se le scerega nziemo ; e nche le bede  
 No poco caudolelle , chiano chiano  
 Se nn'onta da la capo nzi a lo pede .  
 Fatto chesto , scommoglia no tiano ,  
 Piglia no po de grasso , e cco no pede  
 D'aruta secca , che ttenea a la chioccz ,  
 Se nne fa nna stenzella cadè mmosca .

E bbec-

## V.

E bbecco , anitto nfatto , che ttremmanno ,  
 Pecune , e ppenne pe la vita ll'esceno :  
 S' arronchiano le braccia , e sse nne fanno  
 Doie scelle , che se schiegano , e ss'aonesceno :  
 Ll'ogne a li piede se vanno allonganno ,  
 E mponta , comm'a ccrocco , s'appezzesceno :  
 Se le ntosta lo naso , e scenne abbascio ,  
 Le commoglia la vocca , e sse fa n' Ascio .

## VI.

Fa no zumpo , e bà ncopp' a la fenesta ,  
 Po se lanza de botta , e scappa fore :  
 Rape , e nzerra le scelle , e llesta lesta  
 Se jetta co no vuole , che nquatt' ore  
 La porta , addò s'avea da fa la festa .  
 Nchè ffo arrevata , senza fa remmore ,  
 Piglia co ll'ogne lo carrafonciello ,  
 Che s'attaccaie , primma de farse auciello :

## VII.

Nne scippa l'appelaghio , e cto lo pizzo  
 Lo scioglie da lo pede ; e ppo volanno  
 Pe ttutte chelle mmura , p'ogne ppizzo ,  
 Pe ddo cammina , nce ne va scolanno  
 No pocorillo , anzi ch' a stizzo a stizzo  
 Se jle lo carrafone devacanno .  
 Devacato che fluie , lo jetta nterra ,  
 Ammarcia , totna femmena , e sse uzerra .  
 Mente



## VIII.

Mente la fattocchiara attuorno attuorno  
 Se nne jeva facenno sta fattura ;  
 Li scure Siciune , che lo juorno  
 N' aveano visto nullo pe le mmura ,  
 Dapò d'avè gerato lo contuorno ,  
 Assecorate , ca pe la paura  
 Chille stevano nchiuse , se mettertero  
 A ffa no scialatorio , e ss'addormettero .

## IX.

E nche ghiurno schiaraje , nche se sentette  
 Lo tappa tappa de li tammorrine ,  
 E lo ntantarantà de le ttrommette ;  
 Zompaïeno leste da li strappontine ,  
 E ccevatese tutte le scoppette ,  
 Confortatese primmo le stentine ,  
 Se mettertero tutte nn'ordenanza ,  
 Pe ddà l'assauto , e rrompere sta lanza.

## X.

Ma mante , che nnesciuno se movesse ,  
 Le voze fa lo Capo na parlata ,  
 Azzò ch'agnuno de li suoie corresse  
 Co cchiù spireto a ffa sta gran frettata ;  
 E mmiezo a ttutte , pecchè lo sentesse  
 Tutta la gente , che stea squatronata ,  
 Ncopp' a no montonciello se mettette ,  
 S'acconciaie lo toccato , e ppo decette :  
Figlie,

## XI.

Figlie , ammeziune mieie , cammaratune ,  
( Sordate nò , ca sempe simmo state  
Anema , e ccuorpo ) quanta secozzune ,  
Quanta schiaffune nuie nc' avimmo date  
Da ch' eramo tantillo ? e ppo , guagliune  
Vi si nn' avimmo fatt' a pretejate  
A lo pajese nuosto ? e quanta notte  
Nce l' avimmo scialate int' a sai cotte ?

## XII.

Simmo cresciute nziemo , e mmo ccà ppurò  
A ccommattere nziemo nce trovammo ,  
Ma a ccommatte co cchi ? no po de muro  
S' ha da zompare , e ppo nc' arrecettammo  
Eccolo llà . Llà dimo a lo ssecuro  
Credeno stà li Ciucce : e nnuie , che ghiammo  
Scalejanno le ccase , notte , e ghiuorno ,  
Nce potarrimmo aggliottare sto scuorno ?

## XIII.

Nuie , che ppe no crapiccio simmo jute  
A scannarece puro co la Morte ,  
Mo sbentrà quatto ciucce addebbolute  
Non potarrimmo , o nc' ha da sapè a fforte ?  
Pe cchisse lloco avimmo nuie perdute  
Tanta compagne ; pe cchisse so mmorte  
Tanta povere gente ; e nnuie , ch' avimmo  
Da vennecarle , no lo ffaciarrimmo ?

Ecco

## XIV.

Ecco ccà attuoamo ( e ssi no le beditè,  
 Creditemello a mme, ca le bbed'io )  
 Cecio , Fonzo, che ttutte le ssapite,  
 Mase, Micco , Renzullo, e ttata mio ,  
 Che so muorte pe lloro; e ttutte aonite  
 Strillano : Che ppenzate? Che ggolio  
 Avite de sarvà chi nc'ha scannate?  
 Corrite, vennocatece , e zompate .

## XV.

Accossì ve scongiurano , e cchiagnenno  
 Ve mostano lo sango , e le fferute :  
 Jate, dice la Patria , a la ncorrenno  
 A vennecà sti figlie mieie perdute .  
 Jate, dice .. Ma già ve vao vedenno  
 Sghizzà sango da ll' uocchie , e rresolute  
 De nne fa na venaccia : jate , figlie ,  
 Jate , sparaformate ssi cconiglie .

## XVI.

Ment' isso stea parlanno , chille avevamo  
 L'arteteca , geravano , e botavano :  
 Mo jevano pe cchiagne , e sse tenevano .  
 E mmo co ll' uocchie'n Cielo sospiravano:  
 Quanno se schiaffejano , e cchiagnevano ;  
 Quanno se mozzecavano , e sbafavano ;  
 E , nche avette scompute , se lassajeno  
 Tutte de furia , e sse precepetajeno .

Jea

## XVII.

Jea nnanze uno strellanno: Mo vedimmo  
 Chi sa zompà cchiù llieggio, e cchi cchiù bale;  
 E ccorze tanto, ch' isso fuie lo primmo  
 A ghirse a dderropà: bell'anemale!  
 Jogne a le mmura, fa no zumpo, e pprimmo  
 De tutte ll' aute, pe non farse male,  
 Schiaffa na mano ncoppa a la muraglia,  
 Se jetta dimto, e ba a trovà la paglia:

## XVIII.

Pocca, nninchè la mano nce mettette  
 Ncopp' a echillo zuchillo, e lo toccaje;  
 Correre pe le bene se sentette  
 Na cosa fredda fredda, e ss'agghiajaje:  
 Na setola ogne pito se facette,  
 La pella comm'a ccuoiero se ntostaje:  
 Se ntorzaieno lle ddeta, comm'a spogna,  
 E dd'ogne ccinco se nne fice n'ogna.

## XIX.

Le rrecchie, che pprimm'erano tantillo;  
 S'anchiettero de pile, e ss'allongaieno:  
 Lo naso sprofelato, e peccerillo  
 Se le squaquaracchiaje; e sse ngrossaieno  
 La vocca, le mmascelle, e lo mussillo:  
 De le mmano duie piede se formajeno:  
 Ll' ascle da reto no scoppetteniello,  
 E dd'ommo arreventaie no ciucciariello:

Ma

## XX.

Ma pecchè cchesto no le ntravenette.  
 Ncopp'a le mmura, ma a la via de sotta,  
 ( Pocc' a cchillo gran sauto, che ffacette,  
 Nche le ttoccae, se derropaie de bbotta )  
 Nullo de li compagne lo vedette;  
 E ccredenno, che chillo avesse rotta,  
 A lo mmanco, la capo a Barvajanca;  
 De fa lo riesto le venea l' allanca;

## XXI.

E a ddiece, a bbiate, a ttrenta se mettevano  
 Tutte nziemo a zompà; ma nche ttocccavano  
 Chelle mmura mmardette, se vedevano  
 Co ttre pparme de coda, e ss'attassavano.  
 Veneano ll' aute appriesso, e ccomme jevano  
 Cadenno, accossì ciucce arreventavano.  
 Vennero tutte nzomma, e dde portante  
 Se jettero a ffa ciucce tutte quante.

## XXII.

Jeà caccuno pe ddì: Chesso, ch'è stato?  
 Se nce spremmeva, e non potea dì niente;  
 Ma ll'uno a ll'auto, comm'a no ncantato,  
 Non facev' auto, che ttenerse mente.  
 Jeva pe ssosperà, ma chillo sciato  
 Se lo sentea mbrogliare pe li diente:  
 Lo volea scapolà, ma sentea nata,  
 Ncagno de lo sospiro, n' arragliata.

Chi-

## XXIII.

Chisto fuie lo prencipio de li guaje ,  
Ma no scompieno ccà ntutto , e ppe ttutto;  
Pocca sott'a le mmura se trovaje  
Na quantetà de Scigne , ch'a lo butto ,  
Che ffice agnuno , quanno scravaccaje ,  
Co no capo de funa , zitto e mmutto ,  
A uno a uno te l'accapezzajeno ,  
E nnanze a Barvajanca le pportajeno .

## XXIV.

Tutto chesto ll'avea , lo juorno nnante ,  
Fatto allestì Selleno a lo ncorrenno ;  
Quanno , lassato chillo gra birbante  
De Mercurio , co cchi stea trascorrenno ,  
Corrette de galoppo , e dde portante  
A cconzola lo Rrè , che stea chiagnenno;  
E ppo , comme Mercurio le deceva  
Cacch' autà cosa , subbeto correva .

## XXV.

Junte llà nnanze st' Asene novielle ,  
Lo Rrè ordenaie , che ffossero attaccate  
Tutte quante de musso a l'arvoscielle ,  
Che steano pe llà ntorno pastenate:  
Addò chelle co ccierti mazzarielle  
L'ammatoraieno bone le ccostate;  
Po , pe le fa passà lo mal' ammore ,  
Tre ghiurne le ttenettero llà fflore .

E la

## XXVI.

E la matina , quanno se sosevano ,  
 Pe la marena te l' arrefrescavano :  
 A ora de magnà se nne venevano ,  
 E n' ata vota te le cconzolavano :  
 La sera po , che mmanco se rejevano ,  
 Co no poco de paglia le nforzavano ;  
 E a lo ppartire , co quatt' aute zotte ,  
 Le tornavano a ddà la bonanotte .

## XXVII.

Passate li tre ghiuorne , le sciogliettero ,  
 E le mmesero tutte a ffatecare :  
 A cchi ncuollo na stola le facettero ,  
 Pe le fa pezzolamma carrejare :  
 A cciete lle ccancelle le mettettero ,  
 E le pprete le ficero portare ;  
 Nzòmma a tutte toccaie no vejaggiello ,  
 Pe ffravecà le mmura , e lo Castiello .

## XXVIII.

E ddoraieno sta vita spremmentata  
 Pe anne , e anne , tanto che scomputo  
 Vedettero lo muro , e ffravecata  
 Tutta la Terra : veddero fornuto  
 Lo Castiello , e le Turre ; e mmaie la strata  
 Non se vedea d' avè no po d' ajuto .  
 Ma l' ajuto da chi volea venire ,  
 Si la Janara non bolea morise ?

Seie

## XXIX.

Seie vote a bisetà li Parzonare  
Era tornato lo Conciatanielle,  
Pe bbedè, primmo de se vennegnare,  
Lí tenacce, le butte, e li copielle;  
E aute ttante, pe li Potecare  
S'erano viste ascì li carosielle,  
Che sserveno, pe ffarte nzallanire  
Dint'a la casa, e ppeo, quando vuo' ascire.

## XXX.

Quanno, na notte, mente stea dormenno  
Varvajanca, Selleno l'apparete,  
E ddisse: Figlio, se nne va venenno  
Chillo tiempo, ch'io sempe te decette,  
Ca poteva venì: già stà facenno  
Le ppose chella scirpia, che ffacette  
La fattecchia a sti Griece; e cco sta morte  
Li poverielle cagnarranno sciorte..

## XXXI.

Pe cchesto no nte mettere a ppaura,  
Che t'aggiano da fà tanto de male;  
Ca si mbè tornarranno a la fegura  
De primmo, li costumme bestejale  
Non ponno maie lassare; e grán fortuna  
Credarranno la llo, si pe ttale  
Sarranno canosciute; e v'amarranno,  
Comme v'ammano mo, che co buie stanno.

Ma,



## XXXII.

Ma , azzò sta cosa n'aggia a ssorzetare ,  
 Pe sta Terra , quà ppoco de remmore ,  
 Dimano falle tutte scapolare ,  
 E dda le Scigno falle caccia fore  
 Co na scusa , ca no nc'hanno che ffare  
 Cchiù lloco dinto ; e, ppe mmostarle ammore ,  
 Dalle a mmagnà , falle na bona cera ,  
 Mannannille contiente , e bona sera .

## XXXIII.

Se scetaie Varvajanca , e rrommecanno  
 Chello , che già Selleno ll'avea ditto ;  
 Co tutto , ca le dea no po d'affanno  
 Sta mala nova , e lo facea stà affritto ;  
 Puro , fattose core , e cconfedanno  
 A lo Vavone suio , se stette zitto ,  
 E le pareva mill'anne , che scompesse  
 La notte , e cché caccia nne le ppotesse .

## XXXIV.

E nno ntanto lo Sole s'era fatto  
 A bedè pe le Turre , che cchiammaje  
 Tutte le Scigne , e le ntemaie lo sfratto  
 De li Ciucce : ma primmo ll'ordenaje  
 Che ll'aveano da dà : po , co no tratto  
 Veramente da Rrè , l'accarezzaje ,  
 E cco cciento parole nzoccarate  
 Nne le mmannaie contiente , e cconzolate .  
 Ma

## XXXV.

Ma subbeto , che cchilli poverielle  
 Se vedettero fora de la porta ,  
 Ncignattero a ffa ll' uocchie a ppesciarielle.  
 Chiagneano , e ghiastemmavano la sciorta,  
 Che spartì le ffacea da li fratielle ,  
 E ccagnà luoco . Vide quanto mporta  
 Chello , che ddisse chillo Varvajanne,  
*Ca ll' aosa , e straosa so dduie malanne.*

## XXXVI.

Jeano pe ccammenà li sbentorate ,  
 Ma devano duie passe , e sse sentevano  
 Tutte quatto li piede mpastorate :  
 Nne devano duje aute ; e sse vedevano  
 Votà tutte la capo a la Cetate ;  
 E ppenzanno , ca llo ro se nn' ascevano  
 Senza speranza de nce retornare ,  
 Ncignavano da capo a ppeccejare .

## XXXVII.

Tanto jleno facenno sso taluorno ,  
 Ch' a ppoco a ppoco se n' allontanajeno ;  
 E ghiusto a ll' ora de lo Miezozuorno .  
 Stracque , dinto a no vosco , se trovajeno ;  
 E bedenno , ca nullo pe llà ntuorno  
 Le ppotea sconcecà , s' abbarrucajeno ,  
 Chiagnenno , ncapp' a l' erva tennerella ,  
 E sse mesero a ffa la nonnarella .

K

A la

## XXXVIII.

A la stess' ora , a cchillo stisso punto ,  
 Che lloro s'addormettero , schiattaje  
 Panfela la janara , e ghie a ffa cunto  
 Co Mmenuosso de quanta nne mpecaje .  
 Caronte , co lo vuzzo unto , e bbesunto ,  
 Nche la vedde spontà , se nc' azzeccaje ,  
 La lanzaie co lo crocto , e nzicco nzacco  
 La corze a ghiettà mmocca a Pparasacco.

## XXXIX.

Morta chella , va trova la fattura ,  
 E bba a trovà cchiù ll'Asene addò stanno.  
 Nnenattèmo le torna la fegura ,  
 Ch'aveano apprimmo , ed uommene se fanno.  
 Se scetano ; e ffuie tanta la paura ,  
 Che le venette ncuorpo , che tremmano  
 Restaieno nterra mieze addebbolute ,  
 E stieno pe no piezzo mballanute.

## XL.

A ll'utemo se jettero p'auzare .  
 Lloco te voglio , e mmo comme facimmo ?  
 Non sapeano li scure comme fare ,  
 E ghieano a cquatto piede , comm'apprimmo .  
 Se tenevano mente , e nfrocecare  
 Auto non se sentevano : Addò simmo ?  
 Che nc'è ssocciesso ? Ch'è sta mmenzione ?  
 Chesto ch'è stato ? E ssuonno , o vesejone ?  
 Ma

XLI.

Ma puro tanto jettero facenno;  
 Tanto se jleno l' uocchie scereganno,  
 Che s' auzaïeno a l' allerta; e ccanoscenno  
 Chello, ch' era, se jleno allecordanuo,  
 Ch' uommen' erano state; e non sapenno  
 Comme ll' era socciesso sto malanno,  
 Deceano nfra de lloro: Ched' è stato?  
 Ch'avimmo fatto? e mmo chi nc' ha sarvato?

XLII.

Po, a la nuda, comme se trovavano;  
 Ascïeno da lo vosco, e se nne jettero;  
 Chi a na baña, e chi a n' autaj; e addò arrevavano  
 Cchi de no compremiento recevetero:  
 Addò aveano vestite, addò abbuscavano  
 Denare, e robbe; e ttanta une facettero,  
 Che nfra poch'anne (accossì bbà lo Munno)  
 Se trovattero ricche, e ricche nfunno.

XLIII.

Arrevate a sso stato, nnitto nfatto  
 Se vedettero auzà na nnommenata;  
 Ch'agnuno er' ommo da dà schiacco matto  
 A cchi puro la Legge avea stampata.  
 De poleteca po, no nc' era fatto,  
 Che no lo decedeano a na pedata;  
 Quanto fa sta zellosa de Fortura,  
 Pe ffa mette nq Ciuccio mppsetura!

K a

Me

## XLIV.

Ma fa, che bbuò ; chillo mmarditto addore,  
 Chillo sciauro ciuccigno, che ttant'anne  
 Ncuollo aveano portato, e nzì a lo core  
 Ll'era trasuto, da sott' a li panne  
 Sempe ll' ascea, comm' a nò tradetore ;  
 E dda chi, comm' a lloro, ricchiepanne  
 Non erano a lo Munno, erano abbista  
 Canosciute pe Ciucce, e ppuoste a llista :

## XLV.

Chiste fecero figlie, e ppo li figlie  
 Fecero ll' aute, e ll' aute ll' aute appriesso ;  
 E ppecchè da la chianta int' a li sguiglie  
 Passa lo stiss' ammore, nn' è ssocciesso  
 Che pe tutto lo Munno, si te piglie  
 Gusto de revotarlo, muore ciesso  
 Primmo de trovà n' ommo ; e, cquase tutte  
 De chella chianta là, puoie dà, sò ffrutte.

## XLVI.

Ma non contiente d' esse canosciute  
 Pe ciucce a li costumme, e a lo trattare ;  
 P' esse propio da tutte reverute,  
 Ciucce puro se vozero chiammare ;  
 E lo primmo, che ntese la vertute  
 De sto' nomme famuso, e ssengolare ;  
 Fuie no Rrè de la Perzia, che llassaje  
 Lo nomme d' Oco, e Ciuccio se chiammaje.  
 Ven-

## XLVII.

Vennero po li Griecce , e li Romane ,  
 E ffaceano nfra lloro a ssecozzune  
 Ll'uommene , e le Cetate sane sane ,  
 P' avè sto nomme . A ttutte li pontune ;  
 Non dico li forise , e li pacchiane ,  
 Ma ll'uommene d' azzò , e li capezzune  
 Scanosceano lo Vavo , e lo Sivavo ,  
 Pe ssentirese dì : Si Ciuccio schiavo .

## LXVIII.

Mperzò 'n Grecia Cleante , e Giunio Basso  
 A Romma Ciucce fujeno chiammate ,  
 Ma chisto , Ciuccio janco , che lo spasso  
 Era de tutta chella gran Cetate.  
 Nce fuie po no streverio , e no sconquasso  
 Nfra tutte le streppegne cchiù stemate ,  
 Ch' agnuna nne volea piglià lo nomme ,  
 Agnuna la casata , e lo cognomme ,

## LXIX.

Cornelio Scepejone , che ddoie vote  
 Fuie Cuonzolo , e sse vedde trejonfare ;  
 P' assecorà a la figlia na gran dote ,  
 Le diè n' Asena chiena de denare ;  
 E boze , che lo figlio , e lo nepote  
 Asene se facessero chiammare .  
 Cossì ciert' aute da na Ciucciarella  
 La casata pegliattero d' Asella .

Da

## L

Da la fameglia Asinia nne sguigliaje  
 Asinio Gallo, Asinio Capetone,  
 E cchillo, ch' arraglianno sbreognaje  
 A Catelina, Asinio Pollione.  
 E dda l' Aselliune nne scappaje  
 Lo famuso Sempronio Asellione,  
 Chillo, che pe ccantarla pe le strate,  
 Die la Storia de Romma a li Cecace,

## LI.

De le Ccetate po, Sciumme, e Casale;  
 Che nce so mmo a lo Munno, o so già strutte,  
 E dda sto nobelissemo anemale  
 Asene, e Ciucce se chiammaieno tutte,  
 Chi nne pò dì lo numero? Asenale  
 Nc'era 'n Grecia na Tribba; e nzì a li frutte,  
 Nzì a li pisce, ( chi maie lo ccredarria? )  
 P'avè sto nomme jevano mpazzia.

## LII.

E nn' aveano ragione; ca vedevano  
 Tutto quanto lo Munno revotato,  
 Pe ffarle annore: 'n Grecia se facevano  
 Feste asenarie: a Romma destenato  
 Era no juorno apposta, che nchiudevano  
 Le mmolina, e le sforna; e ncoronato  
 No Ciuccio int' a lo tempio de Vesta,  
 Le portavano attuorno co gran festa.

No

## LIII.

No Rrè de Perzia a n' Aseno facette  
No tempio, e ll' adoraie tutto l' Agitto.  
Nzì a n'ogna de no Ciuccio, che benette  
Da le pparte de ll' Asia, co no scritto  
Alisantro a lo tempio la mettette.  
D'Apollo 'n Derfo: e cchillo vraccio mmitto,  
Che dde tutto lo Munno trejonfaje,  
Ll' ogne puro de n' Aseno ncenzaje.

## LIV.

Ma no rice lo pperdie, pocca obbretrato  
Vedennose lo Ciuccio, pe ccomprire,  
Da n' auto ciuccio lo fice avesato,  
Ca lo tiempo venea de se partire;  
Ed isso pe mmorì cchiù cconzolato,  
Fattase n' acqua jaccia llà benire,  
Dint'a cchell' ogna, ch'avea tanto ammata,  
Se nne voze fa primmo na sciacquata.

## LV.

Tage, che fluie lo primmo, che mparaje  
De fa la zingarella a li Toscane,  
Da chi po st' arte leggja trapassaje  
A cchill' aute mposture de Romane,  
Nfra ll' aote belle cose commannaje,  
Che ttutte li massare, e li pacchiane  
Nnanze a le mmassarle pe no reparo  
Mettersero na capo de sommaro.

At-



## LVI.

Attavio, Attavio stisso, ( che mmaie dire  
 Se pò cchiù de no Ciuccio? ) pe mmostare  
 Quanto voze sta razza favorire,  
 Fice vecino ad Azzio fravecare  
 No tempio apposta; e sse vedea trasire  
 Dinto llà spisso spisso, p' adorase,  
 Chi ve penzate maie? no Ddio noviello,  
 Che nc' avea fatto fa, no Ciucciariello.

## LVII.

Pe cchesto po a Prejapo, Apollo, e Marte  
 Auto, che Ciucce, non sacrefecavano:  
 Pe chesto pe lo Munno, p'ogne parte  
 Le ggrolie de li Giucce se cantavano;  
 E Plauto puro nne voz'esse a pparte,  
 Pocca vedенno quanto se prezzavano  
 Li Ciucce a Romma, fice ll'Asenaria,  
 Che pe sto nomme schitto jle pe ll'aria.

## LVIII.

E ppe cchesto, no ntanto pe le mmura,  
 Che le Scigne facettero a Gragnano,  
 Manco pe lo Castiello, che non dura;  
 Ma pe sta razza, che da mano a mmano  
 S'è spasa da pe ttutto, e la fortuna  
 Ll'hà aizata nzi a le stelle chiano chiano,  
 Sarrà sempe a lo Munno, comm'è stata,  
 LA REGGIA DE LI CIUCCE CONZARVATA.

## LA SCOMPETURA.







